


Hethadenee
waunauyaunee vadan
Luke Vanenāna



The Gospel According to Luke in the Arapaho Language of the
United States of America

Hethadenee waunauyaunee vadan Luke
Vanenāna
The Gospel According to Luke in the Arapaho Language
of the United States of America

Public Domain

Language: Arapaho

Translation by: Michael White Hawk and John Roberts

2015-05-06

PDF generated using Haiola and XeLaTeX on 18 Apr 2025 from source files dated 31 Aug 2023

49903679-7190-57d9-b73a-1c2da4854577

Contents

Luke	1
----------------	---

Hethadenee waunauyaunee vadan Luke Vanenāna

¹ Hanau waunauthathee hadnedanuu hejadenenau hadjenanuu hauthase vavesee hauthedau hena hayauhuhau nanāe hājavaānethauwuthajauthaunin,

² Hasevenānauau nanaa hehethee jasesee vasesā hāenuu nau nejaanuu hanadedaunau;

³ Hasethajaunau hethadee hee nananenau jea, vavesethaugudenau vahee hayauhuhau hehetheejasesee hadnewauthaunauwunathane nedānee, javaānethadee Theauthenus,

⁴ Hadeaenauwu hethauwu hena hayauhuhau nesechauhauthehane.

⁵ Hena hese Herod, naja Judea, jasaa vevethahehe Zacharias haseede, hadauchunanede Abia: nau henene hedaunāhene Arauneau, nau heneseedaunin Elisabeth.

⁶ Nau haenesauuthāhenauau hathaāhenith Hejavaneauthu, thaunaugudethee vahee nanavaavedaunau nau hauchuwudaunau Vahadāde dejauthauwuvade.

⁷ Nau hehauwunesaunenauau, hanau henee hehauwunesaune Elisabeth; nau wauwu haenesauu vaehahenenauau.

⁸ Nau hethauwu, henee daunausuvadanaude hathaāhenith Hejavaneauthu hāenauauchaude,

⁹ Nesedaunethe vevethahehehau, nesedaude hadnejaāde yehauthe hevadannauauwunene Vahadāhenith.

¹⁰ Nau haunauude henanedanede haeevethahedaune jathee nauaichuu jaa.

¹¹ Nau haenauhauva hautheaune Vahadāde haetheaugune hejavese jaanaa.

¹² Nau hāenauhauwaude Zacharias, haejanethajau, nau nāthajau haeedasaa.

¹³ Hau nuu hautheaune, jevanāthajau hathāhuk, Zacharias: havevethahede nandedauwuhuu; nau hadasea Elisabeth hadjanesewaude hāau, nau Jaun hadeseau.

¹⁴ Nau nananin hadanauwuthajau nau hadeneethajau; nau hadnewauthathee neethajauthee hāejanesee.

¹⁵ Hanau haudvasāthaa hathaāhenith Vahadāhenith, nau haudnehauwuvane daudause dadajevenenaje, wauāthe neauthunaje; nau haudnechauchaunadede Hevadanauwauthauwunene Hejavaneauthu, haa hehethee hāejanesee.

¹⁶ Nau haudnewauthaa dāeyaunenede Israel hadjaechuwauiyāaunaude hese Vahadāhenith Henesaunaunau.

17 Nau haudnedauwaunaude nauuu Vadanauwauthauwu nau neesenaudāhenith Elias hadjaechuwayūāauau vadauhau henesaunaunenau heseē dāeyaunauauau nau nejenedauvathee gaugauuthajaudenau hadauethadee; hadnesaanudede henanedanede hesanaa heseē Vahadāhenith.

18 Nau Zacharias naudedusaene nuu? wauwu vanaeha-henenau nau nadasea wauwu vadavehahenede, hathauhuk hautheaune.

19 Nau hautheaune hanaāauchuhananadethāde, Nananenau Gabriel heneē theaugudaunauau hathaāhede Hejavaneauthau; nau janeautheavānau haudnāedaawunathana, nau hadnauhauthehathana nuu neethajaude waunauyauau.

20 Nau, naune, nananin haudnejanadene nau haudnehauwuneeanade, haunaude hese nuu hayauhuhau nauauchaugu hethauwu, hanau nananin daujethauwau-dauwu nadanadede, nuu hadnethauwunauauchu nauauchaugaune.

21 Nau henanedanede haedauyauhauvanauau Zacharias, nau haegaugauanadauwu heneē dauguthetheaugude vadanauauwu.

22 Nau hāejenauāhede, haejeneanadetha: nau haeenauwu daunauhauthāde vadannauauwu: haevathasauwuna nau haejanade.

23 Nau hethauwu, heneē, chauchaunu hese hāesevadanedaude haeyehau heseē nehayau hedauauwu.

24 Nau heeē hena hese henene Elisabeth hanaāenesaunenith, nau haegauduse nehayau hayauthaunenethe hesese heeē, hanaāenehede,

25 Hesau Vahadāde naasehānau heseē hāedaugauhauvānau hadgudanauwunānau nāedayāhede henanedaa.

26 Nau nanedaudauchauwaude hesese hautheaun Gabriel haejeauthewau hehethē Hejavaneauthu heseē hedan Gananee haseenaugu Nazareth,

27 Hesāhedāeyaun haenenehauwaune henanin Joseph haenaneesenith, hehethē hedauauwu David; nau hesāhedāeyaun Mare haenaaseede.

28 Nau hautheaun haedasaa, nau hanaāenehethāde, Hauanuwuthajau, nananin vechauthane, Vahadāde hanedaundaunāne: hauwunaunane hesānaa.

29 Nau hāenauhauwaude, haejanethajaude hedanadedauin, nau haegaugauanade daun hadnesenaunenechuhude nuu hadnesauau.

30 Nau hautheaun, Jevanāthajau, hathāhuk, Mare: hanau nananin vechauthāne Hejavaneauthau.

31 Nau, naune, nananin hadnesenaunin, nau hadneahene, nau JESUS hadeseau.

32 Hadvasāthaa, nau Vāā Hejavaa hadethauva: nau Vahadāde Hejavaneauthau hadvenaude naja theaugudau hene-saunaune David:

33 Nau hadnajawaudauau hededanin Jacob jethauujenee; nau henajanede hadnehauwuthauuvadaunaune.

34 Hanaāenehethaude Mare nuu hautheaune, Haddusene-sau nuu hanau nāhauwāenaunau henane?

35 Nau hautheaun hanaāauchuhananadethāde, Hejavaneau-thau Hevadanauwauthauwu hadnedasāne; nau naunau-thauau Hejavaa haddugauyāaunāne; henaheee jea henee Naunaudāde hadnensesaunewaude Heau Hejavaneauthau hadnethade.

36 Nau, naune, have Elisabeth, jea wauwu henesaunede hadneahede wauwu dauvadavehahenede: nau nuu nanedauchaunethe hesese wauwu hehauwunesaune neethade.

37 Hanau Hejavaneauthau vahee neneededede hayauhuhau.

38 Nau naune, Vahadāde daununānuu hahagu Mare, had-naasauau nuu hasenehene, nau hautheaun hanaāenauthāde.

39 Nau Mare hanaāethauwauthede hena hese, nau hanaāehaude jauaudanenauauwu nauhauhaunee hesee hedan Juda;

40 Nau hanaejedāde hedauauwunene Zacharias, nau haenaunenechautha Elisabeth.

41 Nau hethauwu, henee, Elisabeth hāenedauwauthaude daunaunenechuhunith Mare, dāeyaunaa haenauauwuja hethauwaudauau; nau Elisabeth haechauchaunaude Vadanauwauthauwu:

42 Nau haevasanade, nau hanaāenehede, Hauwunaunane hesānaa, nau hauwunaunade dāeyaunaa hethauwaudauau.

43 Nau naudauhuthedasaa nuu, henee henaune Nava-hadāhewaunāde hadnedasānuu?

44 Hanau, naune, chauchaunu hanadedauunau haunaunenechauhude hāenedauwaudauwau naunaudaunuu, dāeyaunaa naunauauwujahede naunaudauau heee haunauwuthajaude.

45 Nau hauwunaunade hesā henee hethauwuthajaude: hanau hena hayauhuhau hadnethauwunaasauau neethāedauwunade hehethee Vahadāhenith.

46 Nau Mare hanaāenehede, Navadathuwu hauwaunehāde Vahadāhenith,

47 Nau navadathuwu neethajaudaunaude Hejavaneauthu Nānayauhāde.

48 Hanau nedaugauhauwaude hadavenuhuhau hedau-nunaunau: hanau, naune, hewaunehaa heejasesee vahee henaededaunau hauwunaunade hadnethanau.

49 Hanau hena Naunaudāde vanasaunee hayauhuhau hasehānuu; nau vadanaunee heneseede.

50 Nau nauwunaunaude henee headaunādaunau henajāthee henaedede nau nausunee henaedede.

51 Nenuhauthethāde hedāahede hejadena; neneāsauaunaude hesāethajauhuhau hedāhene.

52 Nejananaude naunaudāhenethe hehethee hetheaugu-daunene, nau nejejenanaude hadavenuhuhau.

53 Negaudauhaude hasenahehau nauuu hethadenee; nau nethauyādahehehau negudanaude jessaa.

54 Nenedahewaude heau Israel, nedauyewuwude hedauwuyau;

55 Neesenehethaude havasevāene, Abraham nau hedāeyaunewau jethauujenee.

56 Nau Mare haenedauguva hanāenethe hesese heee, nau hanaāejaehaude nehayau hedauauwuu.

57 Wauhā Elisabeth hanaāevadaudaude hadneejanesāde; nau hanaāeahede.

58 Nau henedaudevādaunau nau henethesaunau haenedauwauthaa hasauwunaunāde Vahadāhenith haenuhauthehaa vanasaunee hauwunaunadede, nau haenetheneethajauvaa.

59 Nau hethauwuu, henee hāenasaudaichunesee haejenauusanauau hadgauguusenith dāeyaunauau; nau haeadethanauau Zacharias, thauguu heneseedaunin henesaunaune.

60 Nau henaune hegau, hāheyaugaune, Jaun hadnethade,

61 Nau hathauhaugaunee hehauwuseenauau hādaunauau nuu neseede,

62 Nau haevathasauwunanauau henesaunaunin, haadene-seenethe.

63 Nau haenaudede dasewauthaunauha, nau haewauthau-nauhā, Jaun haseede, hahagu. Nau haunaude haegaugau-uthajaudene,

64 Nau haegaunadenanauau, nau henethaune haegauchauunauaune, nau hanaāanadede, nau haevaveenethedauna Hejavaneathu.

65 Nau nāthajaude haedasā haunaude henee hathāeauchaunauthee: nau vahee nuu nehedaunau haegaugau-uedaune jedauwuu hathāauau jauaudanenauauwuu Judea.

66 Nau yahee hathāenedauvade haejenanauwu hedahenauau, haudduthā naa dāeyaunaa, hahagaunee? Nau hejadenene Vahadānith haenedaundaunaa.

67 Nau henesaunaune Zacharias haechauchaunaudene Vadanauwauthauwu, nau haeaeayānautheda,

68 Vaveenethedaunaa Vahadāde Hejavaneauthau Israel; hanau haenauujāda nau daujauaudaunaudauau hedenanedane,

69 Nau thauwaudanaude henenese hadnenayauhānauau jedauwuu hedauauwunene hedaununaune David;

70 Dau nausunanadede hedenaa Hevadanaeyāhewau neenaedenethe hāejeenaedenauau:

71 Henee hadnenanedanenuauau hehethe haujauthavene, nau hehethee hejadenaa vahee hāthāasānavādaunene;

72 Hethauwuu hauwunaunadede nesayānāedauwunaude havasevāene, nau hadnedauyewuwude Hevadane-nesedauwau;

73 Deneauwauhude yesee havasevāene Abraham,

74 Henee hadvenānauau, jenāthajaude hehethee hejadenene haujauthavene hadnenayauhānauau hadnevevethedaunau-nauau.

75 Nauguu vadanaunee nau chuwuu hathaāhede, vahee hesee hadenaededaunene.

76 Nau nananin, dāeyaunaa, haeyāhe Hejavaa haudnethane: hanau nananin hadnedaupaudauwu Vahadāde hadnesaanudene hevaunaa;

77 Hadvāde haeyaude hadnenanedanedaunee hededane hadjaegudanauwunaude hewauchudaunenenuau,

78 Hehethee havathee hauwunaunadede Hāsaunaunene; nanaa Naugusaje hehethee hejavaa hadnenauujādaunānauau,

79 Hadvenaude hesee hathāetheaugunethe hadauveeyaunee nau hadaudugauyāsaa gaujauaudahede, hadnedaupaudauu hauauthene hesee hadaudādauyaunee.

80 Nau dāeyaunaa haeseau, nau hevadathuwu haedāeaune, nau haenaadaude hadaunechaunee haunaude hesee hadneenuhauthethāde Israel.

2

1 Nau hethauwuu hena hese hauchuwude haeneāsanaue hehethee Caesar Augustus henee vahee hananedanede had-nayāadee.

2 (Nau nuu nayāadede haenedauwunesede deauchuwu-nanenede Cyrenius Syria.)

3 Nau vahee haeuāchudene hadnayāadee haunaude hanesāde hesee nehayau hededan.

4 Nau Joseph jea haeyehau hehethee Gananee, hehethee hedan Nazareth, jedauwuu Judea, jedauwuu hededan David Bethlehem neseee, (hanau naadahagu hedauauwunene nau nedānee David.)

5 Hadnethenayāade nagu Mareheau heauthehewau-thādaune hadnewaune wuwu haeehāthane hee henesaune.

6 Nau hethauwuu, henee hajesenausunanedauthee, hese haevadaunaunau hadneejanesāde.

7 Nau hanaāejanesāde henedauwusaune heau, nau haea-jetha, nau haesevana hewauchuhauchave nedau vethehenethe; hanau haeneau vethehedaunauauwu.

8 Nau hena vavade vedauauwu haudānajauāhehauau haeaudenauau, haeaunaunehanaauau haeaunauyauhauvanauau hedajauanenau vegau.

9 Nau, wauhā, Vahadāde hedautheaune haedasā, nau havathee haeseenausāaunauau Vahadānith; nau haevasenāthajaunauau.

10 Nau hautheaun jevanāthajauau hathāhaugaunee: hanau, naune, nauuchaudaunathana hethadee waunauyauau havathee neethajaude, nanaa hee vahee henanedanede.

11 Hee nananena janese nuu desenee hededan David Henayauthāhe, nananede Chris Vahadāde.

12 Nau nuu hadneaenauwuna; Nananena hadveehauna dāeyaunaa hanajehede, saesee hewauchuhauchave nedauvethehethee.

13 Nau nauhauhaunee hena haewauthanaauau hejavaa hautheaunauau nauguu naa hautheau haevaveenethedanauau Hejavaneauthu, nau hasenehehaugaunee,

14 Havathee hauwaunede hesee Hejavaneauthau hejavaa, nau dasee vedauauwu nanethauaunee, hethadee hathanavana henanedanede.

15 Nau hethauwu, hautheaunauau haejaenauthā hesee hejavaa, Wauhā hadehaunau Bethlehem, hanathadagaunee nuu haudānajauāhehauau, nau nauhaudauwu nuu hayewhu javeauau, nanaa Vahadāde hāāedauwunādaunene.

16 Nau haenauchuhanausanauau, nau haevvehanaauau Mare nau Joseph, nau dāeyaunauau haesaeseene hewauchuhauchauwauauwu henee nedauvethehenethe hewauchuhauchāve.

17 Nau hāenauhauwauthee, haenēnauthedanauau nuu hathauthedaunāhethee hee dāeyaunauau.

18 Nau vahee hathāenedauvade haegauguanadauwu henee hayauhuhau nuu hathauthedaunāthee haudānajauāhehau.

19 Nau Mare haeanaunede vahee nuu hayauhuhau, nau haegauguanade hedahaa.

20 Nau haudānajauāhehauau haejaesanauau, haevaveenethedaunanaauau nau haevaveenethedaunanaauau Hejavaneauthu hee vahee hanathadavathee nau hathauhauthāthee, neethāedauwunāhethee.

21 Nau hāenasaudaunese hadneegauguusede dāeyaunaa henesede Jesus, haseadagu nuu haseede haenaneeseāde hautheaunau haunauau deejethāsee.

22 Nau hesee hāewaudeauchaude hasaunee hedauchuwude Moses hāevadaunaunee, haeyehauthanaauau hesee Dadaunedan

hadjenanauwunauthee Vahadāhenith;

²³ (Hathauthaunauhunee hauchuwudaunaa Vahadāde, Dajee haunauahee henee nedauwusau vadade hadnethade hese Vahadāhenith:)

²⁴ Nau hadnausāyaudenee neesenedaunee hauchuwudaunaa Vahadāde, Hanesethee vedāenauau, wauāthe hanesethee neauthuvedāesaunauau.

²⁵ Nau, naune, hena henane haenedau Dādaunedan, Simeon haenaneeseede; nau naa henane haechuvā nau haethauwuthajau, haejauwuwude hadneneethajauthee Israel: nau Vadanauwauthauwu haethāsade.

²⁶ Nau haeauthedaunaa Vadanauwauthauwu, henee hadjenauhaudauau gaujauaudahede, haunaude hadnauhauwaude Vahadāhenith Chris.

²⁷ Nau haejeheenuusa Vadanauwauthauwu jedauwuu Vadannauauwuu: nau hāene henehā Hejavaeneauthusau jedanāde hadnesehāde thauguu hasauau hauchuwude,

²⁸ Hanaāejavethenaunaude hejadena, nau haevevenethedauna Hejavaneauthu nau hanaāenehede,

²⁹ Vahadāhene, hewaunehaa nanehāejenanaude hauwauwaunave hadnaudauau nanethauaunee, hasauau hadanadede:

³⁰ Heee nasesā naunauhauwauau havāde Henayauthāhe,

³¹ Naa nananin hadnesaanudene hathaāhedaunee vahee henanedanede;

³² Hese hadneesenee Hathāauau henanedanede, nau havathee hadnanedanede Israel.

³³ Nau Joseph nau henaune haegaugauanadauwu hena hayauhau hanasenehethavathe.

³⁴ Nau Simeon haevevethasa, nau haeāedauwuna Mareheau henaune, Naune, Naa dāeyaunaa hanejenanade hadneaunenauaudenenee nau hadneejaegauhadenenee hauwauhuu Israel; nau hanau nauhauthethau hadnevathevade;

³⁵ (Haa, gaugachu hadneegauchuguhune nehayau havadathuvaa jea;) henee gauguauthajaudenau hauwauhuu vadauhau hadneauthasuu.

³⁶ Nau hena haenesā Anna, haeyāhe, hedaunau Phanuel, hanaadāde Aser: haewauthanenau hejajenewau, nau haenethenaedeva hechu nesaudauchu jajene hehethee neeseede;

³⁷ Nau haenevesāne heee nasaudausauau yānenee jajene, nananede haejethauunaude vadannauauwuu, hau haenesedauna Hejavaeneauthu nauguu naugauyaude nau vevethahede dajāee nau hese.

³⁸ Nau haejejedā heee haevaveene jea Vahadāhenith, nau haeheauthedauna vahee nethāejauwuwudethee jauaudaunauthadede jedauwuu Dādaunedan.

39 Nau hāesedauthee vahee hayauhuhau hasauau hauchuwude Vahadāde, haejaesanauau hese Gananee, hadahethee hedan Nazareth.

40 Nau dāeyaunaa haeeseau, nau haedāeaune hevadathuwu, haechauchaunau haeayaude: nau Hejavaneauthu vadaude haethāsade.

41 Nau wauhā henehā haeahaunenau hese Dādaunedan hadaachuvejanene vasevadanese Hadavechauthadede.

42 Nau denesenene hejajenewau, haeahaunau hese Dādaunedan hanau nesedaunene vasevadanese.

43 Nau hese hāevadauaunee, hāejāesathē, dāeyaunaa Hejavaneauthusau haenasedauusa Dādaunedan; nau Joseph nau henaune haejaenauwu.

44 Hau henaneda haenehauvā hathanauwauhaugaunee, nau haejanaugudaunee; hanaāenaudehauthee henedauānene nau henedaehāhene.

45 Nau hāejeveehauthee, haejaesanauau hese Dādaunedan, daunaudehauthee.

46 Nau hethauwu hāenasese hanaāeveehauthee jedauwu vadannauwu, haetheaugune nahethāe hauthedahehau, haejaatheha, nau haenaunaudedauna.

47 Nau vahee hathāenedauwauthāthee haegaugauanadauwu hedaeyaunene nau hedauchuhanehedauene.

48 Nau hāenauhauwauthee, haegaugauanavanauau: nau henaune, Nā, naudu hanesehāane? hathāhuk, naune hāsaunau nau nananenau nenaudehane nejeneethajaunee.

49 Nau hathauhuk, naudu haenaudehena? gauhajaene nachāe wauwu hanedaudauwau Nāsaunau henesethaude?

50 Nau haejaenauwu hasenehethāthee.

51 Nau hanaāenethaunau, nau haenauusanauau Nazareth, nau haeethauwadaunā: hau henaune haeanaunedene vahee nuu nehedaunau hedahaa.

52 Nau Hejavaneauthusau haeneenaneane hedaeyau nau hajedāde nau vechauthaude Hejavaneauthu nau henanedanede.

3

1 Wauhā yauthaunene jajene wauwu neenajanede Tiberius Caesar, Pontius Pinade nausunajawaudauau Judea, nau Herod nanajawaudauau Gananee, nau henauhauwauau Theneb nanajawaudauau Iturea nau vedauauwu Trachonitis, nau Lysanias naja Abilene,

2 Annas nau Caiphas vevethenajanauau, Hejavaneauthu nanadede haedasaa Jaun heau Zacharias nauaunee.

3 Nau haedade vahee vedauauwu hanathaudanee Jordan, haeauthedaude dusaahede haudneaugauthuu gaugauuthajaudenau hadneegudanee wauchudaunenau;

4 Naathauthaunauhuu wauthaunauhanaa hedanadede Esaias haeyāhe, Jasaye haevasenehe nauaunee, Hesaanuu hathaāhede Vahadāhede, nesedee hevau chwuwu.

5 Hadauchugauaudayauau hadnechauchanaa, nau hadauchāe hauane nau jauaudane hadjananee, nau jajāvāe hadchuvanee, nau hadauhauauyauau bau* hadneyauthauau;

6 Nau vahee henanedanede hadnauhauau Hejavaneauthu hedenayauthaunene.

7 Haenaāenehethaude waunauthanee henanedanede henee hedaśādaunau haddusaanaude, Hau hedenaededaunee nau seseyānauau, hanaa hāedauwunādaunenau haddaugauhudaunee nauthee hasenaunaude hadnauusanauau?

8 Hethadee nesedee hadeheanaunee hadnaugauthuu haugaugauuthajaudenenau jevaauthenehee hadahenauau, hāsaunaunene Abraham: hanau nāedauwunathana, Hejavaneauthu neene nesehaude nuu hauunaugānau Abraham hedāeyaunewau.

9 Nau wauhā jea hauunauchu janenanee hethājee hauhaudee: vahee hauhaudee jeneeaudehuk vevenaundenau haddauwauhude, nau hadneewaudeadaunee.

10 Nau henanedanau haenaudeadaunaa, hauddusedaune? hathāhuk.

11 Hanaāēdauwunaude, Daun nanesevechudaunade, jevena daun janevechudaunenith; nau daun hevethenede jenaasedaude, hahagu.

12 Wauhā haenaāenuusathee hauāyāhehauau haddusaa-hethee, Hechauhauthethāhe hauddusedaune, hathāhuk,

13 Nau hathāhaugaunee, javaauthaunaudaunāthe henee nethautheavane.

14 Nau vanenanenau hanaasedaunethe, hanaasenehethāde, Nau haddusedaune, hathāhuk? Nau javaauthasenehaa henaneda, hathāhaugaunee, javaauthenandedauneevaa henaneda, nau hadnanethauaunahedava haunaudaunadenau.

15 Nau henanedanau hathanavāhuk, nau vahee henanedanede haegaugauanavaa hedāheneenau Jaun wauau Chris haenane, nau wauāthe hajee;

16 Jaun hanaāauchuhanehethaude, hathauhuk vahee, Hadneedusaanathana heee naje; hau hanesāde javaānaudāde javaāhenau jaunaude hewauhugu hewauaunaa nāhauwuneaugunavane, hadneedusaanāna heee Hejavaneauthu Vadanauwauthauwu heee heseda.

17 Henaunasāhau nanewauunauau, nau hadgaunauhauau heyauthee nedauthauayāde, nau hadnauānauau

* 3:5 "Bau" probably should be "vau" (meaning "way" or "road"), in line with the rest of the text, since the letter "b" appears nowhere else except in foreign names.

wauchuunethauauhanau nedauthānauau jenayaunau;
 hau jenethauayaunau hadvadauchauauau hesedaa
 nedaujesaudaunahee.

18 Nau waunauthanee hanasejāesaunee hayauhuhau
 hanathauthedaunade henanedanau.

19 Hau Herod naja haeaunaunewau heee Herodias
 henauhauwauau Thenebeau henenene, nau vahee
 hathāewausaunee hanasedaude Herod,

20 Haewauhaunene nuu vahee henee dauaugauhude
 Jauneau duguhunauauwu.

21 Wauhā hāevahesedusaahedaunee henanedanede,
 hethauwu henee Hejavaneauthusau haenethedusaā, nau
 haevevetha, hejavaa hanaāegaunanenee,

22 Nau Hejavaneauthuvadanauwauthauwu haejejanauhu-
 sane hedanayaunaa hedanayau haenaasaunee waude
 vedāene nau hanadede haejenauusa hehethee hejavaa,
 hasenehehuk, Nananene vechauthauau Nāa, nananene
 vaveenethedaunathane.

23 Nau Hejavaneauthusau nehayau wauwu wauau
 hanasauau jajeneva, hanane (hathanavade) heau Joseph,
 nananenith heau Heli,

24 Nananenith heau Matthat, nananenith heau Levi, nana-
 nenith heau Melchi, nananenith heau Janna, nananenith
 heau Joseph,

25 Nananenith heau Mattathias, nananenith heau Amos,
 nananenith heau Naum, nananenith heau Esli, nananenith
 heau Nagge,

26 Nananenith heau Maath, nananenith heau Mattathias,
 nananenith heau Semei, nananenith heau Joseph, nana-
 nenith heau Juda,

27 Nananenith heau Jonanna, nananenith heau Rhesa,
 nananenith heau Zorobabel, nananenith heau Salathiel,
 nananenith heau Neri,

28 Nananenith heau Melchi, nananenith heau Addi, nana-
 nenith heau Cosam, nananenith heau Elmodam, nananenith
 heau Er,

29 Nananenith heau Jose, nananenith heau Eliezer, nana-
 nenith heau Jorim, nananenith heau Matthat, nananenith
 heau Levi,

30 Nananenith heau Simeon, nananenith heau Juda, nana-
 nenith heau Joseph, nananenith heau Jonan, nananenith
 heau Eliakim,

31 Nananenith heau Melea, nananenith heau Menan, nana-
 nenith heau Matthatha, nananenith heau Nathan, nana-
 nenith heau David,

32 Nananenith heau Jesse, nananenith heau Obed, nana-
 nenith heau Booz, nananenith heau Salmon, nananenith

heau Naason,

³³ Nananenith heau Aminadab, nananenith heau Aram, nananenith heau Esrom, nananenith heau Phares, nananenith heau Juda,

³⁴ Nananenith heau Jacob, nananenith heau Isaac, nananenith heau Abraham, nananenith heau Thara, nananenith heau Nachor,

³⁵ Nananenith heau Saruch, nananenith heau Ragau, nananenith heau Phalec, nananenith heau Heber, nananenith heau Sala,

³⁶ Nananenith heau Cainan, nananenith heau Arphaxad, nananenith heau Sem, nananenith heau Noe, nananenith heau Lamech,

³⁷ Nananenith heau Mathusala, nananenith heau Enoch, nananenith heau Jared, nananenith heau Maleleel, nananenith heau Cainan,

³⁸ Nananenith heau Enos, nananenith heau Seth, nananenith heau Adam, nananenith heau Hejavaneauthau.

4

¹ Nau Hejavaneauthusau wauwu haechauchaunaude Vadanauwauthauwu haejehedesa hehethee Jordan, nau haeyehauthaa Vadanauwauthauwu nauaunee,

² Yāyauau hese hananeedauchunese haenayāthehaa Haujaune, nau hena hese haeheejevethē: nau hāevathenese, haenaāasenade waunee.

³ Nau Haujaune hathāhuk, hith nananene Haāthauwuāvaa Hejavaneauthau hāedauwunene naa hauunauga hadejauaujaunenede.

⁴ Nau Hejavaneauthusau haeauchuhanehe hathauhuk, Wauthaunauhuu henane hehauwuunaede jauaujaunau jasaa, hau hee haunauude hedanadedauunene Hejavaneauthu.

⁵ Nau Haujaune haenauauhuchauhaa hauanee hadaujauudanene, nau haenauhauthehaa vahee najanede hathāauauvaa henanedanede chauchaunu.

⁶ Nau vahee nuu najawaude hadvenathane, nau hauwaunede, hathāhuk Haujaun: hanau hene nananenau devenanau; nau daun navadauvenau hadevenauau.

⁷ Hith nananene henahee hevevethedaunenagu, vahee hadnehanāhene.

⁸ Nau Hejavaneauthusaun hanaāauchuhananadethāde nau hathāhuk, Hedehau naugauvaa, Haujau haugau hathauthaunauhuu, Nananene hadevevethedaunaude Vahadāde Hāsaunau, nau hanesāde haudnevevethedaunaude.

9 Nau hanaāehauthāde Dādaunedan, nau haejenanaa nau-nauchuu vadannauauwuu, nau hith Haāthauwuāvaa Hejavaneauthau hauwujanaauau hede hehethee, hathāhuk:

10 Haugau hathauthaunauhuu, Hadāedauwunaude hedautheaunau haddunānaune:

11 Nau hejadenenau hadejedunānaune, havaaugugausene headaa dasee hauunaugāe.

12 Nau Hejavaneauthusaun hanaāauchuhananadethāde nau hathāhuk, Hasenehee, Nananene jevanayāthehene Vahadāde Hāsaunau.

13 Nau hāevathenayāthedaude vahee, hanaāejathāde haujau najee,

14 Nau Hejavaneauthusau hanaāejaenau dāhede Vadanauwauthauwu haduu Gananee: nau hanaāauthedaunenede hanaāeneāsanaunee vahee hathāauau Gananee nauanee.

15 Nau haechauhautheha vevethahenauauwuu, nau vahee haevaveeneha.

16 Nau haenauusa Nazareth, needaunauuchauhade: nau dajauaunee nesedaude haeyehau vevethahenauauwuu vadanesee, nau haetheaugu dasauhaudauau wauthau nauha.

17 Nau haevenau hewauthaunauhanene haeyāhew Esaias. Nau hāegaunanauau wauthaunauha, haeveede hadauwauthaunauhunee,

18 Vahadāde Hedauwauthauwu nanadeaunānu, hanau dehedusaanānu javeda hadnauthedaunu hethadenee waunauyaunee hadavenuhunethee: hanejevāde haudnenayauhu naudauwuthajauthee, hadnauthedanau haudjaejenanathee wauwaunauau, nau hadnejanauhauthāthee nanenauguthee, haudjaejenanathee* hasenethaunauau,

19 Haudnauthedaudauwau hethadee jaunaunauau jaje Vahadāde.

20 Nau haeauuvane wauthaunauha nau haejaevana vevethahehew, nau hanaāejanaugude. Nau vasesā vahee hathāanedauthee vevethahenauauwuu haenāuhauvanauau.

21 Nau hanaāejasesenehethaude, nuu desenee nuu hathauthaunauhuu hethauvaa haunaudaununenau.

22 Nau vahee haesegaugauudedauene, nau haegaugauanadauwu hethadenee hedanadedauene hethāenehethaunene. Nau gaunuu jee heau Joseph? hahagaunee,

* 4:18 There is a midline hyphen in “haud-jaejenanathee” which doesn’t appear in same word earlier in the verse. There are no other midline hyphens in this text at all, and this hyphen is probably without significance.

23 Nau hanaānehethaude, Nananena hadethauwunehesena nuu heeejegausudede, Naudaunehāhe, nehanenayauhade: henee nanāthadauwaunee nanāseadaunee Capernaum nanehasedaunee nechau hede nehayau havedauauwuvaa.

24 Nau hathauhuk hethauwuu nehethathana, Hegau haeyāhe hehauwuvechauthau nehayau hevedauauwuvaa.

25 Hau hadauthedaunathava hethauwuu, waunauthathee henevesānauau neanedauthathee Israel, hesee deanedaude Elias, hejavaa denausunaugauhuu nasau jajene nau nedaudauchu hesese, devasauau hasenaude denanadesanauau vedauauwuu;

26 Hau hehauwunesāhene hejevādaunene Elias, vavade Sarepta, hedan Sidon, hesā nananede henevesā.

27 Nau newauthathee naugaugauwuhauau neanedauthathee Israel deanedaude Eliseus haeyāhe; nau hehauwunesā henayauhade vavade Naaman Syrian.

28 Nau vahee hathāetheauguthee vevethahenauauwuu, hāenedauwauduu nuu hayauhuhau, haechauchaunaudene-nau hasenaunaude,

29 Nau haegauhānauau, nau haenunanattheguthanauau hedan, nau haeethauthanauau hauchauguu jauaudanee haduunee hededanenau needaunesehenee neaudnedauauwuguthathee hauthedaunaānee.

30 Hau haejavechautha hehethee nahethāe, haejathāau,

31 Nau haenauusa Capernaum, hedan Gananee, nau haeauthedauna vadanesenene,

32 Nau haegaugauanadauwunenau hasechauhauthaude hedanadedaunau, hanau hedanadedaunau haenauthaunau.

33 Nau vevethahenauauwuu henane haenedau hevadathuwu haewauchāhene haujaun, nau haevasanade,

34 Jenehāaa; hathāhuk, haudduseha nananene Jesus Nazareth? gauhāejau haudnauauhāane? Haenaunathane hadāhene; Vadanauau Hejavaneauthau.

35 Nau Hejavaneauthausau haeneuva, dādaunauguu, hathauhuk, nau jenauchune. Nau haujau hāegausagewaude nahethāe hanaājenauthaude nau haejaseneha.

36 Nau vahee haegaugauanavaa, nau haenadethadene-nau jae, nuu hayew hanadede; hathāhuk, hethauwuu nau-guu haenauthenehetha haenesedauwauna wauchāhenethe haujaunau, nau hanaājenauāhethee.

37 Hanaāauthedaunenede nanadee jasesee gauānee vedauauwuu,

38 Nau haegauhā haenauā vevethahenauauwuu, nau haejedā Simon hedauauwuu. Nau Simon henene henaunene haenaudauwauvāhene; nau haeauthewaunauthasanauau.

39 Nau haetheaugudauna, nau haeneude hasauwauvahede; nau haenauthaa: nau nauhauhaunee haegauhā nau haedauyauhauvanauau.

40 Wauhā hesese hāenaesade vahee hathāenethenauthee hasauwauvahēhau hanasejaechauwauvāhenethe haenau-uchaudaunau; nau haedajevasana nau haeenayauha.

41 Nau haujaunauau nauguu haevanauusanauau haewauthanauau, haeneānadenauau, nau haenehenauau, Nananene Chris Heau Hejavaneauthau. Nau haeneneuva haejechuwauanadeha: dauhaenauwunethe dau Chris denede.

42 Nau hāesenenee, hanaāejathāaude hesee hadaunechaudanee, nau henanedanau haenaudehaa, nau haedasaa, nau haedauduvaa, haudjenauthaude.

43 Nau hanaāēdauwunaude, haudnauthedaudauwau nananede Hejavaneauthau gauchuhunee hedanau nauguu: haugaunaasejejenananau.

44 Nau haeautheda vevethahenauauwuu Gananee.

5

1 Nau hethauwuu, henanedanede haeneenavadaunedauwaudauwu hedanadedauunene Hejavaneauthu, haetheaugu sathauwu neajee Gennesaret,

2 Nau haenauhaude hanesanenee thewaunau haetheaugunenau sathauwu neajee: hau naunauyāhehauau haeyauhaudesanauau, nau haeanahesadenauau henauyaudenenu.

3 Nau haejedā jasaa hethewaunene, Simon, nau haenehetha hadwauauwuhudede vanehaa hehethee vachuwauauwuu vedauauwuu. Nau haejanaugu, nau haeechauhautheha henanedanau hehethee thewaunaa.

4 Wauhā hāevadauthedade, hanaāenehethaude Simon, wauauwuhude hadaudavee, nau henauwunau haunauyaude hadjathāne.

5 Nau Simon hanaāauchuhananadethaude, Hechauhauthethāhe, naunaugaunenesethānauau, nau nāhauwuthauujathāva: hau hegaugaunauau hadnae-nauwuaudenau nauyaude haugau hasenehene.

6 Nau hāesedauthee nuu haewauthanenau hejathaunenau, nau haethauwunauaune henauyaudenenu.

7 Nau haeadethanauau henedaehahenau danachaugunethe jasaa thewaunaa, haudjaunethe, nau haudnedāhevāthee. Nau haenauusanenu, nau haeechauchaunaudenauau hanesanenee thewaunau hanaāenauwuuu.

8 Hāenauhaudauau Simon Peda, haechauāgujanaugu hejaedayānene Hejavaneauthusaun, nauchu, hathāhuk; haugauhauhauganenau, Hau Vahadāhene.

9 Haejenaunethajau, nau vahee hethāenethaunādaunau dau-nauanauthee nauwu hejathaunenau.

10 Nau nauguu James, nau Jaun, heauhau Zebedee, henedaehauhau Simon. Nau Hejavaneauthusau hanaāēdauwunaude Simon, Jevanāthajau, hewaunehaa hee nananene haudnesedanaude henanenauau.

11 Nau hāenauuchaudethee hethewaunenau vedauauwu, hanaāēnauduu vahee, nau hanaāenethauguhauthee.

12 Nau hethauwu, hāanedaude jasia hedan, naune henane haechauchaunaude naunaujaunee haugauwude; hāenauhauwaude Hejavaneauthusaun haeuāneseve, nau haeautheava, Vahadāhene, vathehānenagu hadeneeyau-danene hathauhuk.

13 Nau haeyethauha, nau haevasana, vanathehānau: heyauāhe, hathaukuk. Nau nauhauhaunee naunaujaunee haugauwude haenauthaa.

14 Nau haenesedauwaunā haudjāedauwunaunith henanedane: hau najesa hadnauhauthehau hadanayau vevethahevāhe, nau hadvā dauhenayauhane, Mosase neesedaudevade, haudneāenuu.

15 Hau haeneenanauthedaunene neānee: nau havathee haewautha henanedanede haeuānauuchaudene daujewaunejaathededaunee, nau haudnenayauhāthee hedasauwauvahedaunenau.

16 Nau haejathāau hese nauaunee, nau haevevetha.

17 Nau hethauwu jasia hese, hajesechauhauthethāde, Nesethajauhuhauau nau hechauhauwauwuhuhauau nanavaavede haetheaugunauau hejava, haejeehedesanauau hadauchāe hauwauhauauwudan Gananee, nau Judea, nau Dādaunedan: nau naunaudāde Vahadāde haetheaugu hadnenayauhaude.

18 Nau, naune, henanenauau haenauuchauhanauau henanene hee hedauwune haeesevāhene nau haenayāthejedananauau, nau hadjenanauwunauthee hathājenith,

19 Nau hāejevedethee haudnethejedanauthee hanau dauwauthaa henanedanede, hanaāēnauuhusathee dasee hauauwu, nau haejanauhaujānanauau, hehethee dasee hejavaa hauauwu nauguu hedauwune nahethāe hathājenith Hejavaneauthusaun.

20 Nau hāenauhauwunith hedethauwuthajaudenenau, hanaāēdauwunaude, Henane, hauwauchudaude gaunudanauwunane.

21 Nau wauthaunauhāhehauau Nau Nesethajauhuhauau hanaāejasesegauguauthajauthee, Hanaa naa hananadede nehedaduhude Hejavaneauthu? hathāhuk. Hanaa

haudgudanauau wauchudaude, vavade Hejavaneauthau, naanesāde?

22 Hau hāenauwunith Hejavaneauthusaun hegau-gauuthajaudenenau, Haudusethajauva hadahenauau? hathāhaugaanee,

23 Hayew gauchauaa, nehehāgu, Hauwauchudaude gaunudanauwunana; nau wauāthe gauhā nau javesa heheagu?

24 Hau hadaenauwu henee Heau henane naunaudāde dasee hathāauauvadee negudanauau wauchudaude, (naasenehethauhaugu neasauwauvahedauwunith hesevahede) Hāedauwunathane, Gauhā, nau hedanau hauddau nau najesa nananene haudauauwuu.

25 Nau nauhauhaanee haethauwauthe hathāājenethe nau haedane heaugusenadenau nau hanaāejathāude hedauauwuu haevaveenethedauna Hejavaneauthu.

26 Nau vahee haegaugauuthajaudene nau haevaveenethedaunanauau Hejavaneauthu, nau haechauchaunaudenauau nāthajauve, Naunaudauhau-thānauau nuu desene, hāheagu.

27 Nau hāevathedaude haejathāau nau haenauhauva hauāyāhe Levi hanaaseenith, haetheaugune nedau-danauau hauāyaunau, nau jethauguhu hathauhuk.

28 Nau haevanauthā, haegauhā, nau haethauguha.

29 Nau Levi haevasevethetheha nehayau hedauauwuu, nau haewauthanauau hauāyāhehauau nau hauthauau haenedau-guvā.

30 Hau wauthaunauhāhehau nau Nesethajauhuhauau haeaunevā hethauguhādaunau, naudū haenethevethewewauna nau haenedaveyāwauna hauāyāhehauau nau wauchudauhuhauau, hathāhaugaanee?

31 Nau Hejavaneauthusaun hanaāauchuhananadethāthee, hathāedāenaedethee hehauwuvatethehā naudaunehāhew; hau hathāasauwauvahethee.

32 Nāhauwujenauusa haudnadethu hethahethee hau wauchudauhuhauau hadnaugaudanenee hegaugauuthajaudenenau.

33 Nau hathāhuk naudū hethauguhādaunau Jaun denauaunenaugauyānethe, nau devevethahethee, nau naasedauthee hethauguhādaunenau Nesethajauhuhauau; hau hanethenaunauau havethehethee nau havaveyāthee?

34 Nau hathāhaugaanee, Gauhājeneenesehauva dāeyaunauauau nedauenenedaunee hauauwuu naugauyaude hajesanedau-daunāthee waunenenehew?

35 Hau hese haudnauauchuu, haudneedanauwunana waunenenehe, nau hee hadnaāenaugauyāthee hena hese.

36 Nau hanaāanadethaude jea jegausauhānee; Henane hehauwu jenane waunauyaunee neauthayew hadaugauthāyaunee, hith hesedauhuk, nau hadauwaunyaunee needaudenauuu, nau jasaa needanee hadau waunyaunee hehauwuneauchauna gauthāyaunee.

37 Nau hegau henane hehauwujenane waunauyaunee vasevenenaje gauthānenevajaunaa; nau wauāthe wauyaugu vasevenenaje haddaudeauau nevajaunau, nau hadguse-nauauau, nau nevajaunau haddenanaunauuu.

38 Hau waunauyaunee vasevenenaje hadedaunee hadauwaunyaunee nevajau, nau nanesaunthadee.

39 Nau hegau henane hesevanaagu gauthānevasevenenaje nauhauhaunee haevathehaa waunauyaunee; hanau gauthāyaunee hethadee, hathauhuk.

6

1 Nau hethauwuu naneseauwauau vadanese, haeehedesa jenayaunaa; nau hethauguhādaunau haegaugauunauwu wauchuunethauuhanau, nau haevethenauau, haegauneegudenauau hejadenenau.

2 Nau hauthauauau Nesethajauhuhau, Naudu hanesedauna wujaa nanavanau nesedaude vadanese hathauhaugaunee?

3 Nau Hejavaneauthusau hanaāaachuhananadethaude, Gauhājethaunauhaude nuu hasauau David neesedaude, nehayau deasenade, nau neethāenethaunāde.

4 Neesejedāde Hejavaneauthu hedauauwunene, nau needanauau nau nevethē nauhauthethājauaujau, nau haevēna heethāenethaunaunau; wujaa nanavanau veyāgu hau jasaa vevethahevahehauau?

5 Nau hanaāāedauwunāthee, Heau henane nanethadāde vadanese.

6 Nau hethauwuu jea jasaa vadanese haejedā vevetha-henauauwuu nau haeautheda: nau henane haenedau hejavehejadenaa haesevane,

7 Nau wauthaunauhāhehau nau Nesethajauhuhau haeanauyauhauvaa, wauau haadenenayauthā vadanese; had-nejauaudaunauthee dauhanājauwauaunauthee.

8 Hau haeanauwu hegaugauuthajaudenenau nau hanaāanadethaude henanene hesevenasanith, Gauhā nau yethaagu nahethāe. Nau haegauhā nau haeyethaagu.

9 Hejavaneauthusau hanaāāedauwunaude, haudnaudedau-nathana nananena hanesadee; Gaujenanavanau vadane-see hethadāgu hasedaunee, nau wauāthe wauchudaunee hēnauyauhāgu hēnaedede, nau wauāthe nanaunehāgu?

10 Nau hanaāenaunauānede vahee, hanaāēdauwunaude henanene, Segauha hajade. Nau hanaasedaude: nau hejade haeenayauhune jasaa hasaunee.

11 Nau haeechauchaunaudenauau hasenaunaude: nau hanaāaunauchuwuhadethee daun haudnesehauthee Hejavaneauthusaun.

12 Hethauwuu hena hese, haeehau hauanee haudnevevethahede, nau haunaude naugaunee haevevethedauna Hejavaneauthu.

13 Nau hāesenee, hanaāadethaude hethauguhādaunau; nau haeedana vadadauchunesenee, hanaāeneseaude vadahanauau.

14 Simoneau (jea haeaugauthea Peda haseauhuk), nau Andwheau henauhauwauau, James nau Jaun, Thenib, nau Bathaunaumew,

15 Matthew, nau Taumis, James heau Atheas, nau Simon Zenautes haseadagu,

16 Nau Judas James henauhauwauau, nau Judas Iskariot,* hanane jea neheaudaunade Hejavaneauthusaun.

17 Nau haejenauunethauna nau haetheaugunauau hethauauwuu, nau hadauchunanenethe hethauguhādaunau, nau haevasenauthenedau henanedanede hehethee vahee Judea nau Dādaunedan, nau hehethee sasethauwu hadajee Tyre nau Sidon hethāejenauujaatthehādaunau, nau haudnenayauhāthee hedaſauwauvahedaunenau;

18 Nau hathāenaunauthauwauvahethee wauchāhenethe haujaunau: nau haeenayauhaunauau,

19 Nau haunaude hadaucha haevadauvasanau hanau daunudesanaunee hevadaude nau haevahenayauha.

20 Nau hanaāenāauhauwaude hethauguhādaunau, Hauwunaunana nananena hadavenuhunena; hanau nananena nananede Hejavaneauthau, hathauhuk.

21 Hauwunaunana nananena hathāasenana hewaunehaa: hanau nananena hadnegaudana. Hauwunaunana nananena hathāevewauhuna hewaunehaa, hanau nananena hadnauchaunena.

22 Hauwunaunana nananena, henaneda hasānavānā, nau jaasauaunānā, nau naunaunauthevānā, nau hausāgudenauthē haneseadaunenau hadauwusaunee, haugau Henane Heāhene heee.

23 Haunauwuthajauau henee hesee heee, nau jajanaunauau heee haunauwuthajau: hanau, naune, hanavanasauau hadaugauthēavadenenau hejavaa: hanau naneesedauyaugaune henesaunaunenau naneesehauhaugaunee haeyāhehau.

* **6:16** "Iskariot" is spelt with a "k" here but in 22:3 with a "c". Biblical names in this text generally but not always follow the spelling of the King James Version (KJV).

24 Hau naunauthauau hadnauauchaudaune hathāeveaunauaune; haugau hanesedanauwuna hauwau-theadede.

25 Naunauthauau hadnauauchaudauna hathāegaudana; haudnasenana. Naunauthauau hadnauauchaudauna hathāauchaunena hewaunehaa, hadnaudauwuthajauna nau hadvewauhuna.

26 Naunauthauau hadnauauchaudauna, daunhāene vā-hee henaneda hāethadenee hasenehethānā, hanau hene-saunaunenau naneesehauyaugaune jayaudauwaeyāhehau.

27 Hau hadāedauwunathava nananena hathāenedauvana, Vechauthaa nananena haujauthavenau, heneehaa hasānavādaunenau,

28 Hauwunaunaa hāwauwauchuvādaunenau, nau hevevethasaa hāwauwauchuhādaunenau nananena.

29 Nau henee haudauauvāde hajāeaunaa nau naugautha venene; nau hedanauaugu nananene hauddu jevaedanau jea naudauguvechude jevaethaa.

30 Hevenaa daun henaneda hānedauwunādaunenau nananene; nau jeva jaenedauwunaa hedanauwunānagu daun hanetheyaunenau.

31 Daun hasevathehānaune henaneda hesehānenagu, nechau jenaasehaude.

32 Hith nananena vechauthaunagu daun havechauthādaunenau nananena, haddusevaveeneva nananena? haugau wauwauchudauhuhauau nechau nevechauthauthee hethāevechauthādaunenau.

33 Nau hith nananena hethadāgu hasehaunā daun hāneneehādaunenau, haddusevaveeneva nananena? hanau naneesedaugaunee wauwauchudauhuhauau.

34 Nau hith nananena hehaunagu daun hāneejauaunaudaunādaunenau, haddusevaveeneva? hanau wauwauchudauhuhauau nechau neehauhaugaunee wauwauchudauhuhau, hadnejanaasesedanuu.

35 Hau vechauthaa nananena haujauthavenau, nau het-hadeha hasedauna, nau hehānagu, jevajavathehāe; nau nana-nena haudaugautheavadenenau hadvasauau, nau nana-nena hadnaāedāeyaunenena Javaājauuthee: nau nenenee-haude nethāejevaveenenethe nau hauhauganau.

36 Hedauwuyaunee nananena, nananena Hāsaunaunenau jea hasedauwuyaunede.

37 Jevaauchuwuu, nau nananene hadnaajauchuwuhane: nau jevaduguthāe nau nananena hadnehauwuduguhuva: hejaegudanauwuyāe nau hadnejaegudanauwunane nananene:

38 Vāe, nau hadnevenana nananene, vavesethajauauthāe, dāayāe, nau dāesathāe, nau haunauwauauthāe, hauchauva,

henane hadvenāna. Nechau hadnaasethajauaudaunāna hasethajauauthānā hadnanesethajauaudaunana.

39 Nau hanaānadethaude haejejegausuhu, Gaunanenau-guhu jenenauājetha nanenauguhu? Gauhaudjenesauujane-senauau gauhanaa?

40 Thauguthāhe hehauwujavaāhe hechauhauthehādaune: hau haunauude hanesāde daun haunauudaunāde hathāhenith hechauhauthehādaune.

41 Nau naudu hanauhaudauwu nananene hahavaa heja-heede hesesāe, hau haājevesehau havadauhaude hathāsewau hasesāe?

42 Wauāthe hauddusenehethau nananene hahavaa, Jāedaā, hadaugauhauwunathe hajaheede hasesāe, hau daujenauhauwaude havadauhaude hathāsewau nehayau hasesāe? Nananene jayaudauwunaedehe, nedauau haugauhune havadauhaude hathāsewau nehayau hasesāe, nau hadenaāeneauvane hadenaāeneaugauhauwu jaheede hethāsathau hahavaa hesesāe.

43 Hanau hauhaude hethahagu hehauwuseaude wausaunee vevenaundenau; nau wauāthe wauchahagu hauhaude hehauwuseaude hethadenee vevenaundenau.

44 Hanau hadauchude hauhaude neaenaunede hanasaunee hevenaundenau. Hanau hauchahevesee henanenauau hehauwunaadauhauānuu hauuyauchuwunau nau dauchuuwusee hehauwunaadauguunee dadajevenau.

45 Henane hethāde hehethee hethadenee heda nenau-chaudede hethadenee; hau wauchāhede henane wausaunee heda nenauchaudede wausaunee: hanau waunauthaa hehethee hedahaa hede nanadenaunee.

46 Nau naudu, Vahadāhene, Vahadāhene, haesena, hau ne-jesedauna hayauhuhau hasenehethathana?

47 Daun nādasāde nau nedaunānaugu hasenehenaunauau, nau hesedauhuk, haudnauhauthehathana haudnethāde:

48 Henanene henee nenesedenethe hauauwu naathāde, nau henee nejayauchauhuu, nau naneejenanauau hauauwuu dasee hauunaugāe: nau nauunauuu naje neje naunauthuu jaathāsāe henee hauauwuu, nau hehauwunauauvathāau: hanau daunāaudaa hauunaugāe.

49 Hau jaathedehe, nau janenaasedauthe, naathāde henanenau henee nedasauauvānethe vedauauwuu; nau neje jaathāsāe naunauthuu, nau nauhauhaunee naunenauauau; nau thauwusāe henee hauauwuu nevasauau.

7

1 Wauhā hāevathanadede vahee hanasenehede daujajaathe-hade henanedanede, haejedā Capernaum.

2 Nau jasaa vanenenaja hewauwaune haevechautha haeaugauwune, nau haeyānajane.

3 Nau hāenedauwauthaude Hejavaneauthusaun, haeautheava vachaugananenau Jews, haeadetha hadjaunith nau hadnenayauhaunith hewauwaune.

4 Nau hāedauchauthee Hejavaneauthusaun, haeautheauwaunauthasanauau haugaunaunee, hanau hethāde naa henane naa haudneenesedaude, hathauhaugaunee:

5 Hanau vechaudauau nadedanenau, nau nenesedaunānauau vevethahenauauwuu.

6 Heee Hejavaneauthusaun hanaāejasesenethaunāde. Nau hāeouchauau hauauwu, vanenenaja haejajedauaunanenau henedaehauhau, Vahadāhene, jevawauchuthajau Nananene: haugau wauchāhenau hadjedāne naudauauwuu, hathauhuk:

7 Nanaa nāejewauchanavadede dauudasathane: hau vavade nehedau hanadede, nau naudautheau hadeenanedanede.

8 Hanau nananenau nanethenanenenau naunaudāhenau, nanethenu vanenanenauau, nau naāāedauwunauau hanesāde yehau nau naāejathāde; nau jasaa, Nahāje, hathauau nau jaunaude; nau naudautheau, Nesede, hathauau, nau nanesedaude.

9 Hejavaneauthusaun hāenedauwaudauau nuu hayauhuhau, haegauguanava, nau haenauthegauthaagu, nau hanaāāedauwunaude henanedanau hethāethauguhādaunau, Hadāedauwunathava, Haunauau nāhauwuveehau vasee hethauwuthajuhu (naa hathāde henane), hegau, hehauwuu haduu Israel.

10 Nau henee hathāautheavathē, hāejaenuusathee hauauwuu, haeveehanauau wauwaune haenanedanene henee neasauwauvāhenith.

11 Nau hethauwuu jasaa hese, hanaāehaude hedan Nain haseenaüyāgu; nau haewauthanenau hethauguhādaunau henethaunādaunau, nau hauwauhuu henanedanede.

12 Wauhā hāayānausade hejavaaa dajanaunaa hedan, naune, naa najaa henane naunudanade, jasāsau henaune, nau haenevesānene: nau haewauthane henanedanede hehethee hedan haenethaunaa.

13 Nau hāenauhauwaude Vahadāde haeauwunauna, Naje-naudāve, hathauhuk.

14 Nau haedasa nau haevasane nauaunechauthau: nau hethāenauaunechauhādaunau haedādauyaunenenau. Haunaua, hāedauwunathane, Thauwauthe, hathauhuk.

15 Nau henee nenajaa haethauwaudaugu, nau haenaāejasesanadede, nau hanaāevenaude henaunene.

16 Nau nāthajaude haedasā vahee: nau haevaveenethedau-nanauau Hejavaneauthu, Havathee haeyāhe hanejauaude hadedanene; nau, Hejavaneauthau haenauujādauna hene-saunau, hahagaunee.

17 Nau nuu dauauthedaunenede haenanadesanaune vahee Judea, nau nanadee gauānee vedauauwuu.

18 Nau hethauguhādaunau Jaun haeauthedaunaa vahee nuu hayauhuhau.

19 Nau Jaun haeadetha hanesenethe hethauguhādaunau haeyethautheava Hejavaneauthusaun, Gauhanane henee waudaudjaude? nau wauāthe gauhadnaudenuhauwau jasaa?

20 Hāedauchauthee henanenauau, Jaun Dusaayāhe janādautheavānauau Nananene, hathauhaugaunee, hanaāenaudedauthee, Gauhanane henee waudaudjaude? nau wauāthe gauhadnaudenuhauwau jasaa.

21 Nau vavade hāauchauau haenayauha haewauthanenau vavavāuhuhau nau havathee haugauwude, nau wauchāhenith haujaun; nau haewauthanenau nanenauguhuhau haevena nauhauthau.

22 Hejavaneauthusaun hanaāēdauwunāthee, Najajathāauau, nau hadāedauwunauva Jaun hathāhaugaunee, hayewhu hanathauhauthāna nau hathadauvana; hasejaenuhauthāde nanenauguhu, jeneejavesāhe daujavesade, naunaujaunee hedaugauwudaunenau dauuyaudahethee, hayājādāhe daunedauvade, gaujauaudahehe daujaethauwauthede, hadavenuhu hethadenee waunauyaunee dauauthedaunade.

23 Nau hauwunaunade daun najewauchuthajaudaunāde.

24 Nau hāejathāaunethe Jaun hedautheaunau, hanaāejasesanadedauau henanedanede hasenaedenethe Jauneau, Hayew nananena haewaunenauhauthaunenau nauaunee? gaugauguyāse daunauauvasee?

25 Hau hayew nananena hāewaunenauhauthaunenau? Gauhenane hedāchaunau hejajehaunenau hedāchaunau? Naune, nethāeneenuhuthee, nau neneenaedethee thanāsee nenauchuwunethe hedauauwunenenu.

26 Hau hayew hāewaunenauhauthaunenau? Gauhaeyāhe? Haa, hadāedauwunathava nananena, nau javaāsee haeyāhehau.

27 Naa nananene, wauthaunese, Naune, hadjejenanauau Naudautheau hathaaguna, hadnesedaunāna hauvaunenau sayānee Nananena.

28 Hanau nāedauwunathana, hadedanenu nethāenesaunevāna hesānauau hehauwujavaāse haeyāhe hathāde Jaun Dusaayāhe: hau hena haugajehede hanedauhuk henajanedanene Hejavaneauthu javaāhehuk.

29 Nau vahee henanedanede hathāenedaunāde, nau hauyāhehauau, hanaāechuwauthethajaudaunauthee Hejavaneauthu, haenethedusaanā dusaayāhew Jauneau.

30 Hau Nesethajauhuhauau nau nanavaavehehau yese nehayau haeausagudenuau hevathēhādaunene

Hejavaneauthu, haejenethedusaanā (Jauneau).

31 Nau Vahadāde hahagu, Hayew naudneedajenehethau henanedanede nuu henaedede? nau haethahenauthe?

32 Waude dāeyaunauauau hathahethee theaugunauthe hau-daunanauauwuu, nau danadethadethee, nau nanāhethee, Nevadauhana, hau nananena nejevadana; naudauwutha-jaudauwunana nananena, hau nejevewauhuna.

33 Hanau denausade Jaun Dusaayāhe dejevethee jauaujaunau nau dejevvanaa vasevenenaje; nau nananena nanethenaude haujaun, nethauna.

34 Heau henane daunausade dauvethede nau dauvanaa; Nauhauvaa naa henane naudaudāhe, nau vasevenenajevanehe, henedaehauhau hauāyāhehau nau wauwauchudauhuhau, nethauna.

35 Hau haeyaude chaunuwuthajaudaunaude vahee hedāeyaunewau.

36 Nau hanesāde Nesethajuhu haeadetha haud-jewaunenethevethhevāde, nau haeyehau haejedā Nesethajuhu hedauauwunene, nau haejanaugu hadvethede.

37 Nau, naune, hesā hedan, haeauhaugane, hāaenaunaude Hejavaneauthusaun daujanaugunith hadvethenith Nesethajuhu hedauauwunene, haejāchaude jaāvasaa chauayau,

38 Nau haetheaugu hegauwune heauthene haevewau, nau hanaāejasesahesadede heauthene heee hedejee nau haeheahenauwu heee henethaanene, nau haenedane heauthene, nau haechauane heee chauayau.

39 Wauhā Nesethajuhu hāadethaude hāenauhauwaude, hae-jaevenanadethade, Naa Henane, haeyāheyaugu, hanaenaunaude daunhadāhenith nau daunhathāhenith nuu hesāne hevasanādaune: hanau wauwauchuduhu, hahagu.

40 Nau Hejavaneauthusau hanaāēdauwunaude, Simon, haudnāedauwunathane nananene. Nau hanaāenehethaude, Hechauhauthethāhe, nanehe.

41 Hena jasia sayānedanauwuyau haenesenenau hesayānedanauwunādaunau: hanesāhenith yau-thaunevadadausauau vāejethā, nau jasia yauthauyauau.

42 Nau hāeyahuunee haunaudauhudaunene, hae-nanethauaunegudanauwuna nesauuu Jeāedauwune, hanaane hevechauthādaune javaānee?

43 Simon hanaāējaēdauwunaude, Nauchāe nananenith heneehejavaāgudanauwunaune. Nau hanaāēdauwunaude, Nananene neaenauwu.

44 Nau hanaāeyethaagude hesāne, nau hanaāēdauwunaude Simoneau, Gauhaunauhauwau nananene naa hesā? Nananenau nejedānau haudauauwuu, nananene hāehauwuvene

naje hee nauaudau: hau neheahesadede nauaudau hee hedejee, nau neheahenauau henethaa.

⁴⁵ Nananene hāehauwunedane hau naa hesā hāenauusanaunauau hehauwuthauujenedane nauaudau.

⁴⁶ Naudauguhua nauguu javeda nananene hajechauusānene hau naa hesā nechauanauau nauaudau hee chauayau.

⁴⁷ Naa hāedauwunathane nananene hewauchudaudenau waunauthanee gaunudanauwunade; hanau dauvechauthāde javaānee hau daun vanehaa gaunudanauwunade vavade hasevechauthāde vanehaa.

⁴⁸ Nau hanaāēdauwunaude hesāne, nananene hauwauchudaudenau jaegudanauwunane.

⁴⁹ Nau hethāenedauguvādaunau dauvethehethee hanaāejasesanadethee hegaugauuthajaudenenauau hanaa naa negudanauwau wauchudaudenau jea?

⁵⁰ Nau hanaāēdauwunaude hesāne, Nananene hadethauwaudaude henayauhāne nananene; najesa hadnauwauthenesane.

8

¹ Nau hethauwuu waunee haejathāu nanadee hadauchanene hedan nau hajasehedan, dauaunauthedade nau daunaunauhauthethāde neethajaude wau-nauyaunee hasaunee henajanedanene Hejavaneauthu: nau vadadauchunesenee haenethaunaa,

² Nau jasaa hesānauau, haenayauhau dewauchāhenethe haujaunau nau vavavāauhuhauau, Mare haseadagu Magdalene, naunudanavathe nesaudachu wauchāhenethe haujaunau,

³ Nau Joanna henene Chuza Herod hadāhevāhe, nau Sussanna, nau haewauthanauau hauthauauau, hevenādaunau hethāenetheyaunenenu.

⁴ Nau hāeneenawauthaa henanedanede dauauāchaudentee, nau haedasaa hehethee nanadee hedane, hanaāeanadede jegausauhānee:

⁵ Jenayāhe haewauneneāgude hejenayaunau: hauthauau haejajanesanau vaunaa; nau haeauguhudaunene, nau neahauhauau hejavaa haeaudauvanauau.

⁶ Nau hauthauau haedasegaugausanau hauunagāe; nau chauchaunu hāeveseeuu, haenadadanau, hanau daujenajenee.

⁷ Nau hauthauau haejajanesanau hegauau dauchuuwusee; nau dauchuuwuse haenauguveseaunau, nau haeajedau-nanā.

⁸ Nau hauthauau haegaugausanau dasee hadauuthadee vedauauwuu, nau haeveseaunau, nau haeneeaunau vadadausauau jenayaude. Nau hāenedauau nuu

hayauhuhau, haevasenehe, Daun henaudaununede, nanehanedauvade.

⁹ Nau hethauguhādaunau haenaudedauanaa, duthanau nuu jegausudede, hathāhuk?

¹⁰ Nau hahagu, Nananena vanenana haudnaenauwuna jaeyaunau henajanede Hejavaneauthau: hau hauthauauau janegausauhuthee; hadnenauhauthāthee havajenauhau-dauwu, nedauvahehauau havajaenauwu.

¹¹ Wauhā, heyew hasauau jegausudede: Jenayaunau hedenehede Hejavaneauthau.

¹² Henee vaunaa nanathee nenedauvathee; hanaāenauusade haujau, nau nedanauwunāthee hanadede hedahenauau, naseduhuu hethauwuthajauau, nau hadenanedanena.

¹³ Henee hauunaugāe nanathee, nanedauvanauthe nesedanuu hanadedaunau nauguu haunauwuthajau; nau nuu hehauwuthājenenauau, vanehaa nethauwauduu, nau nauauchaudaunauthe vasehadede naneenaunegauhuthee.

¹⁴ Nau henee nejajanesāe thauhauthauchauyauau dauchuuwusee nanathee, hanesenedauvanauthe, nanee-jathāuthee, nau neenadejethathee hee haunaunethau; nau nethauyādahede nau haunauwudaude, hee nuu henaedede, nau hehauwunauuchaudenauau vevenaundenau hadauuyauthaunee.

¹⁵ Hau henee hadauuthadenee vedauauwuu nanathee, hethauhahethee nau hethadenee hedahenau nenedauwauduu hanadedaunau, naunaunedethee, nau nenauchaudethee vevenaundenau hee jenauwauaunee.

¹⁶ Hegau henane, hāesedeauchauuu nauauuthayau, hehauwaugau hee vasenau, nau wauāthe hehauwujenane thānee hauvaa; hau nethānauau nauauuthayau neetheaugunee daun janedāde hadenauhau dauau nauauuthayāgu.

¹⁷ Hayewhu hehauwuyauthesa, haudjauthasenesee; wauāthe hayewhu hehauwuyau hadjaenaunee nau hadnejaunauau hauthasauau.

¹⁸ Haunauyauhau dauwu hanathadauvanā: daun nanethenaude, nananede haudnevenade; nau daunjanenethenaude, nananede haudnedanauwunade daun henetheyaunau.

¹⁹ Hanaāedasāde henaune nau henethesaunau, nau haeje-needasaa hee dauneethenedaunenee.

²⁰ Nau haeāedauwunaa jachau hathāhuk, Hānau nau hāthesaunauau theauguthee jathee, vanadaunauhauvānaune.

²¹ Nau hanaāauchuhananadede nau hanaāēdauwunaude, Nānau nau nāthesaunauau nuu nanathee nenedauwauduu hedanadedaunene Hejavaneauthu, nau naasedauthee.

22 Wauhā hethauwuu jasaa hese, haejedā thewaunaa nau-guu hethauguhādaunau: nau hanaāēdauwunaude, hadeyehau-nau hauchaunau neajee: nau hanaāejathethuauthee.

23 Hau hajechuauthee haenaugau: nau hanaāenuasaa neajee haenaudasa; nau haechauchaunane naje, nau haeanedaudauwugaujauaudahede.

24 Nau hanaāedauchauthee, nau haeauwardananauau, Hechauhauthethāhe, Hechauhauthethāe,* gau-jauaudāhenauau, hathauhaugaunee Hanaāethauwauthede, nau hanaāeneudauau hasāse nau dasenaunanaunee naje: nau hanaāedaunauuu, nau hanaāedādayauau.

25 Nau hanaāenehethaude, daude hadethauwardadenenau? Nau haenāthajaunauau haejenaunethajaunauau, Dauhuthenane naa, hanathadagaunee; haauchuwudede hasāse nau naje, nau hanaāethauwardaunāde.

26 Nau hanaāenuusathee vedauauwuu Gadarenes, hauchau-nau Gananee.

27 Nau hāeyehaude vedauauwuu, hena haenuchaunaa jathee hedan jachau henanene, haenethena haujaun dajechauau, nau haavedauauchauna, haejenaede hauauwuu, hau nedauthānavathe gaujauaudahehehau.

28 Hāenauhauwaude Hejavaneauthusaun haevasanade, nau haechaagujanaugudauna, nau hanaāevasanadethaude, Hauddusehathe, Hejavaneauthusau, Nananene Heau Hejavaneauthau javaājauuthee? Nenedauwunathane Nananene jevanaunauchauthehe.

29 (Hanau haenedauwauna wauchāhenith haujaun hadjenauahenith hehethee henanene. Hanau nauaunee dauhusedanāde: nau naunaunehade neduguhude heee vāejethāduguthaunau nau nesaunajethaunau; nau haegaugauchauagude heeduguhudaunau, nau haejathethasauaunaa haujaun hese nauaunee.)

30 Nau Hejavaneauthusaun haenaudedanaa, Haudusee? hathāhuk, Nau hanaāēdauwunaude, Waunauthade: hanau dewauthanethe haujaunau hethāchadaunādaunau.

31 Nau haenedauwunanauau hadjenesedauwaunathee hadjeyehauthee hethauvaa.

32 Nau hena haewauthanaauau neauthuwauchu nevethethee hauanee: nau haenedauwunanauau hadjenanāthee wauhaunee. Nau haejenana.

33 Hanaāenuahethee haujaunauau hehethee henanene, nau haewauhaunesanauau neauthuwauchuu: nau vahee neauthuwauchu haejat hegauhunauau neenane janahuu yese neajee, nau haevanadeavenauau.

* 8:24 Possible missing "h" in "Hechauhauthethā(h)e" ("Master").

34 Hāene henee nauchauwauthee daunauhauuu hasedaudenee, haedaugauhunauau, nau haejathāaunauau nau haeauthedanauau hedan nau vedauauwu.

35 Hanaāeyehaudenee hadnauhauwu daun hasedaudenee; nau haedauchau Hejavaneauthusau, nau haeveehau henane, heneenenauthāde haujaunau, haetheaugu heauthene Hejavaneauthusaun, haedāchaunene, nau haechuwuthajaune: nau haenāthajaudene.

36 Henee nenauhauwauthee haeauthedanauau neesenayauhade nenethenaude haujaunau.

37 Hadauchaa hathāauauvaa Gadarenes gauānee haejathethajenāhenauau; hanau dauusāhede: nau hanaāeyehaude nauauhuu jethee thewaunaa, nau hanaāejaesade.

38 Wauhā henane nenauthāde haujaunau haenehethaa hadnenethaunāde: hau Hejavaneauthusau haejathethajenāhe, hathauhuk,

39 Jaeyehau haudauauwu, nau hadnauhauthethā hathāenavasauau hayewhu Hejavaneauthau hasehāne nananene. Nau hanaāejathāaude, nau haeautheda nanadee hathāaunee hedan hathāenavasauunee hayewhu Hejavaneauthusaun hasehāde.

40 Nau hethauwu hāejaenauusade Hejavaneauthusau, henanedanede haeneethajaudaunaa: hanau hae-vadauyauhauwau.

41 Nau, naune, haejenauusa henane Jairus haseagu, nau hadāhevāhe vevethahenauauwu: nau haeuāneseve Hejavaneauthusaun heauthene, nau haedetha hadjewaunehedānith hedauauwu:

42 Hanau haenesāhene hedaunau wauau hanesenee jajenevāhe, nau haeayānajane. Hau hajesesade henanedanede haevauhaunaa.

43 Nau hesā haeevathaude nesenee jajene hee, hae-vathede haunauude hevāejethāwau hee naudaunehāhehau, nau haejenayauhau,

44 Haeedasa hegauwune, nau haevasane naunauchuu heduwune: nau chauchaunu haejenevathaude.

45 Nau Hejavaneauthusau hanaa navasanāde hahagu? Hāevahethedauwaudenee, Peda, nau hathāenethaunāde, Hechauhauthethāhe, henanedanede vauhaunane nau naneethenane, nau hanaa navasanāde, nesehene? hathauhaugaunee.

46 Nau Hejavaneauthusau, hanaadee vasanānu, hahagu: haenauwau daujasesenauau vadaude hehethee nananenu, hahagu.

47 Nau hāenauhauau naa hesā daujeyauthesee haejeyehau haeahenauau, nau hanaāechauāgujanau gudaunau,

haeauthedauna hauthasee vahee henanedanede
hathavasanaude, nau hasenayauhāde chauchaunu.

48 Nau hanaāēdauwunaude, Nauddau,
nanehāuwauthenaedene: nananene hadethauwuthajaude
henayauhāne nananene; najesa haunauwuthajau.

49 Hajesanadede, hena haejau hanesāde hehethee
hadāhevahew vevethahenauauwu, haeēdauwuna,
Haudauna najaa; jevajenaunevene Hechauhauthethāhe.

50 Hau hāenedaunāde Hejavaneauthusaun, hae-
naāēdauwunāde, jevanāthajau: hethauwuthajau vavade,
nau haudnenayauhade, hathāhuk.

51 Nau hāejedāde hauauwu, henanedane haejevadau-
jedāne, vavade Peda, nau James, nau Jaun, nau hene-
saunaune nau henaune hesāhedāeyaune.

52 Nau vahee haevewauhudaune, nau haeaudauwutha-
jahā: hau hanaāenehede, Jevavewauhuu; hehauwunaja,
nauthe naugauhude.

53 Nau haeauthauthanaau haevachunaunanauau, dauae-
naunauthee daunajanethe.

54 Nau haevanudana, nau hanaāedanaude hejadenene, nau
hanaāanadethaude, Hesāhee, thauwauthe, hathauhuk.

55 Nau hevadathuwu haejaedasa, nau haethauwauthe
chauchaunu nau hanaāenehede hadnauchauvavathe.

56 Nau henehā haegaudauwuthajaunenau: hau
haeēdauwuna hadjāedauvanethe henanedaa hasedaude.

9

1 Hanaāadethaude vadadauchu nesenee hethauguhādaunau
hauānee, nau haejaanauwuna naudahede nau hadvahe-
needauthee nanadee vahee haujaunaa, nau hadnenayaude-
thee haugauwude.

2 Nau haejenana hadnauthedaudauwunethe hena-
janedaunene Hejavaneauthu, nau hadnenayauhaunethe
hasauwauvahehehau.

3 Nau hanaāēdauwunaude, Jevaedanauwu hayewhu hee
hajavechaudenenu, daudause haugaudauhunau, daudause
newaugusajaānauthau, daudause jauaujau, daudause
vāejethā; daudause jevanesauguvechudaunaa.

4 Nau daun hauauwu hadaujedānā jenaadauna, nau je-
naathejathāauna.

5 Nau daun hajethauhauvādaunenau, hāenauahenā hena
hedane, hadegauyāējaheva naudauuyāgu hadneaenaunathee.

6 Nau hanaāejathāuthee, nau haeehedesanauau hauauwu-
dan, haeauthedaudauwu hethadenee waunauyaunee, nau
haevahenayauthānauau nanadee.

7 Wauhā Herod naja haenedauva vahee hanasedaudene-
nee heee: nau haejaene, hanau haenaasenedaunee gauuu,
henee Jaun jaegauhāde hehethee denajaa;

8 Nau gauuu, henee Elias naunauhauthethāde hedanayau:
nau hauthauauau, hanesāde dajechauau haeyāhehauau jae-
gauhāde.

9 Nau Herod haenehe, Jaun nedavaāsauau: hau hanaa naa,
nanedauwauthau? Nau haevadaunauhauva.

10 Nau vaduhanauau, hāejaenuusathee, haevahau-
thedaunaa hanasedaunethe. Nau hanaāedanaude, nau
hanaāejathāuthee hevenanee hesee hadaunechaudanee
hathauau hedan Bethsaida haseāgu.

11 Nau henanedanede hāaenuu, hanaāethauguhauthee:
nau haeesedana, nau haeauthedauna hasaunee
henajanedaunene Hejavaneauthu, nau haenayauha
hathāevadaunayauhathee.

12 Nau hāayānaesade, hanaāejenuusathee nesenee, nau
hanaāenehethāde, Nanehāejathāaudenee henanedanede,
hadeehaudenee hauauwudan nau vedauauwuu nauanee,
nau hadenethee, nau hadejasedauthee vethewau:
daunechaudaa hadaunauau.

13 Hau, Venaa nananena hadevethehedaunee, hathauhuk.
Nau hanaāāedauwunauthee, Hau nanethenauwunauau
hehauwujavaānee hayauthaunāe jauaujaunau nau
hanesethee nauwu; hanāyehaunee nau haunaudaunauhuu
vethewau heee vahee nuu henanedanede.

14 Hanau wauau haeyauthaune vasevadadausauau
henanenauau hanaadauchuthee. Nau hanaāāedauwunaude
hethauguhādaunau, Janauguhāa yauyauthauyauaugunauha.

15 Nau hanaasedauthee, nau haevajanauguhanauau.

16 Hanaāedanauau hayauthaunanenee jauaujaunau nau
hanesenethe nauwu, nau hanaāejenāauguaude hejavaa,
haevevethasa, nau haenaāejeanaauau, nau hanaāevenaude
thauguthāhehau haudjenanauwunethe hathaājedaunenee
henanedanede.

17 Nau haevethehedaune, nau haevahegaudaudene;
nau haeauānenau jeyauwaunau hathāenathaudāe nesenee
hanaadauchāe hanechauchaunāe nenethaudanee.

18 Nau hethauwuu, haenesenane, dauvevethahede, Het-
hauguhādaunau haenethaunaa: nau hanaāenaudedanaude,
Hanaa nenehede henaneda daunanenau? hathauhuk;

19 Hanaāauchuhananadethauthee, Dusaayā Jaun; hauhau-
thauauau nethee Elias; nau jasae nethee hanesāde da-
jechauau haeyāhehauau jaegauhāde.

20 Hanaāenehethaude, hau hanaa nenehede nananena dau-
nanenau? Peda hanaāauchuhanāedauwunaude, Chris Heja-
vaneauthau.

21 Nau haeneenadauduvā, nau haenesedauwaunā hadjāedauwunaunethe henanedanau henee;

22 Heau henane hadnasenede wauthanee hee hayewhu, nau hadnausāguthāde vachaugānanenau nau naja vevethahevahehauau nau wauthaunauhāhehauau, nau hadnaade, nau hadjaegauhāsanade nasese, hanathauhuk.

23 Nau hanaāevahāedauwunaude, Hith henaneda jethauguhānaugu nanehanaunauchauthehadede, nau jeedane henaugauchu hayauwusenenee, nau najeethauguhaa.

24 Daun haunaugaunayaudedede hedenaedede hadnanadede: hau daun hanadede hedenaedede hee nadanayau, nananede hadnenayauhadede.

25 Hauddusedau henane, vahesedanauaugu hathāauauvadenee, nau hanahadagu, nauwauāthe hausāguthadagu?

26 Daun naudauthedaunāde nau nadanadedauunau, nananenith Heau Henane haudnaudauthedaunaunith, hāenauusathe nehayau hadauvasāthanith, nau Henesaunaune hadauvasāthanith, nau vadanee hautheaunauau hadauvasāthanethe.

27 Hau hadethauwauthedaunathava hauthauauau theauguthee hede, haudnehauwuvajadauwu gaujauaudahede, haunaude haudnauhauuu henajanedaunene Hejavaneauthu.

28 Nau hethauwuu wauau hanasaudauche hāesenehede, Hanaāedanaude Peda nau Jauneau nau Jameseau, nau hanaāenauauhusathee hauanee hadnevevethahethee.

29 Nau hajesevevethahede haenauasāaune hedauchaveau haeanathadene, nau hedāchaunau haenaujaunenau nau haenauauggausauaunenau.

30 Nau naune haeanadethaa hanesenethe henanenau, hae-nanenenu Mosaseau nau Eliaseau;

31 Daunauhauthethāde hedanayau haenausāaune, nau haeauthedaude haudgaujauaudāde hadvathechauchau-naudedede hehethee Dādaunedan.

32 Hau Peda nau hethāenethaunādaunau haenauwauna-nenau: nau hāauwaudauaunethe, haenauhau dauwunenau henausāaude, nau hanesenethe henanenau haenethaugu-vaa.

33 Nau hethauwuu, hāenauthāde, Peda hanaāanadethaude Hejavaneauthusaun, Hechauhauthethāhe, hethadee hasanedaunee hede: nau hadenesedauna hasasāe nenaunau; hanesadee Nananene, nau hanesadenee Moses, nau hanesadenee Elias; haejaene daunhasenehede.

34 Hajesanadede, haejenausanau henaunauade, nau haeduguaunā: nau haenāthajaunaunauau daujedāthee henaunauadee.

35 Nau haejeanadede hahethēe hēnāunāudee, Nānānāde Nāvehāuthau Nāa: nēdāunāa, hāheagu.

36 Nau hāesanadede hēne, Hejavāneauthusau hāenesenāne. Nau hāeyāudēnāuau, nau hāejāedāuwunānāuau hēnānedāne hēnā hēsēe nēnāthāuhāudū.

37 Nau hēthāuwū, dāuauthēsēnēe, hāejejanāuhāsathēe hēhēthēe jāuādānēe, hāegāuhēnēnāu hēnānedānāu hējājedāuāunādāunēnāu.

38 Nau, nāune, hēnāne hēhēthēe hēnānedāa hāevāsānade, Hēchāuhāuthēthāhe, nēnedāuwunāthāne Nānānēne, dāugāuhāuwūne nāa: vāvādēnānēsāde nādāeyaunēve, hāthāuhuk.

39 Nau, nāune, hāujāun hēdānāde, nau chāuchāunū hāedāuyānade; nau hāethāuwūgūthāa hāevevehāuchāunāude jēdā, nau hāeāsēnēhāa hāejēchūwāuthēnāuthāa.

40 Nau nānānēnāu nēauthēawū hāthāughādāunāuau hād-nāusāgūthāuthēe; nau nējēnēdāuthēe.

41 Nau Hejavāneauthusau hānāāuchūhānānādēthāude, Hāu hāhāuwūthāuwūthājāu nau dāujēchūwāuthēnāedēne, hādēdāuhūjēsēnēdāugūvāthē, nau hādāuhūjēsēnēthāugūvāthē? Jāsēne nānānēne hāa hēde.

42 Nau hājēsējāude, hāujāun hāeāunēgūthāa, nau hāethāuwūgūthāa. Nau Hejavāneauthusau hāenēnēuva wāuchāhēnīth hāujāun, nau hāenāyāuhā dāeyaunāuau, nau hāejāevēnā hēnēsāunānēne.

43 Nau hāevāgāugāunādāuwū hāsēvasēnāudāhēnīth Hejavāneauthū, Hāu hājēsēgāugāunādū hāunāuude vāhēe hāyāuhūhāu Hejavāneauthūsāun hānāsēdāunīth, Hāeāedāuwūnā hēthāughādāunāu,

44 Chūwāuthēe nū hānādedāunāu jēdānāuhā hāunāudāunēnēnāu; hānāu hēau hēnāne hādvenāvāthē hējādēnēne hēnānēnāu.

45 Hāu hāejāenāuwū nū hāsēnēhēnīth, nau hāeyāudāunāunāuau, hāejāenāuwū: nau hāeēdāunāudēdāunānāuau hāsēnēhēnīth.

46 Hānāāegāugāuudēdāunēe, hānāādēe hādvasāthāa.

47 Nau Hejavāneauthūsāun, hāeāenāuwū hānāsēthājāuthēe hēdāhēnāuau, hāeēdānā dāeyaunāuau, nau hāeāuyējānāugūnā,

48 Nau hānāāēdāuwūnāude dāun hānēsēdānāude nū dāeyaunāuau nānēsēdāunāa hādnesēdānānāu: nau dāun nāsēdānāde hādnesēdānāude nājējēnānādāunē; dāun jāvāānādāvenūhēdē hāunāuude nānānēnā vāhēe nānānēde hād-nāēsēvāsāthāa.

49 Nau Jāun hānāāuchūhānāēdāuwūnāude, Hēchāuhāuthēthāhe, nēnāuhāuwāunāuau hānēsāde nēnūgūthāude

haujaunau hee haneseede; nau needauduwaunauau, hanau dauhujenethaunānauau.

⁵⁰ Nau Hejavaneauthusaun hanaāāedauwunāde, Jevadauduvaa hāhauwasānavāne nanesevānauau.

⁵¹ Nau hethauwuu, hāenauauchaunee hadneejejanauhudanāde, haechuwuyethaāne hadnehaude Dādaunedan,

⁵² Nau haeautheava sayānee: nau hanaāējathāaunethe, nau hāejedāthee hajasee hauauwudan Samaritans, hadnesaanudaunāde.

⁵³ Nau haejesedanaa, hanau dauyethaāsade Dādaunedan.

⁵⁴ Nau hāene hethauguhādaunau James nau Jaun daunauhaudauwunethe nuu, hanaāenehenethe, Vahadāhene, gaujevadaunedauwaune heseda hadjejanauhusanauau hehethee hejavaa, nau hadnevadauchauuthee, neesedaude Elias?

⁵⁵ Hau hanaāeyethaādausade, nau haeneneuva, Nana-nena hāhauwaenava daun vadathau nananena hadahena, hathauhuk.

⁵⁶ Hanau Heau henane hehauwuujau hadnenauadede henanedanau hedenaededaunenenu, hau hadnenayauhaude. Nau hanaāeyehauthee jasaa hajasee hauauwudan.

⁵⁷ Nau hethauwuu, hajesethaugudethee vau, jachau henanene hathāhuk, Vahadāhene, nananenu hadnethauguhathane nananene daun nananene hanasesanaune.

⁵⁸ Nau Hejavaneauthusau hathauhuk, Gauauwuauau neyāethee, nau neaheauau hejavaa nenauhuchaunethee; hau Heau henane heyauhuunee nedausevaānede.

⁵⁹ Nau hanaāenehethaude jachau, Jethauguhu, hau hathāhuk, Vahadāhene, nedauau nawaunejenanau nāsaunau.

⁶⁰ Hejavaneauthusaun hanaāāedauwunāde, Nanehajenauthee gaujauaudahehehauau negaujauaudāhenethee: hau jathāau nananene nau haddauthedaude henajanedede Hejavaneauthau.

⁶¹ Nau jachau jee, hathāhuk, Vahadāhene, hadnethauguhathane nananene; hau jechuwauthehe nedauau nawaunenaunenechauthaunauau, hanedauthee nayāenau naudauuwuu.

⁶² Nau Hejavaneauthusaun hanaāāedauwunāde, Hegau henane, dunauaugu thauauuwujethau, nau jaaāyangu, hehauwunaathā henajanedauene Hejavaneauthu.

10

¹ Nuu hee Vahadāde haeautheava hauthauau nesaudausauau jee, nau haeyeyethautheava hanenesenethe sayānee haunauude hedan nau vedauuwuu, haudnanādaunauusade.

² Henaheee hanaāenehethaude, Jenayaunau hethauwuwauthāe haneseuu, hau nesethāhehauau hajewauthathee: vevethahee nananena hee Vahadāde deseujenayaunau, hadejejenanaude nesethāhehau hejenayaunaa.

³ Jathāauau nananena hathaāsana; naune nananenau jane-nanathana neānee waude haudāsaunauau hejee hauchāhee.

⁴ Jevanewuunauwuu nesevāejethāwaunau, newaugusa-jaānauthau, nau wauaunau: nau jevanaunenāthedaunaa henane hauvaunenau.

⁵ Nau daun hauauwuu nananena hadaujedānā, Dādauyauha nuu hauauwuu, nedauau hadeva.

⁶ Nau hith heau dādaunee hanedaulyaugaune, nananena hadādaunahedaunenau hadnaadaudayānusaa: hau jene had-jaegauusedaunāna.

⁷ Nau vavade hauauwuu hadanedauva, hadevetheva nau hadevanava daun hayauhuhau hauchauvadenenau: hanau nesethāhe naunaudaunade. Jevaenejedāe hauauwuu.

⁸ Nau daun hedan nananena hadaujedānā, nau hesedanānagu, hadevetheva daun hayauhuhau hajenanauwunādaunenau:

⁹ Nau hadenayauhauva hasauwauvahehe daun hanedaude, nau hesau jeenanethāedauwunauna, Henajanede Hejavaneauthau hayāedasāna.

¹⁰ Nau daun hedan nananena hadaujedānā, nau jesedanānagu hadjajathāauva hasesana hehethee hadaugauchaudāe hauauwudan, nau hesau jeenanesenehethauna,

¹¹ Daudause nauthejahathaugu nananena hadedanaunau, heejahadāheagu, neyeseгаunuhudee nananena: hau nananena hadethauwaenava nuu, henajanede Hejavaneauthau hayāedasāna.

¹² Hau hadāedauwunathava, hadjavaānanethauauyauau hena hesee hee Sodom, javaānee hee hena hedan.

¹³ Naunauthauau hadnauauchaudauna, Chorazin; naunauthauau hadnauauchaudauna, Bethsaida; hanau havathenayauthau heheenesedaudeneagu jedauwuu Tyre nau Sidon, nuu hasehana nananena, dajechauau neaunaunevethajauduhewauchudaudenenu, needanaugudaunee neachuwaudenee naujuwau nau jaetha.

¹⁴ Hau hadjavaānanethauauyauau hee Tyre nau Sidon hāenaudedaunadedaunee, javaānee nananena.

¹⁵ Nau nananena, Capernaum, hanejanana yesee hejavaa, hadjaejanauhanee yesee hadauveeyauau.

¹⁶ Daun hajaathehādaunenau nananena hadjaathehānau; nau daun hauwauchānavādaunenau nananena

haudwauchānavānau; nau daun nauwauchanavāde hadwauchanauwaude najejenanādaune.

17 Nau nesaudausauau haejaenusanauau nauguu neethajaude, hanaāēdauwunauthēe, Vahadāhene, daudause haujaunauau hanechauwauaunaunauau hee nananene haneseede.

18 Nau hanaāēdauwunāthee, Nenauhauwauau Haujau waude jahagude hasejanesaa hehethee hejavaa.

19 Naune, Nananenau vanenathana nananena naudahede hadnauguhudaunauna seseyānauau nau hauwauhaudathee, nau nanadee vahee henaudahede haujau: nau hegau had-neaseneva.

20 Hau vahee nuu jevaneethajaudauwuu, haujaunauau dauuchauwauaunauna; hau henauthauneneethajauau hanau nananena haneseedaunenau dauwauthaunauhuu hejavaa.

21 Hena hāauchauau Hejavaneauthusau haeneetha-jaune hevadathuwu, nau hanaāenehede, Nananenau vaveenethedaunathane Nananene, Hau Nāchau, Vahadāhene hejavaa nau vedauauwuu, hanau Nananene dauyaudau-naude nuu hayauhuhau hehethee nadaunahehehauau nau hathauwunanenauau, nau hadnauhauthehauva dāeyaunauauau: hethauwuu, Nāsaunau; waude hethadee nananena hasesānenau.

22 Vahee hayauhuhau vanenānau Nāsaunau: nau hegau henane haenauna hanaadāne Heāhene, vavade Vāsaunau; nau hanaadāne Vāsaunau, vavade Vāa, nau nananede hanaadāne Heāwaune hadnenauhauthehāde.

23 Nau hanaāējaedaugauhauwaude hethauguhādaunau, nau hanaāanadethaude hevenanee, Haunauwuthajaunauha hasesānenau dauhunauhauwuna hayauhuhau hānauhauthaunenau:

24 Hanau nananenau hāedauwunathana, waunauthathee haeyāhehauau nau nenauchuwuthee nevadaunauhauduu hena hayauhuhau hānauhauthaunenau, hau hehauwuthau-unauhauwuu; nau devadaunedauwauduu hena hayauhuhau hānedauwauthaunenau, hau hehauwunedauwau-dauwu.

25 Nau, naune, jasaa nanavaavehe haetheaugu, nau haenaundayādauna, Hechauhauthethāhe, nauddusedane jethauujenee henaedede? hathauhuk,

26 Hanaāēdauwunāde, Hayew wauthaunesaa nanavaavedaunaa? Hādusasauhaude nananene?

27 Nau hanaāēdauwunaude, Nananene hadvechauthau Vahadāde nananene Hejavaneauthau nauguu vahee nananene hadahaa, nau nauguu vahee nananene hadāhedaunaa, nau nauguu vahee nananene haugaugauthajaudenaa; nau

nananene hanedaudewau waude nehayau nananene.

²⁸ Nau hanaāēdauwunaude, Nananene hethauvāne: nane-hasedaune, nau nananene hadnenaedene.

²⁹ Hau nananede, vanadauchuvanadede, hanaāenehethaude Hejavaneauthusaun, Nau hanaa nanedaudewau? hathauhuk,

³⁰ Nau Hejavaneauthusau hanaāauchuhanāedauwunaude, Jasaa henane haejathāau hehethee Dādaunedan hese Jericho, nau haeesedanaa havedehau, haethauwujedaunaa hedāchaunau, nau haenesenehaa, nau haejathāaunenau, haenauthaa dauhayānaja.

³¹ Nau haejathedasa jachau vevethahevahew hehethee: nau hāenauhauvāde, haejavechauthaa gauchuhunee.

³² Nau vavade Levite, hāedadauau hadaunith, haeeda sa* nau haenāauhauva, nau haejavechautha gauchuhunee.

³³ Nau jasaa Samaritan, daujādade, haedasa hadaunith: nau hāenauhauwaude haeauwunauna,

³⁴ Nau haeyehau, nau haedugudauna hadaunenesenith, haeedaunauwuna javeda nau vasevenenaje, nau haedasana nehayau hedauneau, nau haenauchauha vethehedaunauauwuu, nau haeunauneha.

³⁵ Nau daunauganenee hāejathāaude, haedane hanesanenee hevāejethāwau, nau haevana hadāhevahew, nau hadaunaunehau, hathauhuk; nau daun hasegau-jauauthedanānaune jee, hāejaenauusanaune nananenau hadaunaudaunathane nananene.

³⁶ Hayewnau nuu hanasāe, hadeanathaunau, henedaudevādaune henee neesedanāde havedehau?

³⁷ Nau hanaāēdauwunaude henee heauwunaunādaune. Hanaāenehethaude Hejavaneauthusau, nau jenaenesedaune nananene.

³⁸ Wauhā hethauwuu, daunausujavesathee, haenauusanauau jasaa hajasehauauwudan: nau jasaa hesā haseagu Martha haejedana hedauauwunin.

³⁹ Nau haenahavāe Mare haseeyaugaune, jea haejanau-gude Hejavaneauthusaun heauthene, nau haenedauwaude hedanadedauunene.

⁴⁰ Hau Martha haedauwauchune dauwauthanee hasedaude, nau haejeedasa, nau hanaāenehethaude, Vahadāhene, gauhajegaudauvanade daujenauthānau nahavaa daunesenesethānau? hāedauwunene hadenedahevānau.

⁴¹ Nau Hejavaneauthusau hanaāauchuhanehethaude, Martha, Martha, nananene haunaunāhene nau dejanethajaudauwu waunauthāe hayauhuhau:

* **10:32** Two words across a page (“haeeda” and “sa”) perhaps should have been hyphenated, giving “haedasa” which, together with “haedasaa”, occurs eleven times elsewhere in the text. There are no other occurrences of “sa” standing alone.

42 Hau hanesadee hayewhu chaunauguauau: nau Mare hayāchauhauau henee hethadenee hadāde, hehauwuneejathechauhau nauthee.

11

1 Nau hethauwuu, henee, daunausuvevethahede haedaunanenee, hāejenedaude, hanesāhenith hethauguhādaune hathāhuk, Vahadāhene, jeechauhauthehāa had-nesevevethahee, waude Jaun jea neesechauhauthehaude hethauguhādaunau.

2 Nau hanaāēdauwunaude, hāene nananena vanevethahenā jeenanesenehena, Hāsaunaunene Nananede hanedaude hejavaa, Vadanauha Nananene haneseede. Nananene hanajanede hanājaunauau. Nananene hathanavāane hadnaasedaunee hasauau hejavaa, nau jee nuu vedauauwuu.

3 Hejevenāa hadaachusenee hayauwusenee vethewau.

4 Nau jejaegudanauwunāa hewauchudaudenedaunau hanau nechau nejaegudanauwunade haunauude hanesāde nethāesayānedanauwunāade. Nau jevaechauhāa nedauvasehadee; hau haugaunayauhāa hehethee hadau wausauau.

5 Nau hanaāēdauwunaude, hanaa nananena hadnenedae-hahede, nau hadneyehaude thaudajaa, nau hadethaude, Va, jeehe hanasāe jauaujaunau;

6 Hanau nādae daunauujādaunānau, nau nananenau haeyauhuunee nachauwaude?

7 Nau hehethee jedauwuu hadnauchuhanehede nau hadnenehede, Jevajanethajuhu: dajanau wauwu haugauhude, nau nanesaunauau nanejauwu naudauvaa;* nananenau nāhauwuneethauwauthe nau hajeneevenathane.

8 Nananenau hāedauwunathana, hadnehauwuthauwau-thene nau hadvenāde hanau dauhunedaehāwaude, auhanau daunenāhede hadthauwauthenith nau hadvenāde daun hadauchuvathehāthe.

9 Nau nananenau hāedauwunathana, Henedauwauau, nau hadnevenana; henaudethāe, nau hadneveedena; hewaūdāhee (dajanau), nau hadnegaunedanauwunana.

10 Hanau haunauude hanesāde nethāenedauwaude neneau-dauwaude; nau henee nenaudethāde neveenauau; nau he-nee newaūdāhaude (dajanaune) hadgaunanauwunade.

11 Hith hāahenau nedauwunānagu jauaujaunau jasaa nana-nena henesaunaune, gauhadvenaa hauunaugane? wauāthe

* 11:7 Mid-verse punctuation could be either a colon or semicolon as the lower part of the punctuation is malformed. It was decided to use the semicolon, in line with the KJV, as the punctuation of the two texts often coincides.

nedauwunāhuk nauwu, gauhadvena hauchuhanee gauhadnanene nauwunenith seseyāne?

12 Wauāthe nedauwunāhuk naunau, gauhadvena hauwauhaudanethe?

13 Hith nananena, hauhauganenagu, hadaenava hadnesevenauna hethadenee venadedau nau nananena hadāeyaunevenau: duthāee nananena hejavaa Hāsaunaunenau hadvenāva Vadanauwauthauwu nethāenedauwunauna?

14 Nau neausāguthaude haujaun, nau heehauwanadene. Nau hethauwu hāejathāaude haujau, hanaāejaanadede; nau henanedanede haegaugauuthajaudene.

15 Hau jasaa hahagu, Nausāguthaude haujaunau heee Beelzehub najane haujaunaa.

16 Nau hauthauau, haenaudayādaunaa, haenehethaa hadnauhauthaudenenee hehethee hejavaa.

17 Hau haeaene hedenethajaudenene, haeāedauwuna, Hadauchaa najanede nanayāsenauaugu nehayau hadneyauhuu; nau hauauwu hasānavadenu hauhauwu hadjanesaa.

18 Hith, Haujau jea hasānavadagu, hauddusetheaugune henajanede? hanau nananena denehena nananenau deausāguthaugaunee haujaunauau hehethee Beelzebub.

19 Nau hith nananenau hausāguthaugaunee hehethee Beelzebub haujaunauau, hanaa hāahenu hadnausāguthaude? hadedauchuwuna.

20 Hau hith nananenau hejadenethedaunagu Hejavaneauthau hausāguthaugaunee haujaunauau, hethauwu henajanede Hejavaneauthau hedaasāna.

21 Henane danāahethe hedauchauunau haunaunedehuk hedaauwu, hevatheyaunau nedādauyaunee:

22 Hau hāejavaādāāhenethe javaāhehuk hedaasāhuk, nau veavehāhaugu, hadnedanauwunāde vahee hedauchauunau heanadauwaudenau, nau hadjaanenee hesehaudenau.

23 Daun najenethaunāde hasānavānu: nau daun najenethauāyāvāde naneāsauauwaude.

24 Hāenauthaethe wauchāde haujau henanene, nehedesade hadaujenajenenee, denaudedede dauyānusenade; nau janeevedethe, naneenehede, nananenau hadjaesanau nau dauauwu needaujenauahenu.

25 Nau jaenauusathe, nevedede nesewaudeauhunee nau neyauthaunenee.

26 Naeneejathāaude, nau naneedanauwaude hanesaudauchunethe hauthauau haujaunau javaānauhauganenethe javaāhede; nau nanejedāthee, nau nanejanauguthee: nau waunee henee henane naeneejavaānauhauganede nedauaunejeethāde.

27 Nau hethauwuu, hajeseanadede nuu hayauhuhau, jasaa hesā hehethee henanedaa haevasanade, nau hathauhuk, Hauwunaunade henesaunehe hājanesaauthāde Nananene, nau hethanau nedaunenane.

28 Hau hahagu, Haa, nausunee, nauwunaunathee nethāejaathededuu hedanadedaunene Hejavaneauthu, nau naunaunedethee.

29 Nau henanedanede hāeneenanauthenanedauhuu, hanaāejasesenehede, Nuu nanaa wausauau henaedede: nevadaunauhauthāthee; nau hegau nauhauthaude hadvenaunauau, hau vavade nauhauthau nananede Jonas haeyāhe.

30 Hanau Jonas neesenauhauthaude Ninevites, nechau jea Heau henane hadnaathāde nuu henaedede.

31 Nenauchuwusā janauhuu hadjaegauhāde naudedau-nadenesee nauguu henanenau nuu henaedede, nau had-nauthauwuvāna: hanau dejewaunejaatthehaude hehethee hāauauvadenee naunaudāhenith Solomon; nau naune, he-javaāhedaune Solomon hanedaunith.

32 Henanenauau hehethee Nineveh hadjaegauhāthee naudedau-nadenesee nauguu nuu henaedede, nau hadnauthauwuvāna: hanau dauaugauthethajauduu hedauthedaunene Jonas; nau, naune, hejavaāhedaune Jonas hanedaunith.

33 Hegau henane, hāesedeauchauuu nauauuthayau, hehauwujenane yauthee, daudause hehauwugaudauyau-vasenaunaa, hau dasee nauauuthayauneetheaugunee, nethāejeđāthee hadnenauhauuu naunauasādane.

34 Hanesenee vadanayannaa nanaa nevasesānee: nanaa hāenesadee hasesānenau nananena, nananene hadnaunauudauyauau hadanayau jea hanechauchanaa hese; hau hāene nananene hasesā wausuu, hadanayau jea hadnechauchaunaudene vaneeyauau.

35 Haunauyauhauwauwau hanau henee hesee hathāsadaude nananene jeva veeyauha.

36 Hith nananene haunauudauyaugu hadanayau hanau hadnechauchaunaudene hese, hadnehauwugauuveeyau haunauude hadnechauchanaa hese, waude naunauasādāe nauauuthayau nevenāna hese.

37 Nau hajesanadede, jachau Nesethajauhu haedethaa hadnethevethewau: nau haewaunejedā, nau haejanaugu dauvethede.

38 Nau hāene Nesethajauhu nauhauwauu, haegaudau-vanava daujaheseuhunith nedauau hajesejevethenith.

39 Nau Vahadāhenith hathāhuk, Hewaunehaa nananena Nesethajauhuhauau neyauthahenauwuna jathee vāenaunau

nau saenaunau; hau nananena hethauvaa hanechauchau-
naudena vahedayaude nau hauhauganede.

40 Nananena janethauvahena, gaujenane Hejavaneauthau
nenedede jathee gaujee henesede jedauwuu?

41 Hau hevāe hauwuyau daun hanetheyaunenau; nau,
naune, vahee hayauhuhau hadnesewaudeanauwunana?

42 Hau naunauthauau hadnedasāna nananena
Nesethajauhuhauau, hanau nananena hadvāna vadadauchu
wauhaunauau nau naneujaudevejechau nau vahee
hathāejajāesuū vejechau, nau hadjavechoudauwuna
vavesauchuwude nau devechauthade Hejavaneauthau;
nuu hāvachunaasedauna, nau hānanejenaudauwuna hauthauau
nejesehee.

43 Naunauthauau hadnedasāna nananena Nesetha-
jauhuhauau, hanau nananena devechoudauwuna
najatheaugudaunau jedauwuu vevethahenauauwuu, nau
dejachauthana nedauaudaunauvadee.

44 Naunauthauau hadnedasāna nananena, wauthau-
nauhāhehauau nau Nesethajauhuhauau, nanadaunahena,
hanau nananena waude nedaugaudauyauhudaunee
dejenauhauwuu, nau henanenauau nedasejavesathee
hehauwaenaunā.

45 Hanaāauchuhananadede hanesāde nanavaavehe, nau
hathauhuk, Hechauhauthethāhe, nuu dauhanadene
nananene naunaunauthevāana jea.

46 Nau hathāhuk naunauthauau hadnedasāna nananena
jea, nananena nanavaavehehauau, hanau nananena
henenauchuna henanenauau nauguu henenauchude
hehayaudee javechauhunee, nau nananena nehayau
jevavasanauwuu henenauchudaunau heee hanesadee
nananena hajadenenau.

47 Naunauthauau hadnedasāna nananena, hanau
nananena denesedaunauna gaujauaudahenauauwu
haeyāhehauau, nau hāsaunaunenau denauauthee.

48 Hethauwuu nananena haeyāna henee nananena
wauhaunee nanāsedauthee hāsaunaunenau: hanau
denauauthee, nau nananena nenededena hegaujauauda-
henauauwunenau,

49 Naasauau jea hahagu hedaeyaude Hejavaneauthau,
Hadjenanu haeyāhehauau nau vadauhanauau, nau hau-
thauau hadnenaathee nau hadnenaunaunauchauthathee:

50 Henee hevaevenau vahee haeyāhehauau,
hanedaunee hehethee davadeesehee vedauauwuu,
hadneenaudedauwuhuu nuu henaedede;

51 Hehethee hevaevaa Abel nauuu hevaevaa Zacharias
henee nenajaa nahethāe jaanaa nau vadannauauwuu:
hethauwuu nananenau nehethathana nananena,

hadneenaudedauwuhuu nuu heee henaedede.

⁵² Naunauthauau hadnedasāna nananena nanavaavehehauau, hanau nananena dauhudanauwuna gaunaudauauha haeyaude: nananena hadnehauwujedāva nehayau, nau heene hathāejedāthee nananena najauaunauna.

⁵³ Nau daunenehedauau nuu hayauhuhau yese, wauthaunauhāhehau nau Nesethajauhuhauau hanaāejaseseneenanaudedauwunāde, nau haeneenadaunanaauau hadnauthedaudauwunith hauwauhuu hayauhuhau;

⁵⁴ Haeaudenauthaa, nau hadnesedanauwunethe hayewhu hehethee hedenene, hadnāedauwauthauthee.

12

¹ Gaunauwuu, hāene hena hauāchaudenee hauānee haejedaguu hadaucha henedanede, dauwauthaa haeauauguhudaunadenauau, hanaāejasesāedauwunaude hethauguhādaunau nedauau vahee, Haunauyauhau-dauwauau nananena gauhaujau Nesethajauhuhauau, nenadaunahethee.

² Hanau hehauwuyauthesa, hathāeyauthesaa, daudause hehauwuyauthesa, nethāejaenaunee.

³ Hanau daun nananena hasanadenā veeyaugu hadnedauwuhuu hesenee; nau henee nananena hasenehenā waunaudaunuu jedauwuu hadnauchunana dasee hauauwuu.

⁴ Nau nananena hāedauwunathana Nādaehauhauau, Jevae-saa henee nenadethee henededayāhau, nau heee hehauwau-thesedaunauau.

⁵ Hau nananena hāedauwunathana daun nananena hāchaunenau: Hesaa Naa, heee hesenaānagu naunaudāde hadgauusevāna hadaugauhauchanee; haa, Nananenau hāedauwunathana nananena, Hesaa.

⁶ Hayauthaunethee hajaseaheauau gujeaudaunaune heee hanesāene nevaāhenee, nau hanesāde hehauwunauneethedaunā Hejavaneauthu?

⁷ Hau daudausee hadauchāe hāthaanenau haudauguhua-nenau vahenayāee. Jevanāthajauau henaheee: nananena javaānauwauhuana hadauchtuthee hajaseaheauau.

⁸ Jea Nananenau hāedauwunathana, Daun naujau-dauthehāde hesee henedada, nananede Heāhene henenene jea hadnehauwaudauthehaa hesee hautheaunau Hejavaneauthuu.

⁹ Hau henee nauyauhāde hesee henedada hadneyauhade hathāhenethe hautheaunau Hejavaneauthuu.

¹⁰ Nau daun hayādaunaude Heāhene henenene, hadjaegudanauwunade: hau nananede henee hanauganedauau Vadanauwauthauwu hadnehauwujaegudanauwunau.

11 Nau hāejedanānā vevethahenauauwuu, nau hauchuwu-nanenauau, nau najanauau, jevagaugauanadauwuu wauāthe daunhayewhu nananena hadnesauchuhanehena, wauāthe daun nananena hadnesenehena:

12 Hanau Vadanauwauthauwu hadnāedauwunāna nauauchaugu daun nananena hadnesenehena.

13 Nau hanesāde hehethee hananeda hathauhuk, Hechauthethāhe, hanadesene nasaa, hadegaugauanauwaunauau vatheyaunau.

14 Nau hathāhuk, Henane, hanaa nanesehāde hadnauchuwuhathane nau hadjaanauwunathane nananene?

15 Nau hasenehethauhuk, Haunauyauhaudauwauau, nau naseduhuu jevavathehāe: hanau henane hedenaedede hehauwunedahevaa wauthayāgaune hevathayaunau henetheyaunau.

16 Nau haeanadetha haejegausudenanadetha, Vedauauwuu jasaa nethauyāsenane haenauthauthā:

17 Nau hasethajauhuk nehayau, hewauau hauaud-nesedaunaune, hanau hajanethenauwau jedauwuu hadnedauthānauwau navethenau, hahagu?

18 Nau hanaāenehede, nuu hadnaasedaunau: hadthauwunauwau nathāyānauauwuu, nau hadnesedenau hadjavaāvasauau; nau hadnaadauthānauwau vahee navethenau nau navathayaunau.

19 Nau hadnaāenehethauau navadathuwu, Vadathau, nananene nanethenauwuu waunauthāe hanetheyaunau janee hadwauthāe jajene; hedanau nanethauaunenaedede, hevethēhe, hevaveyā, nau haunauwunaede.

20 Hau Hejavaneauthu hathāhuk, Nananene Hauhauga, nuu dauveeyauau nananene havadathuwu hadnedauwunane: hee hanaa hadnethenauau hajanayaunau?

21 Nananede haenathaunau heveaunauaudenau, nau hehauwuveaunauau hese Hejavaneauthu.

22 Nau hathauhuk hethauguhādaunau, Naa nehethathana, Jevaegaugauanadauwuu hadenaededaunenau, daun hadnevethedaunenau; daudause hee hadanayaunenau, daun hadnāsaunenau.

23 Henaedede javaāsa vethevaa, 23 vadanayau javaāsa hāchaunaa.

24 Gaugauanavaa huunauau: hanau dejejenayāthee nau dejegauausauhāthee; hehauwunethenauwuu thāyānauauwuu nau vethewau nedauthāsanenee; nau Hejavaneauthau nachauwaude: gauhajavaāneenaedeva neahenaa?

25 Nau hanaa nananena vanadauanāde hee neejahehe?

26 Hith nananena wuhā jeneenesedaunagu hene haugajuhuu, naudu hajanethajaudauwuna hauthauau?

27 Gaugauanadauwuu nenaugaānuu nejajaesaānuu neseveseuu: hehauwunesethānaunau, hehauwunethau-dayānaunau; nau nausunee nāedauwunathana, henee Solomon vahee hevasāthade heehauwunaasenu hasaunee nuu.

28 Hith wauhā Hejavaneauthau heneenudehuk wauchuu-nau, nuu desenee nauau, nau naugaagu hadneewaude-dau-naunee; hāduthāējavaāvenāva hāchaunau, Hau nananena vane-haa hethauwuthajauna?

29 Nau jevanaudedee nananena daun nananena hadnevethedaunenau, wauāthe daun hadnevaveyādaunenau, jevaaugaugauuthajauau.

30 Hanau vahee nuu neauthudan hathāauauvaa nenaude-thāthee: nau nananena Hāsaunaunenau haenauau henee nananena hāvathehādaunenau nuu hayauhuhau.

31 Hau henaudedee nananena henajanede Hejavaneauthau; nau vahee nuu hayauhuhau hadnethedaunanauwunana nananena.

32 Jevanāthajauau, hāhauwuwauthaheva; hanau nananena Hāsaunaunenau hayethanadauwunādaunenau hadvenāna henajanede.

33 Heaundaunaa henee hanetheyaunenau, nau hauwunau-naa hadavenuhuhauau; jasedauau nesevāejethāwaunau henee nejethauuthauauchusāe, haenathaude haneduu hejavaa henee nejethauuyauhuu, nedaujavedadenee, hehauwujuu-denauau nuvanauauau.

34 Hanau haduu hadaenathaunenau, hena hadahenau jea hadnaaduuu.

35 Duujehee, nau haunauauuthayaunenau gauhauchanauha;

36 Nau nanehathahena henanenauau henee nedauyauhauwauthee hanau Hadahethedaunādaunenau, hāejejaesathe hehethee gauwuhaude; henee hāejenauusathe nau hadwardāhaude, hadgaunanauwunade nauhauhaunee.

37 Hauwunaunaa henee nesethāhehauau nananenethe, Vahadāde hāejenauusathe hadveenaude hadnaunauyauhau-thānethe: hethauwāedauwunathana, haddujede nehayau, nau hadjanauguhaude hadvethenethe, nau hadjeedauchaude nau hadnaunauchauwaude.

38 Nau hith jenauusahek naneseauwaude haunauyauhauthāhe, wauāthe jenauusahek naneseauwaude haunauyauhauthāhe, nau hadveenaude hadnesaanunethe, hauwunaunaa henee nesethāhehauau.

39 Nau nuu hāenauwuu, henee hith henane hedauauwuu haenauaugu daun hāauchaunee havedehew neenauusanith, haunauyauhauwaude, nau hanājechuwauthedaunenauhunee hedauauwuu.

40 Nananena hadnaaesaaunana jea, hanau Heau henane

hadnauusade daun hāauchaunee hāejenuanauwaunā.

41 Peda hanaānadethaude, Vahadāhene, gauhanadethāa Nananene nuu heee jegausudede wauāthe vahee?

42 Nau Vahadāde hahagu, Hanaa henee chuvahagu nau hesenaedehuk hadāhevāhe, nananede hadāhewaunādaune, hadn-evenaude gauuu vethewau nauauchaunee?

43 Hauwunaunaa henee nesethāhe, nananenith hadāhewaunādaune hāedasāthe hadveehāde hadnaasehāde.

44 Hethauvaa hathāedauwunathana, henee hadnesehāde hadāhewaude vahee hethāenetheyaunau.

45 Hau nau hith henee nesethāhe hesethajauhuk, Nadāhewaunāde jeguthenauusahek; nau henene-segauhahek henanenau nesethāhehau nau hesānau, nau hevethehagaunee nau hevaveyāhaugaunee, nau henaunauneseavagaunee;

46 Hadāhevāhe henee nesethāhe hadnauusanith hajesesenenee hāejEAUWUWUHAUthe, nau, neejaenauau, nau hadgudanāde nau hadjenanaude jethauwaudahehau.

47 Nau henee nesethāhe haenauaugu hadāhewaunādaune hathanavāde, nau jesaanuhuk, daudaus dejeesedaude hathanavāthe hadnenenesegauhude dejauaunee.

48 Hau henee jaenauaugu, nau hesedauhauk nesene-seguhedaunenee hanājEAUWUWUHAUthe, hanau daun hauwauhuvenāde nananede hadnauwaunedauwunade; nau nananede henane hauwauhauhauthade, nananede hadnauwaunedauwunade.

49 Hadjejenanauwau heseda dasee vedauauwuu; nau hayew navathehāde wauwu gauhauchagu?

50 Hau nanethenauwau dusaahede hadneedusaa-hedaunee; nau hanahauwaudauaunānau haunaude hesedaudeyāgu.

51 Haneējaude hadjenanauau dādaunee vedauauwuu haāthanaveva? hadāedauwunathava, Hegau; hau wauāthe hanāgauanauwau:

52 Hanau hehethee heee yauthaunenanaedauneagu hanesadee hauauwuu hadgauanee, hadnasaunauthee hanesenethe, nau hadnesaunauthee hanāenethe.

53 Henesaunaun hadgauanathee hadnasānauwaude heau, nau heau hadnasānavāde; hesā hadnasānauwaude hedaunau, nau hedaunau hadnasānavāde, hesā hesave hadnasānauwaude, nau hesave hadnasānavāde.

54 Nau hanaānadedauau jea henanedanede, hāenauhaudauwunā henaunauade jevechauuchaugu hehethee nesenaesade, chauchaunu nananena, Hadnauchuhajauwausauau; nau naenesauau.

55 Nau hāenauhaudauwunā jenauhuu hanehedasāe, nananena, hadnasedaa; nau naenesauau.

56 Nananena nanadaunahena, nananena naenauwuna hedauchaveau haunauau nau vedauauwuu; hau dusaudee haejaenauwuna nuu hewaunehaa?

57 Haa, nau naudu daudause nananena haejaenauwuna hasethadee?

58 Hāeyehauthānā hasānavādaunenau hauchuwunanenau, nausujavesanagu, nayātheneneevaa hadeenayauhāna; havaehauthāva najanauchuwunanee, nau najanauchuwunane havavena duguthāhew, nau duguthāhe havathānāva duguthānauauwuu.

59 Hāedauwunathana havajeneenauthauva, haunaude vathaunaudahunagu havāejethāvenau.

13

1 Hena hethaa hee jachau haeauthedaunaa Gananeans, hevaewu Pinade haewauhaunauwuaunenau nedauausāyāthee.

2 Nau Hejavaneauthusaun haeauchuhananadethā, Nauchāe nananena henee nuu Gananeans heauhau-gayaugaunee javaānee vahee Gananeans, hanau daujeneethajauduu hayauhuhau?

3 Nananenau nāedauwunathana, Hegau: hau, vavade nananena jaugauthethajaunagu, nananena hadnavahethahena gaujauaudahede.

4 Wauāthe hena nasaudauchunee, dasee hayauauwuu jedauwuu Siloam dethauwunauauau, nau haenanaā, gaugauanadauwuu henee gauhujavaānauhauganenauau vahee henanedanede henee theaugude jedawuu Dādaunedan?

5 Nananenau nāedauwunathana, Hegau, hau vavade nananena jeneethajauhadede, nananena hadnavahethahena gaujauaudahede.

6 Haeheanade jea nuu dajenehede; Jasaa henane haenethena hauuyauchunauhaudene haejenana jedauwuu dadajevenevese nethauchayaunaa; nau haejenauusa nau haenaunaudede vevenaundenau hanāvenee, hau haejeveede.

7 Hanaāenehethaude nesethāhew hedadajevenevese nethauchayaunaa, Naune, nuu hanasāa jajene nananenau hanejaunau daujenaudedenu vevenaundenau nuu hauuyauchunauhaudee, hau hajeveedenau: dauwauhune; hadevachunauthauyauau vedauauwuu?

8 Nau hanaāauchuhanadethāde, Vahadāhene, hauwaa nanehasene nuu hee jaje jea, nadeesenenesede, nau vehethe hadjenanauwau.

9 Nau hith hāvāgaune vevenaundenau nee: nauhith jene, hadnaāedauwauhade.

10 Nau haeechauhauthethā jasaa vevethahenauauwuu vadanesee.

11 Nau, naune hena hesā haujaunehaeheaugauwu nasaudauchunee jajenee, nau haevajanā hauānee, nau haejeneechuwuwauthe nehayau.

12 Nau hāene Hajavaneauthusau nauhauwaude, Haeadetha, nau hanaāēdauwunaude, Hesā, nananene haunaugunane hehethee hadaugauwudaanaa.

13 Nau hanaāēvasanaude: nau chauchaunu hanaāechuvāde, nau haevaveenethedauna Hejavaneauthu.

14 Nau hauchuwunane vevethahenauauwuu haeauchuhananade nauguu hasenaunaude, hanau henee Hejavaneauthusaun denayauthānith vadanesee, nau haeautheda henanadaa, Hena nanadaudauchāe hese henane heenesethādaunau hanānaneējauna nau hanānaneenayauhana, hau hegau vadanesee.

15 Vahadāde hanaāauchuhananadethaude, nau hathauhuk, Nananene nanadaunāhene, gauhājene dajee hanesahena vadanesee haugunauva hauwaugajevenau wauāthe nau-gauchaudaheauau hehethee hewauchuhauchauwauauwuu, nau gāyethaājethauva devanauhauna?

16 Nau gaujenaasaunee naa hesā, hedaunau Ābraham,* henee Haujau heduguthaune, naune, nuu nasaudauchunee jajene, hāaugunade hehethee nuu deduguhude vadanesee?

17 Nau hāenehedauau nuu hayauhuhau, vahee hejauthauwau haeaudaudāhenenau: nau vahee henanedanede haeneethaujaudene heee vahee havathee hayauhuhau henee hesethaunau.

18 Hanaāenehede, dusaune henajanede Hejavaneauthau? nau hayew naudnenehethau?

19 Waude nejenanenee mausdaude, henane nedanauau, nau neneāgudede hejenayaunaa; nau neveseaudede, nau hāhe haeavadauhadene; nau neahehauau hejavaa negausee hedānaa.

20 Nau jea hanaāenehede, Hayew naudneedajenehethau henajanede Hejavaneauthau?

21 Waude nesaunauchaa henee hesā nedanauau nau nejenanauau nasau dejenauhunee thauauhanau haunaude devahenesaunadāe.

22 Nau haeehedesa hauwauhauauwudane nau hajasedan, dechauhauthethāde, nau haejāda hesee Dādaunedan.

23 Hanaāanadethāde hanesāhenith, Vahadāhene, gaujewauthanauau henee henayauhathee? Nau hanaāēdauwunaude,

* 13:16 “Ābraham” is spelt thus once in this verse and spelt “Abraham” thirteen times elsewhere in the text. It is not known whether the spelling differences have any grammatical significance.

24 Neaunedauwauau hadejedāna hadaugaugunesāde dajanau: newauthana, Nananenau dāedauwunathana, hadne-naudedena hadnedaujedāna, hau hadnehauwuneeauva.

25 Hāene hechauhauthethāhe hauauwuu thauwauthehuk, nau haugauhahagu dajanaune, nau nananena hanānaāetheauguna jathee, nau hanānaāewardāhauna dajanau, hanānaāenehethauna, Vahadāhene, Vahadāhene, jegaunanauwunāa, nau hanānaāauchuhanehethāna nau hanānaasenehethāna, Hāhauwaenaunathe daun hadesane:

26 Hanānaāenehethauna, Nevethehenauau nau nevaveyānauau hathaāhene, hau nananene dau-thedaunānehadaugauchadee.

27 Hau hadnaasenehede, Hāedauwunathane, Hāhauwaenaunathe daun hadesane; nayāsesave vahee nananena nesethāhehauau wauwauchudaude.

28 Hena hadnevewauhudaunee nau hadnegaugauchaugudasenana, hāenauhauwaunā Abraham, nau Isaac, nau Jacob, nau vahee haeyāhehauau, Jedauwuu henajanede Hejavaneauthau, hau nananena nehayau nenuguthadena.

29 Nau hadjenauuchaudenee hehethee nejeethevesesanith, nau hehethee nesenaesanith, nau hehethe nanavee, nau hehethee janauhuu, nau hadjanauguduu henajanedauene Hejavaneauthu.

30 Nau, naune, hena hedauaude hadnedauvade, nau hena nanedauvade hadnedauchude.

31 Hajesesenee hena haejenauusa jasaa Nesethajauhuhauau, hasenehethāhuk, Nauahe, nau jathāau, hanau Herod hadnaāne.

32 Nau hanaāēdauwunāthee, Najesaa, nau hadāedauwunauva hena vachuhuu, Naune, nenuguthu haujaunauau, nau nenayauthānau nuu desenee nau naugaagu, nau nanaseauwauau hesee hadnaāesedaunau.

33 Hau hadnenedanau nuu desenee, nau naugaagu, nau jea hathavenaugaagu: hanau hehauwunaasau henee haeyāhe denaade Dādaunedan.

34 Hau Dādaunedan, Dādaunedan, nanathee nenauuthee haeyāhehau, nau nenauchauwahathee hauunaugāe henee hejejenanauwunaudenenu; dauhudauchu naudnauāchauhaunauau nananena hadāeyaunewauau hauānee waude neauthuneahee dauānaude henesaunau hethauvaa hethaenaa, hau hāhauwuvatthehāva.

35 Naune haudauauwunenau, naunaudauwunana hadnadauyewu: nau hethauwuu nāedauwunathana, Nananena hadnehauwunauhauwuva haunaude nauauchaugu hadneenehena, Hauwunaunaa henee jaunaude hee henesedaunene Vahadāhenith.

14

1 Nau hethauwuu, daujedāde hedauauwunene hanesāhenith najane Nesethajauhuhau hadvethee jauaujau vadanese, henee haeaunauyauhauvaa.

2 Nau, naune, hena jasaa henane hathaāhede haenene-saunenauau.

3 Nau Hejavaneauthusau haeauchuhananadetha nanavaavehchau nau Nesethajauhuhau, gaujenanavanau henayauthaude vadanese? hāthauhuk.

4 Nau haedādaunaugunauau. Nau hanaāedanaunith nau haenayauha, nau haejenana;

5 Nau haeauchuhananadetha, Hanaa hedauneau naugauchaudahehchau wauāth waugaje janesenayaugaune hadaundaunadene, nau gauchauchaunu gauhadnau-uguthauva vadanese? hathauhuk.

6 Nau haeyauhuune nesenehethauthee jea nuu hayauhuhau.

7 Nau haedadajenehetha henee hathāadethavathee, hāenauhauwaude hasayāchauhauwunethe najatheaugudaunau; hanaāāedauwunaude,

8 Hāene nananena hadethaunā henanenauau gauwuhaudeneagu, jevajanauguu najatheaugudaunaa; havajavaānethā henane havajavaāheva henee hadethade;

9 Nau henee hadethāde nau nananede hadjaude nau had-nethāne, Venene naa henane hadehedaugu; nau nananene haddayāhene janaugunenagu hesaudavaa.

10 Hau hāene nananene hadethanenagu, haddeyehau nau hadjanaugu hesaudavaa henee hāene hadethāde hadjaude, hadethāne, Va javesa; hadnaāene nananene vechauthānaune henee hanethevethehevādaunauau.

11 Hanau daun nanajathajaude nehayau hadnausādauaude; nau henee nausādauauadede nehayau hadnajanede.

12 Hanaāenehethaude jea henee hadethādaune, Hāene nananene gauusevanenagu wauāthe hethunevethehevanenagu, jevaadesene hādaehauhauau, wauāthe hāthesaunauau, daudause hādauānauau, wauāthe nethauyādahagu hanedaudewau; havaadethaa jea, nau havaaunaudaunā.

13 Hau hāene nananene vethehevanenagu, hadadethau-nauau hadavenuhuhauau, henesenehchauau, jeneejavesa-hehchauau, nanenauguhuhauau;

14 Nau nananene hadnauwunaunane; hanau daujeneau-naudaunānaune: hanau nananene hadnaunaudaunane jae-gauhadeneneagu hathāethadee.

15 Hāene hanesāde henee henethevethehevādaune daunedauwaudauwunith nuu hayauhuhau, Hauwu-naunade henee hadvethee jauaujau henajanedaunene

Hejavaneauthu, hathāhuk.

16 Hanaāēdauwunaude, jasaa henane haeavathethun-
evetheheva, nau haeauwauhadethānanena;

17 Nau haejenana hewauwaune dauethunevethedeaune
hadnāēdauwunaunith henee hadethavathe, Jenajesaa; vahee
hayauhuhau wauwu hanesejenanee.

18 Nau vahee haenesadene hathaichuwuhadethee had-
nudanathee. Nanedaouwauaude hasenehethauhuk, Neau-
daundaouwau vedauauwu, nau hadneyehaunau nau had-
nauhaudauwau: Nehethathane hadnudanene.

19 Nau jasaa ahagu, Neaundaunauthu yauthauyauna
hedauhuwaugaje, nau hadneyehaunau hadnayāduuhuu:
nenehethathane hadnudanene.

20 Nau jasaa hahagu, hedauwunenenu, nau naajeneejau-
nau.

21 Hanaāējenauusade henee wauwau, nau
hanaāēnauhauthehaude hadāhewaunādaune nuu hayauhuhau.
Wauhā hechauhauthethāhe hauauwu hanaāēasenaunade
hanaāēdauwunaude hewauwaune, Yegauhu nauhauhaunee
hadaugauchaudāe nau hadaugauchauchanee hedane,
nau hadjāthaunauau hede hathāadavenuhunethee, nau
henesenehehauau, nau jeneejavesahehauau, nau
nanenauguhuhauau.

22 Nau wauwau hasenehethauhuk, Vahadāhene, naasedau-
nau hasenehesene nau nausunauthauyauau, hathāhuk.

23 Nau Vahadāhede haeēdauwuna wauwaune,
Yehau hathenavaunaa nau nethauchayaunaa nau
hadjādasauaunauau hadejejedāthee, henee naudauauwu
hadeechauchanaa.

24 Hanau nāēdauwunathane, henee hegau hena
henanenuau neadethathee hadnehauwuvajadauwu
nadethunevethewau.

25 Nau hena haenethaunau havathenedanede: nau
hanaāējaaagude, nau hanaāēdauwunaude,

26 Hith daun henane heda sānaugu, hau jā sānauwauhuk hene-
saunaune, nau henaune, nau henene, nau dāeyaunauau, nau
henethesaunau, nau heda sāwau, haa nau nehayau hedenaed-
ede jea, nāhauwuneethauguhaa.

27 Nau daun janenevaa henaugauchu, nau thaughānaugu,
nāhauwuneethauguhaa.

28 Hanaa nananena vanadaunesedede hayauauwun
gauhadjejanaugu nedauau hadnayādede hadaachuunee,
wauau hanaadauchanenee hesehenee?

29 Havaene hesejenanauhuk hauunauganau, nau
hanājeneesedede, vahee henee hathāenauhaudauau
hadneevavavayaudenenee.

30 Naa henane nenesedede, hau hajeneesedede, hanāthāde.

31 Wauāthe daun naja, vadauvauthauhuk jachau najane, hanājanaugude nedauau, nau hanāgaugauanadauau wauau haneene nauguu vadadauchu vasevadadausauau hadnenuchaunaude henee hejevenahedaunau nauguu nesauau vasevadadausauau?

32 Wauāthe, hajesenausujechaugunethe, hanāyethauthaveede, nau hanānayāthenedauāwaunaude.

33 Nau naasauau, daun nananena henee janenaunaudauau vahee henetheyaunau, nāhauwuneethauguhaa.

34 Nejauauwuu hethadee: hau hith nejauauwuu jevanu-jaudāgu, hayew hadneenejauauwujauau?

35 Dause hehauwuuthade vedauauwuu, wauāthe heee vehethe; hau henanenauau hanāneāgudede. Daun henaudau-nunede heenedauvahek jaathedeha.

15

1 Hanaāeauchaunāde vahee hauāyāhehau nau wauwauchudauhuhau heee hadjaathehāde.

2 Nau Nesethajauhuhau nau Wauthaunauhāhehau haeneneedenenau, Naa henane hanesedanaude wauwauchudauhuhau, nau nanethevethewau, hathāhuk.

3 Nau haeauthaunanadetha, hasenehethauhuk,

4 Hanaa henane nananena hedauneede vadadausauau jauaunawaudā, hith hanauhauhuk hanesahenith, gauhadnautha theaudausauau nau theaudauchunee nauaunee, nau gauhadnaudeha henee naunethauunith gauhaunaude hadveeha?

5 Nau hāveehauthe hadthāegauhaude hejaanaunaa, hadne-neethajaude.

6 Nau hāenauajegauhuthe, hadnadethaude hauānee henedae-hauhau nau henedaudevādaunau, netheneethajaudauwunee hanau daujaveehauau naudauāve nenaunethauaude, hathauhuk.

7 Nananenau hāedauwunathana, nuu hadnaasauau neethajaude hayāene hāene hanesāde wauwauchuduhu haunaun-evethajauhuk javaānee theaudausauau nau theaudauchunee hathauwunane janenethenauau haunevethajaude.

8 Dause daun hesā nethenauaugu vadadauchu gauneevāejethā, hith hanadehuk hanesadenee gaunee, gauhadjedeauchauau nauauuthayau, nau gauhadwaudeau hauauwuu, nau gauhadvavesenaudene haunaude gauhadveede.

9 Nau daun hāveenuu hanadethaude henedaehauhau, nau henedaudevādaunau hauānee netheneethajauwuu, hanau daujaveenauwau hanesadee nāanathau, hanāthaude.

10 Naasauau, Nananenau nāedauwunathana, haneduu neethajaude hathaāhethēe hautheaunauau Hejavaneauthuu hanesāde wauwauchuduhu haunaunevethajauhuk.

11 Nau hasenehehuk, jasaa henane neseyaugaune heauhau:

12 Nau hajauchaugade haenehetha henesaunaune, Nāchau jevene gauuu vatheyaunau henee nāudnedadahedaunau. Nau hanaāgauuvenaude hethāenetheyaunau.

13 Nau haunauauhaejewauthanenau hese hajauchaugade hāesauānauau vahee hauānee, nauhanaāejathāaude heseē vavāaune vedauauwuu, nau hena hanaāevadauthedede hethāenetheyaunau heeē hauhaugānenaedede.

14 Nau hāevathedede vahee, hena haanaāenauauchaauau naunauthauau hasenaude hena vedauauwuu; nau hanaāadavenuhunede.

15 Nau hanaāeyehaude nau hanaāewauhaunesade nehayau hauwauhauauwunanenau heneē vedauauwuu; nau haejenanaa hethauauwuu hadnauchaauwaude neauthuwauchu.

16 Nau hanāneanadauau hanāchauchaunaudede henaude heeē jeyauwaunau heneē neauthuwauchu hevethedaunenenaunau: hau hegau henanene hevenaa.

17 Nau hāaenaudede hanaāenehede, Waunauthanethe hedautheaunau nāsaunau nenethenauau jauaujaunau naenedauchaneneē nau nejeesesaneneē, hau hadnenadaugauyānau?

18 Hadgauhānau nau hadeyehaunau nāsaunau, nau hadnaasenehethauau, Nāchau, nananenau nanethenauwau wauchudaude heseē hayāene, nau yeseē nananene,

19 Nau nananenau hegau heeē hāhauwautheāve: jenesehe waude haudautheaunauau.

20 Nau hanaāegauhāde, nau hanaāedauchaude henesaunaune. Hau hajesejedauchaude, henesaunaune haenauhauvaa, nau haeauwunaunaa, nau haeyeseneegau, nau haenaethesaunaunagutha, nau haenededana.

21 Nau heau hathāhuk, Nāchau, nananenau nanethenauwau wauchudaude yeseē hayāene, nau nananene, nau nananenau hegau hāhauwautheneēāve.

22 Hau henesaunaune hathauyugaune hedautheaunene, Jādee chaunauguuthadee hu, nau hauyauunaa; nau thānauwunaa nechaunathathau hejadena, nau jedauaunenaa:

23 Nau hadjāthauva hede daun gauchujāde wauuu, nau hadnauauva; nau hadvethenauau, nau hadeaunauwuthajau-nauau:

24 Hanau naa nāa nenajaa, nau jaenaedede; nenaunethauaude, nau jaeveenade; nau hanaāejasesaunauwuthajauthee:

25 Wauhā vanachauganith heau haenedaune nauau: nau daunausujaude nau hāyānauusade hedauauwunenau, haenedauwaude haenevaudenene nau haevadaudenene.

26 Nau haeadetha hanesānith haunauaheau, nau hae-naudedauna dusedaudene hathauhuk.

27 Nau haeāedauwunaa, Nananene hahavaa nauusade; nau nananene hāsaunau naunauaude gauchujānith wauuau, hanau daujaesedanaude nanethauaune.

28 Nau haeasenauna, nau haejejedā: hanaāejenuahenith henesaunaune, nau haedadadasevaa.

29 Nau haeauchuhananadetha henesaunaune, Naune, nuu hawauthāe jajenee hāenesedaunathadenau, daudause hāhauwujethauwaudaunathe hanāene hanathauchuwuhunaune: hau haunauau nananene hāhauwuthauuvene haudāsau, henee hanānesedenau haunauwuthajaude nauguu nādaehauhauau:

30 Hau chauchaunu hasenauusade naa hāa, hāgaujauauthedaunādaunau hāheenaededaunau heee henesahehau hesānu, nananene hanadaunaude gauchujānith wauuau.

31 Nau hanaāēdauwunaude, nā, nananene nanethenaedevene, nau vahee henee nāthāenetheyaunau nanehanāhene.

32 Dauudasadee henee haneenesehēe haunauwuthajaude, nau hadneethajaunee: heee naa hahavaa denajaa, nau jae-naedede; nau denaunethauaude, nau jaeveenade.

16

1 Nau hanaāēdauwunaude jea hethauguhādaunau, hena jasaa haenethauyādā henane, haenethena hadāhevahew; nau haenanene haeauthauwuvaa henee daunethauyādauchudede hevathēyaunau.

2 Nau haeadetha, nau hanaāenaudedadaunaude, Duthanee henee daunedaunathane nananene? nayāde hādāhevadenau hanau nananene hadnehauwuguthadāheva.

3 Hadāhevāhe, Hewauau hauaudnesedaunaune? hasethaujauhuk, hanau navahadāhewaunāde haedanauwunānu nadadāhewau: hajeneenauchauhānu; thaununedauwauhunenau.

4 Haenauwau hadnesedaunau, henee hāenudanānaune hadāhewaude hadjedanethee hedauauwunenau.

5 Hanaāadethaude haunauude hadāhewaunādaune hethāesayānedanauwunādaunene, nau hanaāēdauwunaude nandedauwauaunith, Dauhudauchanau hasayānedanauwunaudenau nananene nadāhewaunāde?

6 Nau hāheyaugaune vadadausauau dejenauhuu javeda. Nau hanaāēdauwunaude Hedanau hauwauthaunauha, nau janaugu nauhauhaunee, nau hadwauthaunau yauthauyauau.

7 Hanaāēdauwunaude jachau, nau dauhudauchanau hasayānedayaunau nananene? Nau hanaāēdauwunāde, Vadadausauau dejenauhunee thauauhanewauchuunau. Nau hanaāēdauwunaude, Hedanau hauwauthaunauha, nau hadwauthaunau nasaudausauau.

8 Nau vahadāde haevaveenethedauna janechuvāhenith hadāhevahew, hanau dauhaenauau hasedaude: hanau dāeyaunauauau nuu hathāauauvaa hedenaededaunenau hāenuu javaānee hesenedāeyaunauauau.

9 Nau nananenau hāedauwunathana nesedee nehayau henedaehāvadede hee nethauyādahede hehauwuthade; henee hāejenenaedenā hadeesedanāna nedaujethauujene-naededaunenee.

10 Henane henee chaunuvāde hee haugajuhuyāgu haneechuvāde jea vasee: nau henane henee janechuvāde vanehaa hehauwuuchuvā jea vanasaunee.

11 Hith naaheene nananena jechuvahena hāhauwuuthaheva nethauyādahede hanaa hadvenāde nananene hadanethaude hethauwuu veaunauaude?

12 Nau hith nananena hejechuvahenagu hee henehanahede jasaa henane hanaa hadvenāde nananena henee hanahanahede.

13 Hegau nesethāhe hehauwuneenesedauna hanesenethe hechauhauthethāhehau: jachau hanāasānauwaude hanesāhenith, nau hanāvechauthaude jachau; wauāthe hanādudevede hanesānith, nau hanāthauchaunauhauwaude jachau. Nananena hāhauwuneenesedaunauva Hejavaneauthau nau nethauyādahehehauau.

14 Nau Nesethajauhuhauau jea, haevenauwu vāejethā, haenedauwaudaunu vahee nuu hayauhuhau: nau haeauchaudanavanauau.

15 Nau hanaāēdauwunaude nananena nethadee hasehadenā hathaāhethēe henanenauau; hau Hejavaneauthau naenauau hadahenau: hanau henee nechauguanavadethee henaneda newauchanavathee hathaāhenethe Hejavaneauthu.

16 Nanavaavedaunau nau haeyāhehauau haunaude nauu Jaun: hee hena henajanede Hejavaneauthau deheauthedaunee, nau haunaude henanenauau neheeneethenadethee.

17 Nau hehauwunauthau hejavaa nau vedauauwuu heyauhuāgaune javaānee hanesadee haugajuhuu nanavaavede hadneeyauhuu.

18 Daun hausānaude henene, nau heneyaugu gauchuhunee, wauchudaudehaugauthenenede: nau daun hausāyaune nanewaude wauchudaude.

19 Hena jasaa nethauyāsenane, haeneenu haevejayaunenau

nau haegaugunesaunenau, nau haeneechauna hadauchenenee:

²⁰ Nau hena jasaa nedauwuhu Lazarus haseagu, haesaese hedajanaunaa haevahaseva,

²¹ Haevadauugaudaude heee jeyauwaunau nejanesanenee hehethee nethauyāsenanene hevethedeaunene: jea hathave haedasaa nau haenenesaudauwu hedaewaunau.

²² Nau hethauwuu, henee nedauwuhu haenaja, nau haenauaunechauhaa hautheaunau yesee Abraham haenedauguva: nethauyāsenane jea haenaje, nau haejenanau;

²³ Nau hadauveeyaunee haejenāauguau, haeaudauwuthajau, nau haenauhauva Abraham vavāaune, nau Lazarus haenedauguvane.

²⁴ Nau haeneduva nau hathauhuk, Nāchau Abraham, jeauwunaune, nau jeautheavene Lazarus, henee hadejegunauhade naunauchuu hejadenaa najee, nau hadedauyauvanauau nāthaune; hanau nananenau hanavachuunau nuu hesedaa.

²⁵ Hau Abraham hahagu, Nā, hāenau henee nananene deenaedene neesedanauwu neethadee hayauhuhau, nau neesaunee Lazarus neewausaunee hayauhuhau, hau hewaunehaa hauwauthenaedede, hau nananene naunauchauthenaedene.

²⁶ Nau jea vahee nuu, nahethāe nananee nau nananene haneduu vanasauau vanethaunauau janenanee: hadnejeneehedechaudenee hehethee hede hesee nananene hehauwunee; daudause hehauwuneejeauchosanauau hadaunee, henee nevadaujauthee hehethee hethaa.

²⁷ Hanaāenehethaude, Vanevethedaunathane hena heee, Nāchau, henee nananene hadejejenanaude nāsaunau hedauauwuu:

²⁸ Hanau yaunauthaunethee nauhauwauauau henee hadeāedauwunaude, jea havajaunenau nuu haduu naunauchauthauau.

²⁹ Abraham hanaāāedauwunaude nanethenauthee Mosaseau nau haeyāhehau; jaathehaunauha.

³⁰ Nau, hegau, nāchau Abraham: hau hith hanesāde jaeyehauhuk hehethee degaujauaudāde, haunaunaunevethajauthee, hathāhuk.

³¹ Nau hanaāāedauwunāde, Hith jenedaunauhaugaunee Mosaseau nau haeyāhehau, daudause hāhauwunee nadauwaunauau, daudause hanesāhenethe jaegauhāyaugaune hehethee degaujauaudāhenith.

17

¹ Hanaāāedauwunaude hethauguhādaunau, Hāhauwuneene hau henee dauusenadenau hadnauauchuu: hau naunauthauau hadnauauchaudaude daunjaunaude.

² Hanāneene henee thauayānauunaugane henauānauyaugu, nau seāguthadagu hadaje, hauhanāheejegaudavāhenethe henee haneedaussenanethe jachau nuu hajasedāeyaunauau.

³ Haunauyaухаудауwauau nehayau nananena: Hith hahavaenau havawauchuhāva, hadanadethauva; nau hith haunaunevethajauhuk, hadjaegudanauwunauva.

⁴ Nau hith wauwauchuhānagu nesaudauchu hajesesenenee, nau nesaudauchu hajesesenenee naujaeyethaagudaunānagu, haunaunaunevethajaunau, hethānagu: nananena hadjaegudanauwunauva.

⁵ Nau vadauhanauau, Vahadāhene, hethedaunanauwunāa hedethauwaudaudenede, hathauhaugaunee.

⁶ Nau Vahadāhenith hathāhaugaunee, Hith nananena hethauwaudauwunagu hethāee hethāuu mausdaude jenayaunau, nananena hanāna nuu segaumau hunauhaudene, Hanāgauchauhana hethājee, nau hanājenanauna hadajee; nau hanāthauwaudaunāna.

⁷ Hau hanaa nananena, hanāwauwaunavede hanāthauauauwujethānith wauāthe hananajauānith, hanāthauna waunee hāenauusathe hehethee nauau, Najese nau hadjanaugu nau hadvethe?

⁸ Hau hanājenaasenehethauna, Hesetheva nayaudenee hadnevethenau, nau duujehe nehayau, nau hadjeenechaudaune haunaude hesevethenau nau hesaveyānau; nau heauhauwune jenaevethene nau hadevaveyā?

⁹ Gauhadvaveene henee wauwau hanau dauhunaasedaude henee hanasenehethāthe? Haunauchāe hegau.

¹⁰ Naathahena, hāene nananena vahesedaunagu hena hayauhuhau hathauchuwuhana, Hāhauwuneejavaājasethānau wauwaunauau; vavade nanesedaunauau hadnesedaunuu, hadeva.

¹¹ Nau hethauwuu, daunausuyehaude Dādaunedan, haehedesa nahethāe Samaria nau Gananee.

¹² Nau hāewardasade jasaa hauauwudan, haenuchaunaa vadadauchu henanenau haenaujaune hedaugauwudaunau, haetheaugunenau vavāaune:

¹³ Nau haeneduvanauau, nau hanaāenehethauthee, Hejavaneauthusau, Hecauhauthethāhe,* jeauwunauāa.

¹⁴ Nau hāenauhauwaude hanaāēdauwunaude, Waunenauhauthehaa hadanayaunenau vevethahevahehauau. Nau hethauwuu, henee daunausuyehauthee, haejegaudavāhenauau.

¹⁵ Nau hanesāde, hāenauhaudauau henee dauunayauhade, haejaaagu, nau haevasenehe dauvaveenethedaunaude Hejavaneauthu,

* 17:13 Missing "h" in "Hec(h)auhauthethāhe" ("Master").

16 Nau haeuāneseve heauthene, haevaveenethedauna: nau haenaadāde Samaritan.

17 Nau Hejavaneauthusaun haeauchuhananadethā, gaujeyauhaunauau vadadauchu? hau daude theaudauchu?

18 Hajenauhauvathee hajejaeyehauthee hadvaveenethedaunauthee Hejavaneauthu, vavade naa henuwauhu.

19 Nau haeāedauwuna, Gauhā, najesa: nananene hadethauwaudaude henayauhāne.

20 Nau hāenaudedauwuna Ne Sethajauhuhau, daun henajanedaunene Hejavaneauthu hadneenauauchaunee, Haeāedauwuna, Henajanede Hejavaneauthu hadnehauwunauauchaune nausujauwuwuhadagu:

21 Daudause hehedauneagu, Nauhaudauwuu hede, wauāthe, nauhaudauwuu hena, hanau, naune, henajanede Hejavaneauthu thanāsadena,

22 Nau hanaāedauwunaude hethauguhādaunau, Hese hadnauauchu, hāene nananena vadaunauhaudauwunā jasae hese Heau henane, nau hadnehauwunauhaudava.

23 Nau hadnanethāna, Nauhaudau hede; wauāthe nauhaudau hena; jevayehauau, wauāthe jevathauguhaa,

24 Waude hasauau jahagude, henee naunauasānauuu hehethee naugauthanee naugauauwuu hejavaa neenauasādaa jasaa naugauthanee naugauauwuu hejavaa; hadnaasauau jea Heau henane hadnaasaunee hedeseve.

25 Hau nedauau hadnanasenedauau wauthanee, nau hadnausāguthade nuu henaedede.

26 Nau waudeneesaunee deenaedede Noe, hadnaasaunee jea hedeseve Heau henane.

27 Neauwauthevethehedaune, neauwauthevaveyaudenee, neauwauthenedaunee, neenenehathee, haunaude nauu henee Noe dejedāde havathee thewaunaa, nau haenaāenanadauwuauau, nau haenauauhā vahee.

28 Waudenaasauau jea deenaedede Lot; neauwauthevethehedaunee, neauwauthevaveyaudenee, neauwauthaudaunaudenee, neheaudaunaudenee hayauhuhau, neauwauthenayaudenee, neauauvadenee;

29 Hau hajesesenenee henee Lot haenaude Sodom haesedanausaude nau haegauhauchanauauhauunau-ganauau hehethee hejavaa, nau haenauauhā vahee.

30 Hadnaasauau hese hāene Heau henane hāenauhauthethāthe.

31 Henee hese, hānedauthe dasee hauauwuu, nau havatheyau nau jedauwuu hauauwuu, nanehajejeauwusade hadejedanauau: nau henee hanedaude nauau, nanehajeje-jaejaude.

32 Dauyuwuu Lot henene.

³³ Daun vanadauunayaude hedenaedede hadnanadede; nau daun hadnanadede hedenaedede hadnenayaude.

³⁴ Nananenau nāedauwunathana, henee veeyaugu hadnesethee henanenauau hanesadenee hauau; hanesāde hadnedanade, nau jasaa hadnathauaude,

³⁵ Hanesethee hesānauau hadthauayāthee wauhaunee; hanesāde hadnedanade, nau jasaa hadnathauaude.

³⁶ Hanesethee henanenauau hadnanedauthee nauau; hanesāde hadnedanade nau jasaa hadnathauaude.

³⁷ Nau haeauchuhananadethanauau, Daude, Vahadāhene? Nau haeāedauwunā haduu vadanayau, hanaadauhauāneauhuthee neahehauau hauānee.

18

¹ Nau haeanaadetha hauthaunauhānee nuu hee, hena henane hāvachudajauaunevevetha, nau hājethauujesevenauau;

² Hahagu haeanedau hedan hauchuwunane, haejesa Hejavaneauthu, daudause hathauwunanenau:

³ Nau haeanedau henevesā hena hedan; nau haejeedasa, Jeaugaunayewhu naujauthavaa, hathauhuk.

⁴ Nau haejevadaunaasedau: hau waunee hasethajauhuk, hewauāthe nejechauau Hejavaneauthau, nau hathauwunanenau;

⁵ Hau nausunee hanau naa henevesā hajanauchuhānau, hadenayauhauau havaedajauaunejau navanadauchuhaa.

⁶ Nau Vahadāde hasenehehuk, Jaathehaa hasenehede janechuvāhede hauchuwunane.

⁷ Nau gauhujavaneauthau gauhadnenayauha nehayau hanayāsanaunau, hauwauaudaunādaunau hese nau dajāee, hau negudauchuhaude?

⁸ Nananenau nananena nāedauwunathana henee hadnauchuhanenayauhaude, Hau hāejauthe Heau henane, gauhadveede hethauwaudaude nuu hathāuauvaa.

⁹ Nau haeauthaunanadetha jachau nethauwaudaunadenethe nehayau henee dauchvahethee, nau newauchānauwauthee hauthauau:

¹⁰ Hanesethee henanenauau haeyehaunauau vevethahenauauwu hadvevethahethee; hanesāde Nesethajuhu, nau jasaa hauāyāhe.

¹¹ Nesethajuhu haetheaugu nau haevevetha waude hee nehayau, Hejavaneauthau, nananenau vaveenethedau-nathane, henee nāhauwunaathā hauthauau henanenauau hathahethee, hedanauwuyāhehauau, janechuvahethee, jatheaudauwuyāhehauau, daudause naa hathāde hauāyāhe.

¹² Nananenau nenaugauyānau nese hanesadee hauchauvadede, Nevānau vadadauchu vahee henee nāthāenetheyaunau.

13 Nau hauāyāhe haetheaugu vavāaune, daudause haejejenāauguau hejavaa, hau haeanadesejāhede, Hejavaneauthau jeauwunaune wauchudaunau, hathauhuk.

14 Nananenau nāedauwunathana, naa henane haejaeyehau hedauauwuu haeauwunaunau haejavaāhe jachau: hanau dathājee hanesāde henee nevadaujavaānajanethee nehayau hadnauwujenanade; nau henee nenehanethaunadede hadnejanade.

15 Nau haejādaunanauau jea hajasedāeyaunauau, hadnevasanaude; hau hāenauhaudauwunethe hethauguhādaunau, haeneneuvanauau.

16 Hau Hejavaneauthusau haedetha, nau hahagu, Nanehaujathēe hajasedāeyaunauauau, nau jevadauduvaa: naathāhenethe henehanahedaunau henajanede Hejavaneauthau.

17 Hethauwuu nāedauwunathana, Daun hadjesedanauau henajanedaunene Hejavaneauthu hasenaedenethe hajasedāeyaunauau hadnehauwuneejedā.

18 Nau jachau hauchuwunanene haenaudedau-naa, Hethāhene Hechauhauthethāhe, nauddusedau hadnedanauwau jethauujenenaedede? hathauhuk.

19 Nau Hejavaneauthsaun* haeāedauwunaa, Naudu hethāde haesene? henaneda hehauwuthā, vavade hanesāde, nananede, Hejavaneauthau.

20 Nananene haenauwu nanavaavedaunau, Jevawauchudauau hee haugauthenenede, Jevanaa, Jevaaveda, Jevajayaudauwāedauwauthadee, Vechauchune nananene hāsaunau nau hānau.

21 Nau hanaāenehede, Vahee nuu haunaunedenau hee daujeeseaunau.

22 Wauhā Hejavaneauthusau hāenedauwaudauau nuu, Hanaāedauwunaude, Hanesadee hāhauwusenethene: Vaheaudauna henee hāthāenetheyaunau, nau hadjaanauwunaunauau hadavenuhuhauau, nau nananene hadnethenauwu haenathau hejavaa, nau hadejau hadjethaugu.

23 Nau hāenedauwaudauau nuu, haeaudauwuthajau: hanau deethauwunethauyā dāde.

24 Nau Hejavaneauthausaun hāenauhaudauwunith henee dauaudauwuthajau, Duthāenanauthaune henee nanethenuu veaunauaude hadnesejedāthee henajanedaunene Hejavaneauthu, hathauhuk.

25 Hanau hehauwujajathaune hee camel hehedesaha-gaunee hajasevāhau nedaudaunaudenee, javaāneenauthaunee

* 18:19 Missing letter "u" in "Hejavaneauth(u)saun", which often appears (as does "Hejavaneauthusau") where we would find the name "Jesus" in the KJV.

nethauyāsenane hadnesejedāde henajanedaunene
Hejavaneauthu.

²⁶ Nau hathāenedauwauduu, Hanaa hadnnenanedane? ha-
hagaunee.

²⁷ Nau hanaāenehenith, hayauhuhau hejethauuneethaune-
nau henanenauau neneedede Hejavaneauthu.

²⁸ Hanaāenehede Peda, Naune, naunaudauwunauau vahee,
nau thaunauguhane.

²⁹ Nau haeāedauwuna, Hethauwu nāedauwunathana, hena
haunauude henane henee hehauwunaude hedauauwu,
wauāthe henehā, wauāthe henauhauwauau, wauāthe henene
wauāthe henesaunau, hee henajanedaunene Hejavaneau-
thu hedenaededaunene,

³⁰ Nananede hadjavaānesedanauau nuu hewaunehaa, nau
hathāauauvaa hadnausanauau henaedede hadnejethauu-
vadauauau.

³¹ Hanaāedanaude nesenee, nau hanaāēdauwunaude,
Naune, hadneyehaunauau Dādaunedan, nau vahee
hayauhuhau hathāewauthaunauhuu haeyāhehauau hee Heau
henane hethauwunauauchauau.

³² Hanau hadvenavathe Neauthu, nau hadvava-
vanauchuhāde, nau hadnaunaunauchaudauchuhāde, nau
hadneguthahayauthāde.

³³ Nau hadnensesegauhude, nau hadnaāde: nau nasese had-
naāejaegauhāde.

³⁴ Nau haejaenauwu nuu: nau nuu hauthedau haeyaudau-
naunauau, daudause haejaenauwu hathauthedaunāthee.

³⁵ Nau hethauwu, hāayāedadauau Jericho, jasaa
haenanenaugu henane haetheaugu nedechaudenenee
dahunedauwaude:

³⁶ Nau haenedauwaude henanedanede dadavechaudene-
nee, haenaudedauva haesedaunenenee.

³⁷ Nau haeāedauwunau, henee Jesus Nazareth
hanehedesade.

³⁸ Nau hanaāevasanadede, Hejavaneauthusau, nananene
Heau David, jeauwunaune, hathauhuk.

³⁹ Nau henee nandedauvathee haeneneuvanauau
haddādaunaugunith: hau haevasanade haugauthe, Nananene
Heau David, jeauwunaune.

⁴⁰ Nau Hejavaneauthusau haedauusa, nau haeautheave
hadjādaunade: nau hāayājenuusanith, haenaudedaua,

⁴¹ Hauddusehathe henee hadenaasehathane?
hathauhuk. Nau hanaāēdauwunaude, Vahadāhene, nanaa
hadeesedanauwau nauhaudauwaude.

⁴² Nau Hejavaneauthusau haenehetha, hanesedanauwu
nananene nauhaudauwaude: hadethauwaudaude
henayauhāne.

⁴³ Nau chauchaunu haeesedane henauhaudauwaude, nau haethauguha, haevaveenethedauna Hejavaneauthu: nau vahee henanedanede, hāenauhauduu, haevaveenethedaunau nau Hejavaneauthu.

19

¹ Nau Hejavaneauthusau haewaudasa nau haechaugusa Jericho.

² Nau, naune, haenedau henane Zacchaeus haseagu, haenajawauna hauāyāhehau, nau haeveaunauau.

³ Nau haeneenavadaunauhauva Hejavaneauthusaun haedāhenethe; nau haejeneene daunauthethenedaunene, hee daujaahede.

⁴ Nau haesayāgau, nau haenauahu sycomore hunauhaudee hadnauhauwaude: hanau hadnehedesanith.

⁵ Nau Hejavaneauthusau hāejeedadauau, haeejaāne, nau haenauhauva, nau hathauhuk, Zacchaeus, nauhauhuhu, nau jeauwusa, hanau nuu desenee hadnanedaunau haudauauwu.

⁶ Nau haenauhuhu, nau haenjeauwusa, nau haedasa nau-guu neethajaude.

⁷ Nau hāenauhauvāhede, vahee haeneānaune, Henee hadneejādavenethe henanene henee wauwauchudauhu, hathāhuk.

⁸ Nau Zacchaeus haetheaugu, nau haeēedauwuna Vahadāhenith; Naune, Vahadāhene, vayaugauuu naudaununaunau vanenu hadavenuhuhanau; nau hith hedanavanaugu hayewhu hehethee daun henane hanājayaudauvāedauwauthauau, hanājavaāvenauau yāyaunanee.

⁹ Nau Hejavaneauthusaun haeēedauwunaa, Nuu desenee henayauthāhe hedadauau nuu hauauwu, hanau nechau haneāvāde Abrahamvene.

¹⁰ Hanau Heau henane nauusade hadnaudethāde nau hadnenayauhaude daun naunethauaunith.

¹¹ Nau hajesenedauwauduu nuu hayauhuhau, haethedaunane nau haeauthaunauhānanadetha, hanau dauhuauchauau wauwu Dādaunedan, nau hanau daunuanaduu henee henajanedanene Hejavaneauthu chauchaunu wauauhaadenauhauwu.

¹² Hanaāenehede henaheee, Jasaa naja haehau vavāaune vedauauwu hadnesedanauau hee nehayau najanede, nau hadjaejaude.

¹³ Nau haeadetha vadadauchu hewauwaunauwau, nau haejaanauwuna vadadausauna vāejethā, nau haeēedauwuna, Hadeaudaunava haunaude jaenauusanaugu.

14 Hau hauauwunanenau haeasānavaa, nau haeyethautheavedaunene thauguu, Nāhauwuvadaunethenauva naa henane nāhauwuvadaunajawaunāva, hathāhuk.

15 Nau hethauwuu, henee hāejaenauusade, haeesedane najanede, hanaāauchuwuhaude nuu wauwaunau hadnadethaude, hevenaunau vāejethā, henee hadnaenauau haedauchu dathājee henane haedauchujavaājasedethe hee hedaudaunaunau.

16 Hanaāejenauusade nanedauvade, Vahadāhene, havāejethāwau javaājasedede vadadausauna vāejethā, hathāhuk.

17 Nau hanaāēdauwunaude, Hethadee, nananene hethāhene wauwau; hanau nananene nethauwaudauwu hee naugajuhuhu hadnajawaudauwu vadadausauna hedan.

18 Nau naneseauwaude haejenauusa, Vahadāhene, havāejethāwau javaājasedethee yauthauyauna vāejethā, hathāhuk.

19 Nau vavade hanaasenehethaude, Hadnehanāhene yauthauyauna hedan jea.

20 Nau jasia haejenauusa, Vahadāhene, Naune, heyewnau havāejethāwau, neaunaunedenau nejenanauwau hāheāhaunaa, hathāhuk:

21 Hee dauhusathane, hanau nananene daugaugaunauauwunanenene: nananene hedanau henee hājejenayaunau, nau hadegauuchu henee hājejenayaunau.

22 Nau haeēdauwuna, hehethee nehayau hadenaa hadauchuwuhathane, nananene hauhauganene wauwau. Haenauwu henee daugaugaunauauwunanenenau, hedanauwau henee nājejenayaunau, nau hadgauuchauwau henee nājejenayaunau:

23 Naudu gauhājevā navāejethāwau nedauhaenaeevāejethā, henee hāejaenauusanaune hadeesedanauwau nehayau javaānee?

24 Nau haeēdauwuna henee daunauthetheaugunethe, Hedanauwunaa vāejethā, nau hadevenau henee vadadauchuvāejethāvade.

25 (Nau hathāhuk, Vahadāhene, nanethenauau vadadauchuvāejethā.)

26 Hanau hāedauwunathane, Henee dathājee hanesāde nanethenauau hadnevenade; nau henee janejasedede, daudause henee henethayaunau hadnedanauwunade.

27 Hau hena naujauthauwauau, henee najevadaunajawaunaunauau, hadjāthauva hede, nau hadnaunauauva hathājenau.

28 Nau hāesanāsenehede nuu, haenedauva, haenauauhuye-haunauau Dādaunedan.

29 Nau hethauwuu, hāayānauusade Bethphage nau Bethany, haua Olives haseāgu, Haesayānautheava hanesenethe hethauguhādaunau.

30 Najesaa nananena hesee hajasee hauauwudan hathaāsana, hathauhuk; nanaa waudasanagu hadveehauna dātheveehauchavesau hadduguhude, hehauwuthauune henane dachaugu: hadaugunauva, nau hadjāchadauneva hede, hathauhuk.

31 Nau hith daun henane naudedauñānagu, Naudu hauaugunauna hethānagu? hesau jenaasenehethauna, hanau Vahadāde haddaununaude.

32 Nau henee hautheavathee hanaāejathāuthee, nau haeveehanauau neesenehethaude.

33 Nau daunsausaugunauthee dātheveehauchavesaune, hedauneeñith, Naudu haaugunauna dātheveehauchavesau? hathāhaugaunee,

34 Nau hanaāēdauwunauthee, Vahadāde haddaununaude.

35 Nau haenauuchadaunanauau Hejavaneauthusaun: nau haedadasanauwunanauau hedāchaunenau dasee dātheveehauchavesau, nau haeaugaugunaunanauau Hejavaneauthusaun dasee.

36 Nau daunsausuyehaude, haesasaanauwu hedāchaunenau vaunaa.

37 Nau hāayānauusade, wauwu haeauwusa hauanee Olives, haunauude hadauchude hethauguhādaunau hanaāanauwuthajauthee nau haevaveenethedaunanauau Hejavaneauthu nauguu haevasānadedaune hee vahee hathāenauthaunee henesethaunene henee henauhauthaunau;

38 Haunauwuthajauau Naja henee jaunau haneesede Vahadāhenith: danādauyauau hejavaa, nau vaveenethedauwu javaājauudaa, hāheagu.

39 Nau hauthauau Nesethajauhuhau hehethee henanadaa, Hechauhauthethāhe, neuwune hāthauguhādaunauau, hathāhuk.

40 Nau haeauchuhanāedauwuna nau hasenehethauhuk, Nananenau nāedauwunathana henee, hith nuu dādaunaugagaunee, hauunauganauau chauchaunu hadneduhuthee.

41 Hau hāayānauusade, hāenauhau dauau hedan, nau haeve-wau,

42 Hanaāenehede, hith heanauwunagu, ha nananene, ha nuu hadeseve, hayauhuhau naathuu hadādaunahedaunaa, hau hewaunehaa yaunaudaunane hasesāe.

43 Hanau hese hadnedasāna henee haujauthauwauau hadnesedethee havathegauuha hee nananene, nau hadnechauchaunāna nauanee, nau hadnaunaunehāna

daudauna hehethee,

⁴⁴ Nau hadnanaunauvaenāna, nau hadāeyaunewauau hanedauchaunawaunauau; nau hadnehauwunau-danauwunā hanesāhenith hauunaugane hanathaugunethe; hanau nananene daujaenauwu hāenaujādaunathana.

⁴⁵ Nau hanaāeyehaude vadanedaunauauwu, nau hanaāenudanaude henee neaudaunanethe jedauwu, nau henee naudaunanethe;

⁴⁶ Hanaāēdauwunaude, Wauthaunauhuu, Naudauauwu haneauauwunee hadnevevethahedaunee: hau nananena haesedena nedaunaudee heyāenau havedehehauau.

⁴⁷ Nau haeautheda hayauwusenenee vadanedaunauauwu. Hau najanauau vevethahevahehauau nau wauthaunauhāhehauau nau najavahehauau henanedanede haeneenanaudehaa hadnaāde,

⁴⁸ Nau haeyauhuune nesenehāde hanau vahee henanedanede haenādevenenau dauhujaathehāde.

20

¹ Nau hethauwu, henee jasaa hena hese, denausunau-thedade henanedanede vadanedaunauauwu, nau haeauthedaude waunauyaunee hethadene, najanauau vevethahevahehauau nau wauthaunauhāhehau haeedasaa nauguu vachagananenau,

² Nau hanaāanadethauthee, Jeauthedaunā, hayew hāenaudahede hāenesedaude nuu hayauhuhau? wauāthe hanaa henee havenāde nuu hāenaudahede?

³ Nau hanaāauchuhananāedauwunaude, Nechau hadnaudedauunathana hanesadee hayewhu; nau hadjeāedauwuneva:

⁴ Heedusaayāde Jaun, gauhuhuthaune hejavaa, wauāthe hehethee henanedaa? hathauhuk.

⁵ Nau haeeegaugaugauudenauau, hith hesauhesene-hethaunauaugu, hehethee hejavaa; hahagaunee, Naudu haejethauwaudaunauna? hanāthānauau.

⁶ Hau hethaunauaugu, hehethee henanedaa; Vahee henanedanede hanāedaudauuānauau hauunaugāe, hanau hethauwaenaunauthee henee Jauneau dauhaeyānith.

⁷ Nau haeāedauwunanauau, daujeneauthedaunauthee dau-nathaunee.

⁸ Nau Hejavaneauthusau hanaāēdauwunaude, Dause gauhaudnauthedaunathava daun nāenaudahede nāenesedaude nuu hayauhuhau.

⁹ Hanaāejasesanadedauau henanedanede hee dajenehede; Jasaa henane haejenane dadajenevesenethauchayau, nau haeethauauauwujethāhehau, nau haejathāu hese vavāaune vedauauwu haegudaunā.

10 Hāenauauchaunee haeyethautheava wauwaune hese thauauauwujethāhehau, henee hadjevenāde vevenaudenau hehethee dadajevenevesenethauchayaunaa: hau haenene-seghuu, nau haejathethajenāhee jessaa.

11 Nau jea haeyethautheava jachau wauwaune; nau haene-nesegehunauau jea, haedadayānauchuhanaauau, nau haeja-thethajenāhee jessaa.

12 Nau jea haeyethautheave nanaseauwaunee: nau haeanasenehanaauau jea, nau haenuguthanaauau.

13 Hanaānehede hadāhevāhe dadajevenevesaa, Hewauaujeesedaunaune? Hadautheawauau navechauthau nāa: Nauchāe hadeneehauthee hāenauhauwaunauthe.

14 Hau thauauauwujethāhehauau hāenauhauwauthee, haegaugauuudenauau, Naa nananede hadvanehanāde: nahājauau hadenauaune, henee headevanehanahedaunau hadenehanahenauau.

15 Hanaāenuguthauthee dadajevenevesenethauchayaunaa, nau haenaanaauau. Haudneduseha hadāhevāhe dadajevenevesenethauchayaunaa?

16 Hadejaude nau hadnauauhaude nuu thauauauwujethāhehau, nau hadgauchuhuvāde dadajevenevesenethauchayau, hathauhuk, Nau hāenedauwauduu, hadnehauwunaasau, hahagaunee.

17 Nau haenāuhauva, nau hanaāēdauwunaude, Dusau nuu henee wauthaunauhuu, Hauunauganau hauauvāhehauau hausāguthaunenau, hanānanenith hāhe hanadāde nedautheaunee?

18 Daun janese dasee nuu hauunaugane hadthausee, hau dasejaneseagu hanānauchauwuthauathāaunaude.

19 Nau najanaauau vevethahehehauau nau wauthau-nauhāhehauau chauchaunu haegaugauanavanauau hadnesedanauthee; nau haedauwu henanedanede hee dauhāenuu henee dauhuanadede nuu dajenehede hee.

20 Nau haeanauyauhauvanauau, nau haeautheavanauau haunauyauhauthāhehau, hadnanadaunethānethe hadchuvāhevathe henanenau, henee hadnesedanauwunethe hedanadedaunau, henee hadenauuchaudaunauthee hejadenenau nau naunaudāhenethe hauchuwunanene.

21 Nau haenaunaudedanaunauau, Hechauhauthethāhe, haenaunee henee hasenehenaune nau nethauwuchauhauthethāne, daudause hāhauwujāvedaugauhauwaunauau henanedanaauau hegau, hau hanechauhauthethāne hese Hejavaneauthuu hethauwuu:

22 Gaunaasauau hee nananee hadnevenade hauāyaunau Caesar, gauwauāthe hegau?

23 Hau haeanauwu henadaunedaudenenau, nau

hanaāēdauwunaude, Naudu haevadauvasehena?

24 Jenauhauthehee vāejethāe. Hanaa hewauthaunenauaudene, nau hanaa hewauthaunauhanede? Haeauchuhanāedauwunanaau, Caesar.

25 Nau hanaāēdauwunaude, Jauaunaudaunaa heee Caesar hayauhuhau henetheyaunau Caesar; nau Hejavaneauthau hayauhuhau henetheyaunau Hejavaneauthau.

26 Nau haejeneesedanauwu hedanadedauunene hathājedaunenee henanedanede: nau haegaugauanadauwu hedauchuhanehedaunene, nau hanaāēdādaunauguthee.

27 Hanaāējeedauchauthee jasae Sadducees, hayāthajauhuhau henee hadjejaegauhadenenee: nau haenaudedauunanaau,

28 Hechauhauthethāhe, Moses hathauthaunauwunānaau, Hith daun henane henauhauwauau gaujauaudāheyaugaune, heneneyaugaune, nau gaujauaudāheyaugaune jedāeyauneveyaugaune, henee henauhauwauau hanādanaude henenene, nau hanānesaunede heee henauhauwauau, hathauhaugaunee.

29 Hena heee haenesaudauchunauau henahavaevadehehauau: nau jasaa nedauau haenenene, nau haenaja haejedāeyauneve.

30 Nau naneseauwaude haeneva, nau haenaja haejedāeyauneve.

31 Nau naneseauwaude haeneva; nau vavade hanaasene nanesaudauchauwaude jea, nau haejenauthanaau dāeyaunauau, nau haegaugauaudāhenauau.

32 Waunee vahee hesā haegaugauaudā jea.

33 Henaheee jaegauhadeneyāgu hanaane hadnevādaune? heee hanesaudauchunethe daunevāde.

34 Nau Hejavaneathusau haeauchuhanāedauwuna, dāeyaunauauau nuu hathāauauvaa nenevadedauunee, nau nenenehauunee:

35 Hau daun naunauguthee hadnenaededuu hena henaedede, nau jaegauhadeneyāgu hehethee gaujauaudahede, hadnehauwunevadedauunee, hegau hadnenenehadedauunee:

36 Daudause hadnehauwauthenajadene: hadnaathahedaunee hautheaunauau; nau hadnenaunevāthee Hejavaneauthu, naathedāeyaunenedauunee jaegauhade.

37 Wauhā henee gaujauaudahehehauau hadjaegauhāthee, Moses denauhauthehade jauauadee, deadethāde Vahadāhenith Hejavaneauthu Abraham, nau Hejavaneauthu Isaac, nau Hejavaneauthu Jacob.

38 Hehauwuujavaneauthune heyauhaudade, hau henaedede: hanau vahee haneenaededauunenee.

39 Hanaāene jasaa wauthaunauhāhe haeauchuhananadetha, Hechauhauthethāhe. Nananene hethade hasenehene.

40 Nau heee haejauthenaudedauanauau.

41 Nau hanaāēdauwunaude, Naudu haena hanee Chris Dāvid* dauhuāwaude?

42 Nau Dāvid nehayau hasenehede wauthaunauhanaa Psalms,† Vahadāde hasenehethaude Navahadāhewaunādaune, Hadjejanaugudaune hejavesanee,

43 Haunaude nadeesehaunauau haujauthauwauau hadnedaugāaugunene.

44 Dāvid henaheee haeheenesea Vahadāhenith, dusee heau?

45 Nau vahee henanedanede haenedaunau hanaāēdauwunaude hethauguhādaunau,

46 Waudauau wauthaunauhāhehauau, neneanaduu javesanee sauauausāchaude, nau vechauduu jachauthadede nedauaudaunauvadedaunenee, nau najatheaugudaunau vevethahenauuwuu, nau najanau nedaugunethe vanethehedaunenee;

47 Naudauvāe henevesānau hedauauwunene, nau hanau denauhauthethāthee deguthevevethahethee: hadnathee hanesedanuu vanasaunee gudanadede.

21

1 Nau haejaāne, nau haenauhauvā nethauyāsenanene haejenanauwu hevaudenenu haenathaunaa.

2 Nau haenauhauva jea jachau hadavenuhu henevesāne haethāgudene hanesāenee nevaāhenee vāejethāau.

3 Nau hanaāenehede, hethauwuu nananenau nāedauwunathana henee naa hadavenuhunede henevesā javaājenanauau vahee;

4 Hanau vahee nuu nanethauyādahethee dejenanuu dejenanauwunauthee Hejavaneathu: hau hadavenuhunede hajanauau vahee heenaededaunau hathāenethenauau.

5 Nau haehegaugaugauudenauau vadannauuwuu, haseneehenee nauguu hethāhenethe hauunauganau nau hausāyaunau, hanaāenehede,

6 Nuu hayauhuhau hānauhauthaunenau, hesee hadnauauchuu, hadnehauwunathauau hanesāde hauunauga hanathaugude hadvajanesee.

7 Nau hanaāenaudedauauthee, Hechauhauthethāhe, hau hadduunaasau nuu? nau hayew hadnauhauwuu hadnesauau hāene nuu hayauhuhau hadneenauauchuu? hathauhauganee.

* **20:41** “Dāvid” is spelt thus here and in two other places nearby, 20:42 and 20:44. The name is spelt “David” in its other ten appearances in the text. (See note for 13:16.) † **20:42** “Psalms” is capitalized here but not in 24:44, but both are almost certainly deliberate. As per the KJV, “Psalms” in 20:42 is the name of a book in the Bible, but in 24:44 the common noun “psalms” is meant.

8 Nau hanaāenehede, haunauyauhaudauwauau henee nananena hadejenanedaunehana: hanau hadnewauthathee hadjauthee Naneseedaunaa, Hanejavaneauthusaunenenu, hadnethee; nau hayānauauchauau: jevathauguhaa.

9 Hau hāenedauwaudauwunā vauthadede nau jajayauthadede, jeva nathajauau, hanau nuu hayauhuhau hadnedauu-nauauchuu; hau hadneevadauauau hadguthauau.

10 Hanaāēdauwunaude, jajaesenanedanedede hadnevauthadee jajaesenanedaa, nau najanede hadnevaudauau najanede:

11 Nau hadnavathethauthauwunauauau vedauauawuu, nau hasenaude, nau havathaugauwude, nau naunau-nauchaudauhauthaude nau hadvasauau naunauhauwuu hadnauauchauau hehethee hejavaa.

12 Hau hadnejesejenauauchuu vahee nuu, hadnedanāna, nau hadnaunaunauchauthehāna, nau hadnevaudenee nananena hauāchaude, nau duguhunauauwuu, nau hadnenau-uchauhana hathaājethee nenauchuwuthee nau hauchuwu-nanenauau hanau Naneseede heee.

13 Nau hadnaasejenanauwunana heee haenathau.

14 Hāenauwuu heeehena nananena hadahenauau, jevagau-gauuthajauau nedauau daun hadnesenehena:

15 Hanau hadvenathana vade nau haeyaude, vahee hasānavādaunenau hadnehauwuneayādaunāva hegau hayethaagudaunādaunenau.

16 Nau nananena hadnavethevāthee nesauuu hanehānenau, nau hāthesaunenau, nau hādauānenau, nau hādaehahenau; nau jasae nanaena hadneenaana.

17 Nau hadneevahasānavāhena vahee henanedaa hanau naneseede heee.

18 Hau hegau hāthaanenau haudauguhuanenauau haudne-hauwugaujauaudāhenaunau.

19 Hanāedevedaunenau hadnaunaunehaudde havadathuwunau.

20 Nau hāenauhaudauwunā Dādaunedan hadnechauchuaunāna vanenanenauau, nanehāenauwuna henee nauauhadede wauwu hadneaudaa,

21 Nanehadaugauhuthee hesee hauanee hathāanedauthee Judaea; nau henee hathāanedauthee nahethāe nanehanauhuthee; nau jevajejedānauha henee hathāanedauthee gauchuhunee vedauauwuu.

22 Hanau nuu hesee hadneauthedaudenee henee vahee hayauhuhau hathāewauthaunauhuu hadnethauwunaasauau.

23 Hau naunauthaunee hadnethauauvāhethee hathāenesaunethee, nau hathāeneaunauhuthee hena hesee, hanau hena hadnavathasenaudenee vedauauwuu, nau hasenaunaudaunāhenauau nuu henanedanede.

24 Nau hadneaunathāhethee gaugauthau, nau hadnejathechauhāthee hadwauwaunenethee vahee jajaesenanedanede: nau Dādaunedan hadnauguhethee Neauthu, haunaude Neauthu nauauchaudauhaugaanee.

25 Nau hadnauhauthaunee hesesee, nau vegusesee, nau hauthuu; nau nanadee hathāauauvaa hadnau-nauādaugauhudaunee jajaesenanedanede, hadnehauwae-nauwu; hadaje nau hadnaunaudānaunee;

26 Henanenauau hedahenau hadnadenāthajaunee, nau hanau naunauyauhauduu hena hayauhuhau had-nauauchauunee dasee hathāauauvaa, hanau hathāenauthauau hejavaa hadnauauwunauauau.

27 Nau hadnaēnauhauwauna Heau henane hadnenauu-sade henaunauade nauguu naunauthaunee nau hadnava-thenauasāauau.

28 Nau hāene nuu hayauhuhau hāenauauchuu, nauhad-naēnaunauānena; nau hadnejenāauguauna heee hadneejae-nauthana hadnaēaadaa.

29 Nau hanaēdadajenehethaude; Nauhauvaa hauuyaachu-nauhaude, nau vahee hahaudenauau;

30 Hāeguugauāhenauthē, hadnauhauwauna nau hadnae-nauwuna nehayau henee veja dauhuaadaa.

31 Hadnaasauau nananena hāenauhaudauwunā nuu hayauhuhau hadnethauwunaasauau, hāenauwuu henee henajanede Hejavaneauthau haneaunee.

32 Hethauwuu nāedauwunathana, nuu henaedede hadne-hauwuvadauau, haunaude vahee hadnethauvāe.

33 Hejavaa nau vedauauwuu hadneyauhuu; hau Nadanadedauau hadnehauwuthauyauhuunau.

34 Nau haunauyauhaudauwauau nehayau, naseduhuu daunāene hadahenau havaehayaundenau heee haudauhau-ganedaunenau, nau havanadenenau, nau haunaunethaune-nau nuu henaedede, nau henee hese hadgauduaunāna hau hadnehauwaenava.

35 Hanau waude nauyaundenau hadnauauchauau vahee hathāetheaugude dasee hathāauauvaa.

36 Haunauyauhaudauwauau henaheee, nau hevevethahee dajauaunee, henee nananena hadeheenauguauna hadegauchuhauwuna vahee nuu hayauhuhau henee hadnauauchuu, nau haddetheauguna hathaāhede Heau henane.

37 Nau hesenee haechauhauthethā vadanauauwuu; nau hāeveeyaunee haenauā, nau haeadāne hauanee henee ne-seeyāgu hauanee Olives.

38 Nau vahee henanedanede haejevanauuchaudene naugusāje daunauganenee hadaude vadannauauwuu, heee dauhujaathehāde.

22

1 Wauhā hadneevasevenee janenesaunauchauanauhūu jauaujaunau haeyānauaucha, Hadavechaude neseāgu.

2 Nau najanau vevethahevahehau nau wauthau-nauhāhehauau haegaugauanadauwunenau hadnesenaāde; hau haedauwu henanedanede.

3 Hanaāejedāde Haujau Judas hejaveede Iscariot, haenethanedau vadadauchunesenee.

4 Nau hanaāejathāde, nau haeanaadetha najanau vevethahevahehau nau haunauyauhauthāhehau, hadneseavedau-daunauwaude.

5 Nau haeneethajaunauau, nau dechauchuwuhadethee hadvenāde vāejethā.

6 Nau haesayānehetha, nau haeaunauyauhaudauwu had-neeneavedaudaunauwaude henanedanede.

7 Hanaāenauauchaau hesee janenesaunauchauanauhūu jauaujaunau nanaa hadavechauthau hadnāede.

8 Nau hanaāauthewaude Pedaheau nau Jauneau, Naje-saa hadesaanudeva hadavechauthadede, hadevethenauau, hathāhaugaunee.

9 Nau hanaāēdauwunauthee, Daudu hadauvathehāne hadnedauusaunuu?

10 Nau hanaāēdauwunaude, Naune, hāejedānā hedan, hena henane hadnuchaunāna, hadnewauunauau hauānau had-jaāsanenee naje; hadethauguhauva hauauwuu hadnedau-jedāde.

11 Nau hadethauva henane hedauauwunede, Hechauhauthethāhe nejeethāne, daudu jādanauauwuu hadnedauvethenauau hadavechauthadede nauguu nāthaughādaunauau?

12 Nau hadnauhauthehāna vanasaunee dachauauwuu had-nesewaudeanee: hadnesaanuhuu.

13 Nau hanaāeyehauthee, nau haeveedenauau neethāedauwunaude: nau hanaāesaanudethee hadavechauthadede.

14 Nau hāenauauchaunee, hanaāejanaugude nauguu vadadauchunesenee hevadauhanau.

15 Nau hanaāēdauwunaude, hethauwuvadavethenau nuu hadavechauthadede naugu nananena hajese-jasauwauwuthānau:

16 Hanau nāedauwunathana, Nadnehauwauthevethe nuu, haunaude hadnauauchaauau henajanede Hejavaneauthau.

17 Nau hanaāedanauau vāenau, nau hanaāevāde vaveenede, nau hanaāenehede, Hedanauwuu nuu, nau hadjaanauwauva nehayau:

18 Hanau nāedauwunathana, Naudnehauwuvanethede dadajevenenaje, hanaude henajanede Hejavaneauthau nauauchauyāgu.

19 Nau hanaāedanauau jauaujau, nau hanaāevade vaveenede, nau haejeane, nau haevena, Nuu nanaa nadanayau havenadenenau: nuu hadneejenauneethedaunena, hathauhuk.

20 Naasauau jea vāenau hāesethunevethedeaunee, Nuu vāenau waunauyauau hesānaavede Navaevaa, hanedaunauwunana, hathauhuk.

21 Hau nauhauvaa, hejadena henee haneavedaunade nananenauau nandedauguvānauau vethedeaunaa.

22 Nau hethauwuu Heau henane hadjathāaude, neesedaunade: hau naunauthaunee henee henane haneavedaunaudenenee.

23 Nau hanaāenaunadedeunadethee nehayau, hanaadee hadnesedaude nuu.

24 Nau hena jea haeneenayaundenauau, hanaadee hadjavaāvasāthaa.

25 Nau hanaāēdauwunaude, Nenauchuwuthee Neauthuu haevahadahethedauwu; nau henee nanethenuu naudahede nanadee hesenaedehehauau neseadagaunee.

26 Hau jevanaathāhee: hau henee havasāthawaunādaunenau, hadenahavaewauva; nau henee naja waude henee henechauthāhehau.

27 Hanaa vanasāthaa, henee vanethede, wauāthe henee henechauthāhe? gaujenane henee vanethede? hau hanedaunathana waude henee henechauthāhe.

28 Nananena daudajauaunenethaunena denaunau-nauchauthehanau.

29 Nau janenanauwunathana najanede, waude Nāsaunau nejeesejenanauwunānau;

30 Hadevethehena nau hadevaveyāna navethedeaunaa Nanajandaunaa, nau hadetheaugudauwuna najatheaugudaunau hadnauchuwuhauna vadadauchunesenee jajaesenanedanede Israel.

31 Nau Vahadāde hanaāenehede, Simon, Simon, nauhauwune, Haujau nevadaunethenāne, hadvachuguthāne waude thauauhanewauchuunau:

32 Hau nevevethasathane, henee hadethauwuthajaude hadejenadegaundenauau: nau hāejauaugauthethajaunaune hadēdēwaunauau hahauwauauau.

33 Nau haenehetha, Vahadāhene, Nananenau hanesaanunau hadnenenethaunathane, nesauna duguhunauauwuu, nau gaujauaudahedaunaa.

34 Nau haeāedauwuna, hāedauwunathane, Peda, neauthuneāhe hadnehauwunedu nuu desenenee, hajesejenehenaune nasau hadnethedauwaune henee nananene daujaenaunene.

35 Nau hanaāēdāuwunaude, Deathavejenanathana hāehauwunewauunava nesevāejethāwau, nau newaugusa-

jaānauchu, nau wauaunau, gauhājevathehāva hayewhu? Hegau, hathauhaugaunee.

36 Hanaāēdauwunaude, hau hewaunehaa henee nanethenauau nesevāejethāwau nanehaedanauau, nau jea henuaugusajaānauchu; nau henee janethenauau gaugauchu, nanehaeaudaunade heddu, nau jeaudaunade gaugauchu.

37 Hanau nāedauwunathana, henee nuu wauthaunauhuu hethauwunaauthaunauhunau, Nau haewauhaunau wauwauchudauhuhau: hanau nethauthedauthanau hethauvaa.

38 Nau hathauhaugaunee, Vahadāhene, nauhaudau, heyew-nau hanesāe gaugauthau. Nau haeēdauwuna, Naadauchāe.

39 Nau haejenaua, nau haejathāau, nesedaude, haua nee Olives; nau hethauguhādaunau jea haethauguhaa.

40 Nau hāanauusade, haeēdauwuna hevevethahee henee hadejejedāna vasehadede.

41 Nau haejāvesa hehejese nejechauthaunenee, nau haech-agujanaugu, nau haevevetha,

42 Nāchau, hith Nananene vadausedaunenagu, jegudanauwune nuu vāenau hehethee Nananenau: hau nāhauwuvathehaa, hau Nananene, hadnaasauau, hathauhuk.

43 Nau haenauhauva hautheaune hehethee hejavaa, haedadāevaa.

44 Nau haeneenajeneethajau haeneenavevetha: nau heguwauaude waude davathejajaneauthee vaewauau dejanese vedauauwu.

45 Nau hāegauhāde hehethee devevethahede, nau hae-jeedasa hethauguhādaunau, Haeveena haeseenaugauhune-nau hee haudauwuthajaude,

46 Nau haeēdauwuna, Naudu haenaugauhuna? gauhāe nau vevethahee, hadejejedāna vasehadede.

47 Nau hajesanadede, haenauhauwu havathenedanede, nau henee Judas neseade, jasia vadadauchunesenee, haenedauva, nau haeayāedasa Hejavaneauthusaun hadnedanaude.

48 Hau Hejavaneauthusaun hathāhuk, Judas, gauhāavedauna Heau henane gauhadneenedanau?

49 Hāene henethauguvādaunau daunauhaudauwunethe hadneshade, Vahadāhene, gauhadjedauauwaunauau hee gaugauchu? hathauhaugaunee.

50 Nau hanesāde haedauva hewauwaunavene vasnane vevethahevahew, nau haegauadathāhe hejave.

51 Nau Hejavaneauthusaun haeauchuhanadetha, Hauwaa nanosedau nuu. Nau haevasane henaundaunune, nau haenayauha.

52 Hejavaneauthusau hanaāenehethaude najavevethahe-
vahehau, nau haunauyauhauthāhehau vadannauauwuu,
nau vachaugananenau, hejewaunedasādaunau, Gauhāejauva,
waude heee havedehe, nauguu gaugauthau nau vachau?

53 Denethenaedevathana hayauwusenee vadan-
nauauwuu, nananena hāehauwudaneva: hau nuu
nauauchaudauna, nau naunauthauau vaneeyauau.

54 Hanaāedanauthē, nau haejathechauhanauau,
nau haejedananauau Vasenajane vevethahevahew
hedauauwunene. Nau Peda haejesedauchu.

55 Nau hāesewaudedaunathee nahethāe hadauvaseneje-
sauau, nau haeauājanaugunauau, Peda haejanaugudauna.

56 Hau jasae hesāhedāeyaune haenauhauvaa daujanaugu-
daunaude hejava hesedaa, nau haenaunauchaudauhauvaa,
nau hathāhuk, Naa henane jea nanethenaedewaude.

57 Nau haeethedauwautha, Hesā, nahauwaenaunau,
hathauhuk.

58 Nau naunade jachau haenauhauvaa, nau hathāhuk,
Nananene jea hanehedāhene. Nau Peda hahagu, Henane,
nananenau hegau.

59 Nau heee jasaye denauachauau waunee jachau
haethauwunehene, hathāhuk, hethauwuu naa jea
nanethenaedewaude; hanau nananede Gananaean.

60 Nau Peda hahagu, Henane, Nāhauwaene daun nesene-
hene. Nau chauchaunu, daunausunanadede, neauthuneāhe
haenedu.

61 Nau Vahadāde haejaaagu, nau haenāauhauva Pedaheau.
Nau Peda haethauchuthajaude hedanadedauunene
Vahadāhenith, neesenehethāde, Hajesejeneduhude
neauthuneāhe, nananene hadnethedauwauchune nasauna.

62 Nau Peda haenaua, nau haeneenavewau.

63 Nau henanenauau henee daununauthē Hejavaneau-
thusaun haevavavanauchuhanauau, nau haedaudauauvaa.

64 Nau hāesajeājethauthē, haeanadeāhenauau, nau haenau-
naudedauunanauau, Haeyāhe, hanaa henee haudauauvāde?
nethāhuk,

65 Nau wauthanee haewauwauchuvaa nanāsanadethāde.

66 Nau chauchaunu hasenaugusājenee, vachauganane-
nauau henanedanede nau najanauau vevethahehehauau
nau wauthaunauhāhehauau haeauāchaudaunanauau, nau
haejedananauchau hadauhanadethee,

67 Gauhanane Chris? jeāedauwunāa, hathauhaugaunee.
Nau haeāedauwuna, Hith Nananenau hāedauwunathanagu,
nananena hanājethauwaudaunena:

68 Nau hith nananenau jea naudedauunathanagu, nananena
hanājauchuhananadesena, wauāthe hanājejenanena.

⁶⁹ Hewaunehaa heee Heau henane hadtheaugude hejavese naunaudāhenith Hejavaneauthu.

⁷⁰ Hanaāenehethēe vahee, Gauhanane Heau Hejavaneauthu? Nau haeāedauwuna, Hasenehena Nananenau.

⁷¹ Nau hahagaunee, Hehauwauthethehāanauau naudedauyaunauau? hanau nehayau nandedaunaunauau Nehayau hedenaa.

23

¹ Nau haunauude henanedanede haegauhādene, nau haeyehaudaunanaunauau Pinade.

² Nau hanaāēvavasevāde, Vaneenaunauau naa gauchuhuchaudede jajaesenanedanede, nau nedauduwaude hadjevenauthēe hauāyaunau Caesar, daunahagu Chris Nenauchuwude, nethadede, hathauhaugaunee.

³ Nau Pinade haenaudedaua, Gauhanane Dauhunauchuwuhunene Jews? hathauhuk, Nau haeauchuhanāedauwunaa, Hethauvāne.

⁴ Hanaāāedauwunaude Pinade najanau vevethahehehau nau henanedanede, Nāhauwuveedenaune wausaunee naa Henane.

⁵ Nau haenaunauchauthedauhadene, wauwauyauchude henanedanede, hanechauhauthethāde hehethēe vahee Jewsevedauauwuu, jejasesee hehethēe Gananane nauuu nuu vedauauwuu, hathauhaugaunee.

⁶ Hāene Pinade nedauwauthaude Ganāne, haenaudedauva wauau hagananenanene.

⁷ Nau chauchaunu hāesaenauau henee daunaadāde Herod hadaunajavanethe, haeathavenane Herod, jea haenedau Dādaunedan hena hese.

⁸ Nau hāene Herod nauhauwaude Hejavaneauthusaun haevaseneethajau: heee devadaunauhauwaude dajauaunee hanau dauhuwauthanedauwauthaude; nau haevadaunauhaudauwu jasaa venauneguthau hadnesedaunith.

⁹ Haenaunaudedaua hauwauhuu hanadedauaunau; hau haejauchuhananadethaa.

¹⁰ Nau najanau vevethahehehau nau wauthaunauhāhehau haetheaugunenau nau haenaunaunauchauthevaa.

¹¹ Nau Herod nauguu vauānanenau haejenananauaugaugauyaune, nau haevavavanauchuhanauau, nau haeneenuhanauau neaudahenenee hu, nau haevenanauau jea Pinade.

¹² Nau hajesesenene Pinade nau Herod haenedaehāvadenauau nesauuu: hanau nedauwuu haeasānavadenauau nehayau.

13 Nau Pinade, hāesauānadethaude najanau vevethahehehau nau hauchuwunanenau nau henanedanede,

14 Haeāedauwuna, Nananena nauuchaudaunena naa Henane, nanahagu henee gauchuhuchaudede henanedanede: nau, naune, nananenau, haunauchuwuhauau hathaāhena, nāhauwuvedenaune wausaunee naa henane heee henee hayauhuhau nanāsevasewauna:

15 Hegau, hehauwune Herod: hanau neathavejenanauwunathane; nau naune, hehauwuneenauau hehauwugaudauwudau.

16 Hadnensesgauhaa, nau hadjenanauau.

17 (Hanau hadnaugauhusenaasedaude hadjenanaude hanesāhenethe vasevethededauneagu.)

18 Nau haunauude haevasānadenauau jasānee, Hausāguthaa naa, nau jejenanauwunāaa Barabbas, hahagaune:

19 (Nananede hanau jasaa nejaevauāde hedan, nau hanau nenaade, nethānade duguhunauauwuu.)

20 Pinade henaheee, haevadaujenana Hejavaneauthusaun, haeanaadetha jea.

21 Hau haeneānaune, Saethechuhuu, Saethechuhuu, hahagaunee.

22 Nau haeāedauwuna nanaseauwaunee, Dusee, dusewauchudau? Nāhauwuvedenaune hadneegaujauauthehaude: Hadnaasedaunau hadnensesgauhaa, nau hadnaājejenanauau.

23 Nau haeneenavasānadenauau, haeneenavadausaethechuhunauau. Nau haeneānadenauau nau najanau vevethahehehauau haechauwauauwaunauau.

24 Nau Pinade haechuwardā henee hadnaasaunee hasevathehāthee.

25 Nau haejenanauwuna nananede henee hanau nejaevauāde nau nenaade haethānau duguhunauauwuu; nananede heenedauwaudenenau; hau haevā Hejavaneauthusaun hathanauwauthee.

26 Nau hāejathechauhauthee, haedananaunauau hanesāhenith Simoneau, hehethee Cyrenene, hananeedesade vedauauwuu, nau hananene haenehanauwunanaunauau naugauchu, henee hadnanewauunauwunith thauguu Hejavaneauthusaun.

27 Nau hena haethauguhaa havathenedanede, nau hesānau, haeaudauwuthajauha nau haevewauhunauau heee.

28 Hau Hejavaneauthusau haejaaāne haeāedauwuna, Dādaunedan hedaunauhau, jevahevewauhau heee Nananenau, hau heevewauhau nehayau, nau heee hadāeyaunevenau.

29 Hanau, naune, hese janādauuu, hadneenededaunee,

Haunauwuthajauau jenesaunehehauau, nau henau-daunenau henee nejethauujanesāthee, nau hethanenau hehauwunethuaunenau.

³⁰ Hee hadnaāejaseseneheduu hauane, Gauduaunānauau; naa jauaudane, gaudauyauhunauau.

³¹ Hanau hith heenesedauhaugaunee nuu hayauhuhau janadanegauaheyaugaune hauhaudene, haudneedusedaune wautheyaugu?

³² Nau hena haenesenauau gauchuhunee jea, wauwauchudauhuhau, haenethaunaa hadnaugunaade.

³³ Nau hāene hāedaduu, Calvary hanaaseenee, hena haesaethechuhunauau, nau wauwauchudauhuhau, hanesāhenith hejavese, nau jachau nauwauthe.

³⁴ Haenaāenehede Hejavaneauthusau, Nāchau jaegudanauwunene; hanau daujāenuu hasedauthee. Nau haejaanauwaunenau, hedāchaunene, nau haeheedaudauu-sadaunenau.

³⁵ Nau henanedanede haetheaugudaune dauhasauhauvade. Nau hauchuwunanenau jea nauguu haeauchaudanavaa, haseneheyaugaune, Nenayauhaude hauthauau; Nanehanehanenayauhadede hethauwuu Chrisdeyaugu, Neayāsanāde Hejavaneauthu.

³⁶ Nau vanenanenau jea haenaunaugauthedaunaa, haedasaa, nau haevenaa naneujaudenee dadajevenenaje,

³⁷ Nau hathāhuk, Hethauwunajawaunaudagaunee Jews, henayauhade nehayau.

³⁸ Nau haewauthaunau jea haewauthaunauhune hejavaa hedanadedanene Greek, nau Latin, nau Hebrew, Naa Nana-jawaunaude Jews.

³⁹ Nau jachau wauwauchudauhu chaunaunauaunith hae-wauwauchuvaa, Hethauwuu Chrisdenagu, henayauhade Nehayau nau nananee, hathāhuk.

⁴⁰ Hau jachau haeauchuhananadene haedauduva, Gauha-jedaunau Hejavaneauthau, hanau nananene nanesadee hathauchuwuhane? hathauhuk,

⁴¹ Nau neehanauau; hanau hanesedanauwunauau nanāsedanauau: hau Naa hehauwuwauchudau.

⁴² Nau hanaāenehethaude Hejaneauthusaun,* Vahadāhene, dauyewuwuthedaune hāanaususanaune Hanajanede.

⁴³ Nau Hejavaneauthusaun hathāhuk. Hethauwuu hāedauwunathane, Nuu desenee hadnethenaedevene Paradise.

⁴⁴ Nau hāethauthaunesade, nau hanaāeveeyauau nanadee vaa-hee hathāauuvaa haunaude nanasuusee hāenauauchauau.

* **23:42** "Hejaneauthusaun" possibly should be "Hejavaneauthusaun". (See note for 18:19.)

45 Nau hesese haeveenenauau, nau hauguthau Vadanauauwu haethauwunauau nahethāe.

46 Nau Hejavaneauthusau hāevasānadede, Nāchau, hajadena hadaunaunehau Navadathuwu, hahagu: nau hāesenehede nuu, haevadauwauthauwu.

47 Wauhā vanenenaja hāenauhaudauau hasedaudenenee, Haeauwauauna Hejavaneauthu, Hethauwu naa chaunuvāde Henane, hahagu.

48 Nau vahee henanedanede henee hathāejeauānuusathee hadnauhawauthee, haenauhaudauwu hanasedaudenenee, haenadesejāhedenauau, nau haejaajegauhudaune.

49 Nau vahee henedaehauhau, nau hesānau hethāethauguhādaunau hehethee Gananee, haetheaugunenau vavāaune, haenauhaudauwu nuu.

50 Nau, naune, henane Joseph haeesee, najananadehe; nau haeethā, nau haechuvā:

51 (Naa haejechuwardā hasenehedaunenee nau hasedaunethe;) haenaadāde Arimathaea, hedan Jews: nananede jea nehayau haejauwuwude henajanedaunene Hejavaneauthu.

52 Naa haeyehau Pinade, nau haenedauwaude hedanayaunene Hejavaneauthusaun.

53 Nau haejanana, nau haeauyauuna naunaujānaunee, nau haejenana nedauthānavathe gaujauaudahehehau hauunaugāe, haunauau henane haejethauujenana.

54 Nau hena hesee haesaanudaune, nau vadanesee dayānauauchauau.

55 Nau hesānau jea, hejenauunethaunādaunau hehethee Gananee, haethauguhā, nau haenauhaudauwu hadausaesenanethe, nau hedanayaunene hathaudanee.

56 Nau haejaenauthau, nau haesaanudenauau hathāeneevaudenee nau chauayaunau; nau haedauyānusenuau vadanesee hasauau nanavaavede.

24

1 Wauhā nandedauwadaa hese hauchauvadede, haje-sejevesesanith haejedadauwu hadausaesenanith, haenau-chaudenauau hathāeneevaudenee heesaanuthaunenu, nau jasae hauthauau nauguu.

2 Nau haenauhauvanauau hauunaugane haeausānene hehethee hadausaese.

3 Nau haejedānauau, nau haejevedenauau hedanayaunene Vahadāhenith Hejavaneauthusaun.

4 Nau hethauwu daugaudauwuthajauthee hee, naune, hanesenethe henanenau haetheaugudaunā haenauasāaunenau hedāchaunene:

5 Nau daunāthajauthee, nau haenaunauagunauau vedauauwuu, haeāedauwunā, Naudu nananena haenaudehauna hanenaededaunau nethee gaujauaudahehehau?

6 Hehauwanedau hede, hau jaegauhāde: dauyewuwuu neethāedauwunāna denausunatedaude Gananee,

7 Neesenehede, Heau henane hadvenavathe hejadenene wauwauchudaunanenau, nau hadsaethechauhude, nau naseese hadjaegauhāde.

8 Nau haedauyewuwunauau hedanadedauene,

9 Nau haenaudauwu hehethēe needausaesenanith, nau haeauthedaunanauau vahee nuu hayauhuhau jasānee, nau vahee hauthauau.

10 Haenane Mare Magdalene, nau Joanna, nau Mare henaune James, nau hauthauauau hesānauau henee henethaunādaunenau, neauthedaunauthee nuu hayauhuhau vadauhanau.

11 Nau hedanadedauenenau hathanadawuyaugaune gau-gauyaune, nau haejethauwaudaunaunauau.

12 Hanaēgauhāde Peda, nau haeyeseneegau hadausaesenanith, nau haewauguau, haenauhaude naunaujānaunee haeānaudanenau jessaa, nau haenaude, haegaugauanade hasaunee.

13 Nau, naune, hanesenethe haeyehaunenau henee hajesenee hajasee hauauwudan Emmaus haseagu, hehethēe Dādaunedan wauau nesaudauchu nau gauuu daugauha.

14 Nau haenanadenuau wauhaunee vahee nuu hayauhuhau hasaunee.

15 Nau hethauwuu, henee, dauanadethee wauhaunee nau haenaunaudedanadenauau, Hejavaneauthusau Nehayau haeeauhauna, nau haenethauna.

16 Hau hesesānenau haedunenenuau henee hadjaenaunauthee.

17 Nau haeāedauwuna, Hayewnau hadanadedauenenau nuu henee nananena hānegudaunenenuau, daujajāwauaunadena, nau daudaneāauna?

18 Nau jasaa hanaaseede Cleopas, haeauchuhananadethaa, Gauhanane vavade dauhadavesane nuu Dādaunedan, nau gauhajaene hayauhuhau hasedaunenee hena nuu hesee?

19 Nau haeāedauwuna, Hayewnau? Nau haeāedauwunaa, Hee Hejavaneauthusau Nazareth, nananede Haeyāhe nau-naudāde hanasedaude nau hedanadede hathaāhenith Hejavaneauthu nau vahee henanedanede:

20 Nau najanauau vevethahevahehauau nau hadauchuwananevene neesevānethe gaujauaudahede hadneauchuwuhade, nau nesaethechauhude.

21 Hau nejauwuwuhaunauau Nananede hadnenayaudede Israel: nau nauguu vahee nuu, desenee nanasāe hesee

hāesenesedaudenee.

²² Haa, nau jasae hesānauau jea hadahenauau nenāvānauau, naugusāge neanedauthee hadausaesenanith;

²³ Nau dejevvedethee hedanayaunene, nejenuusathee, neauthedathee, henee jea haenauhauvanauau hautheaunau neethāhaugaunee henee daujaenaedeyaugaune.

²⁴ Nau hauthauauau hānethaunādaunene deyehaunauau hadausaesee, nau haevedenauau vavade hesānauau neesenehenethe: hau haejenauhauvanauau.

²⁵ Hanaāēdauwunaude, Hau hāhauwaenava nau gaunauanuu hadahenau hethauwardanee vahee henee haeyāhehauau nethauthedathee:

²⁶ Naasauau Chris hadnasenede nuu, nau hadjedāde hadnedauvasāthaa.

²⁷ Nau jeeejasesee Mosesee nau vahee haeyāhehauau, neevavesēdauwunaude heee vahee hanathauthaunauhunee hayauhuhau hadnesenaedede Nehayau.

²⁸ Nau haeauchauwu hajasee hauauwudan hasesathee: nau nehayau haenanedauneha hadjavesade.

²⁹ Hau haeneenadaunanauau, hathauhaugaunee, Hanedaundaunā: hayānaesade, nau hesee hayāenauwusanauau. Nau haejedā hadnanedaundaunade.

³⁰ Nau hethauwuu, daujanaugude haenethevethheva, Haedane jauaujau, nau haevaveene, nau haejeane, nau haevena.

³¹ Nau hesesānenau haegaunanenenau, nau hanaāaenaunauthee; nau haeyauhaudenauau.

³² Nau hadāhene gauhauchāe hethauvaa, hanathadagaunee jae, deanadethānauau jāthee, nau hāegaunanauwunānauau wauthaunauhanau?

³³ Nau haegauhānauau chauchaunu nau haejaeye-haunauau Dādaunedan, nau haeveehanauau jasānee haeauauudaunāhenenau, nau hauthauau henee hanedaundaunādaunenau,

³⁴ Vahadāde gauhāde hethauwuu, nau haenauhautheha Simon, hathahaugaunee.*

³⁵ Nau haeauthedanauau hayauhuhau hanasedaunith hadesathee, nau hasaenaunāde daujeanauau jauaujau.

³⁶ Nau daunausunanadethee, Hejavaneauthusau Nehayau haetheaugu nahethāe hadauthee, nau hathāhaugaunee, Danādauyauau vanenathana.

³⁷ Hau haenānauaunauau nau haenāthajaunauau, nau hasethajauhaugaunee henee haenauhauvanauau vadathu.

* **24:34** The last word of the verse is unclear and could be “hathahaugaunee” or “hathahaugaunee”. The former was chosen as being closer to what is used in other instances of direct speech.

38 Nau hathauhuk, Naudu nananena haenāthajauna, nau naudu haegaugauuthajauna gauhānauha hadahenau?

39 Nauhaudauwuu Najadenau nau Nauaudau, henee Nananenau nehayau: Vasanee, nau nauhauwuu; hanau vadathau hehauwudausānune nau hehauwudechaunave, hathauhauwuna.

40 Nau dauhanadede, haenauhautheha hejadenau nau heaudau.

41 Nau haejethauwuthajaunauau hee haunauwuthajaude, nau haegaugauuthajaunauau, Haeāedauwuna, Gauhajeveetheneva hede?

42 Nau haevenanauau hanesāhenith nauwu haeaujaunene, nau gauhauaugunauyaue.

43 Nau haedane, nau haevethe hathaājenethe.

44 Nau haeāedauwuna, Nuu nanāe hanadedaunau hāauthedaunathadenenau, denausunethenaedevathana, henee vahee hayauhuhau hadnethauwunauauchuu, hanauthaunauhuu henanavaavede Mosese, nau haeyāhehauau, nau psalms hee Nananenau.

45 Hanaāegaunanauwunaude hadnaenauwunethe, henee hadnaenauwunethe wauthaunauhanau,

46 Nau haeāedauwuna, Hathauthaunauhuu, nau naasauau Chris hadnasenede, nau hadjaegauhāde hehethee gaujauaudahede nasese:

47 Nau henee haugauthegaugauuthajaude nau hadjaegudanee wauchudaudenau hadnautheduhunee hee Hene-seede nanadee jajaesenanedanede, hehethee Dādaunedan.

48 Nau nananena haenauwuna nuu hayauhuhau.

49 Nau, naune, Nananenau vanenathana sayānee Nāsaunau hau theauguu hedan Dādaunedan, haunaude nananena hāchawunagu nauguu naudahede hehethee hejavaa.

50 Nau haejasesenedauwauna hajechaudanee Bethany, nau haegauha, nau haevevethasa.

51 Nau hethauwuu, daunausuvevethauchaude, Haenautha, nau haejechauhau jethee hejavaa.

52 Nau haevevethedaunanauau, nau haejaeyehaunauau Dādaunedan nauguu vaseneethajaude:

53 Nau dajauaunee haenedaunauau jedauwuu Vadanauauwuu, hauwaunede nau haevevethedaunanauau Hejavaneauthu. Hethauvaa.